

MINE BEEN ZHA NE PXEEL JESÚS

BNEE XTIIDZ ME

1 ¡Diuzh Tiofl!

¿Yose luu dien bets? Naa gon nac Luc, laa naa rxel stib guits rii lo luu. Mine pxel naa lo luu glo ga, lo co pquia naa grëse mine been Jesús, grëse wseed ne blu me lo miech zeene psilo me xtsiin me ²haxta gol dze ne psan me diidz pe nac ncuane gun grë zha ne bzooblo me tsie tsienee Xtiidz me. Espíritu Sant bdeed guielbiini lo zho bien zho zha racladz me; lëe dze co ga zey me gbaa.

³Nli psacsi miech me, beet zho me, per brieaban me. Ni par glu ganle ne nli brieaban me, dipse len choo ngbidz brieequia me lo grë zha ne sca bzooblo me tsienee Xtiidz me. Gzataa zeene rrieequia me lo zho, rnee me lo zho zha rnabey Dios.

⁴Tib vuelt ndxie zho grë zho me, dzigo pso me diidz lo zho ible grieed zho lad guiedz Jerusalén, haxta guiet Espíritu Sant gdeed guielbiini lo zho zigne nacle xtiidz Pxoze me; ni biire rëb me lo zho:

⁵—Golşoladz ganle laa naa nile lo to: nli laa Juan pchoobnis, per niab nisa; sangue to zgaa to guielbiini ne gneedz Espíritu Sant, rrieequia Espíritu co chobnis to; ni zhile gdziñ dze ne laa min co gac.

⁶Len ngbidz ne sca nolulo me lo zho, tib vuelt bnabdiidz zho lo me, rëb zho: —Ndion no men rnabey nac luu. ¿Pe niina na so luu gnabey luu, zeena cuee luu zha Israel ladznia zha Roma?

⁷Dzigo pquiab me rëb me lo zho:

—Dios, men ne nac Pxoze naa, ncuane gun me rieguialde to gacnan tow, mese nan dien pa dzew, dien pa horgaaw; sac mese nac men ne grielo gūna.

⁸Sinque to, zeene laa Espíritu Sant gneedz guielbiini lo to, hor co laa to yгаа poder ne rap me, laa to csilo gnee lo grë zha Jerusalén cho nac naa; tsie to dib xtan zha Judé, dib xtan zha Samar, ni lo grëragaa miech, tsienee tow.

⁹Blozhse sca bnee me lo zho, zowique zho lo me, dzega, dzega laa me bzoquia gbaa. Glaale ziequia me zeene znuse bdop tib xcow, laa me bionguetsse len xcow co, gondraa zho me. ¹⁰Laa zho bii quiawique zhan gbaa zaatne gon

zho biongueets me ga, tibaque zeene bdziñ chop mgui zaatne zo zho ga, dib nquitsbiese rna xab grop mgui co; ¹¹rëb me lo zho:

—¿Pe nacne squitaa quiawi to zhan gbaa? Zigne gon to i nagon zey me gbaa niina, squique quiet me gbaa gaḷ dze ne laa me guiaad stib.

¹²Blozh ga dzigo laa zho wbi guic gui co (lëë Gui Oliv ga). Zhisaque bzë zho laa zho bdziñle Jerusalén, lalse ne rzë zho dze ne rdziiladz zho lo dziin.

¹³Bdziñ zho zaatne rbëz zho, biep zho len yu ne riaan glaa; sac len yu glaa co ga no zho. Ga rbëz Pedr, rbëz Ndrés, Jacob, Juan, Lip, Mazh, Bartol, Matew, ni Jacob ne nac xingan Alfé; Simón Zelot, ni Judas menlidz Jacob. ¹⁴Grëse zho tibaque rcaalsa zho rzodiidznie zho Dios grë zho zha bets Jesús, xniaa me Marí, ni grëraa men wnaa ne nacgrë zho.

Bzo zha ne guñ dziin ne psaan Judas

¹⁵Tib dze pcaalsa maase tib gayoo gaḷ zho, dzigo guso Pedr bnee me lo zho, rëb me:

¹⁶—Grëse to bets, grëse to bzian, golgacnan ganle, mine been Judas zeene sca güeyto me Jesús, nole ne sca gaca. Lo Xtiidz Dios zhobneew, lëë min co pquiaa rey David zeene psiaab Espíritu Santa guic me. ¹⁷Ye Judas gogcza no, ye me nac diidz niun dziin ne nodziuun no niina.

¹⁸’Ni nligaa laa ne niun me dziin co, leḷ been me guieḷntseeb pto me Jesús, ni blozh ga lëëque lo liu ne bziuu dimi ne bdiizh zho me ga, ga güeytsobe me bzob guic me lo liu, wbiḷgazh me, nëzrii nëzrec bliiaḷ len me. ¹⁹Min co nacne zeene laa grë zha Jerusalén gocnana, dzigo bleelë zho liu co “Liu Ren”.

²⁰’Zigne rneque naa ga —rëb Pedr—, ible lo Xtiidz Dios sca zhobnee; ni lëë min co ga raquiet zaatne znu rnee:

Ible ziaandets lidz zho,

ni stib choot gbandraa zaatne bio zho.

Ni rneequew:

Zhaale zha ne guiaannie dziin ne no niun zho.

²¹⁻²²’Min co nagon, ible nonguiela so tib zha ne guiaan xlugar Judas, gacgza zho no guioxobnen no ne nli brieegan Jesús. Nana sca, lo grë zha ne nacgrë no psilo bzianie no me zeene pchoobnis Juan me, haxta gol dze ne laa me zey gbaa, lad co golgotsaa cue ne tib zha ne so gacgza no.

²³Dzigo ble zho tib men ne lë José Barsabás (lëëque me ga rnee zho Just), ni stib men ne lë Matí.

²⁴Blozh ga, bnab zho lo Dios, rëb zho:

—Dios, ndion no luu nac men ne rnabey no; ndion no luuse nac men ne runbey zdoo tib tib miech, gane niina laa no rnab lo luu, luu blu dien cho tib zha rii racladz luu so ²⁵gun dziin ne psaan Judas; sac laa Judas zeyle zaatne rieguiaḷ Judas.

²⁶Blozhse bnab zho lo Dios, laa grop zha co bio rif. Nacne briequia men ne lë Matí ga, dzigo dze cota laa me gogcza stsiiptib zha poxtl co.

Biaad Espíritu Sant

2 Zeene goc gadz zhmal gut Jesús, lëétaque dze co run grë zha Israel lni ne rnee zho Pentecostés. Dze co grëse zha ne no xnëz Jesús, laa zho pcaalsa. ²Laa zho ndxie grë zho, tibaque zeene bio tib bi nroob zhan gbaa, zig nac zeene rree tib me dox, haxta len yu ne ndxie zho ga pquiab; ³ni brieequia nzian biini, rluw zig nac ludz miech, tibga tibga biini co blëz guic zho grëse zho. ⁴Hor co grëse zho pcaania guielbiini ne bdeed Espíritu Sant, psilo zho rnee zho grë xtiidz stib miech mine rsiaabtaa me guic zho.

⁵Len dze co nziandoo grë zha Israel ne no stib ladz ben bdzin Jerusalén, grë zha ne bii zienal xley Dios. ⁶Laa zeene bio bi co, ye zho no lad grë miech guizhiu ne bdopbe zaatne zob yu co; tib tib zho zeene bin zho laa grë zha ne pcaania guielbiini co nonee xtiidz zho, per nli rzee zdoo zho. ⁷⁻⁸Rlozhd gwi zho rnee zho:

—¡Pe nli diidz rii! ¿Zha rrieelo rnee grë zha qui xtiidz ne, ni led zha Galilé nac zho? ¡Tib tib ne ndxie ne nu, zhaase zhaase diidz ne rnee ne! ⁹⁻¹⁰Nu ndxie grë men Part, men Media, men Elam, men Mesopotam, men Judé, men Capadós, men Pont, men Asia, men Frij, men Panfil, men Egipt, haxta grë men ne ziaad nëz África, delant guiedz Ciren; grë men Cret, men Arab, grë zha Israel ne ziaad nëz Roma, grë men Roma, zha ne zienal zhiwseed zha Israel.

¹¹Pe zhidaa ne —rnee zho—, ni diidz ne rneepaa ne tib tib ne laa ne nodzion rnee zha qui grëtaa milagr nroob ne run Dios.

¹²Grëse zho per nli rzee zdoo zho, rdzieldraa zho zha gun zho, rnabdiidzlsa zho rnee zho:

—¿Bay pe i? ¡Ncuaane gard dzian ne!

¹³Laa nogaa zho rzhidznie, rnee zho:

—Rzudz grë zha qui, gane squi rzë xtiidz zho.

Bdeed Pedr tib Iban

¹⁴Dzigo bzoli Pedr gza me stsiptib zha ne nac poxtl ga, psilo me nguiedz bnee me lo grë miech ne ndxie ga, rëb me lo zho:

—Grëse to, zigtaa zha Jerusaléna, zigtagaa zha ne blanso Jerusalén nuw, golgona ganle. ¹⁵No bla to quianee rëb to rzuudz no, per led rzuuzd no. Griinpaale name blan ngbidz, niicle niaca zha ne riepaa nziu, niacxe goon nale laa zho gzudz. ¹⁶Led rzuuzd no, sinque niina nagon noyac grë mine bzeet Joel padzeela (tib men ne biadteed xtiidz Dios), zeene znu rëb me:

¹⁷Znu rnee Dios:

Zeene wzhile runfalt gal dze co, laa naa cxel zhiEspíritu naa zdoo grëse miech;

grë xingan zhow, grë xindzooop zhow, laa zho cteed xtidz naa,

grë zha nguieg, nzian grë ncuaane glulo lo zho,

grë mengol, nzian grë ncuaane glu mcaal lo me.

¹⁸Len dze co,

- grëse zha ne nguzobdiidz lo naa,
niicle mguiw, niicle wnaaw laa naa cxel zhiEspíritu naa zdoos zho,
dzigo grëse zho cteed xtidz naa.
- ¹⁹ Nzian grë ncuuaane gzee zdoos to glu naa zhan gbaa,
scaque lo guidzliu, zan to ren, zan to bel, zan to grë goxdoo.
- ²⁰ Zeene zhile gdziñ dze ne guiaad men ne rnabey ne,
laa lo ngbidz ycow, laa mëe gna nizhnie zig rna ren.
Dze ne guiaad me ga,
dze co gac tib dze ne mazdraa nroob, tib dze ne mazdraa ndzon.
- ²¹ Grëse zha ne dib zdoos gnab lo Dios yquia zdoos me zho,
grëse zha co scaania me zho.
- ²² Grëse to, golquiaadiaga sca ganle! Led nanwen to ganle Dios pxeel Jesús,
men Nazaret ne biaad lo guidzliu rii, Dios bnabey been me grë milagr nroob,
been me grë ncuuaane bzee zdoos to; ga blu ganle ne nli Dios nacie me. ²³ Laa
zeene laa Dios bdeed diidz biab me lадznia to (sac ible xtiidzle Dios naca,
nanle me zha nac ne sca ted Jesús), laa to bnaaz me, bzobdoo to me, bnabey
to gut me. Led to gon bloo me lадznia grë zha ntseeb ne sca psacsi me pquiaa
zho me lo cruz. ²⁴ Per bleeban Dios me, psilaa Dios me lадznia guielgut; sac
lëbd guielgut ne lëew gnabey lo me.
- ²⁵ Zeene bzeet David Jesús, znu rëb me:
Men ne rnabey naa, ran naa tibaque quianap me naa;
tibaque zo me cue naa nëz derech, çpe nac nadien ne lega pe gac naa?
- ²⁶ Gacxe waa, nley no zdoos naa,
niicle ludz naaw, rleya roolnie naa me.
Ni gane tibliladz rac naa;
- ²⁷ sac nan naa niicle guet naa,
ib csaand me guiaan naa len baa,
ib gdeete me diidz xin xpëel naa.
Naa nac tib ngundziin lo me, ni rleynie me naa.
- ²⁸ Me blu lo naa zha grieelo ygaa naa guielmban,
ni tib guielbley nroob ne ygaa naa zeene laa naa gdziñ lo me.
- ²⁹ Bets, bzian, to ne nac to menladz naa, golgona ganle: led mine bdeete
pxozgol ne David bnee me nu; sac gon, zeene gut me güey zho güeyqueets
zho me, ni haxta lo nadze laa xpaas me bii niaa. ³⁰ Sinque mine bded Jesús ga
bzeet me, sac gon tib zha ne biadteed xtiidz Dios goc me. Gocnanle me ne
lo xtii me grieequia Men ne nacle diidz ga cxel Dios, ni men co sob gnabey
zigne bnabey me; sac scale rëb Dios lo me, ni haxta bzeet Dios lë Dios parne
glu ne yquidied me. ³¹ Dzigo zig nac zeene ranle me grëtaa mine ted Jesús,
nacne bzeet me ne ib zrieeban Jesús, rëb me guiaand xcuerp Jesús zaatne
rbëz grëraa mengut, niicle xindgaaw.
- ³² Jesús ga gon bzeet me, sac zig nac Jesús grop lo no bdion no bleeban Dios
me, ³³ ni niina gbaa zob me cue Dios nëz derech, sac me nac men rnabey. Ni
zigne nacle xtiidz Dios men ne nac Pxoos me, laa me pxeel Espíritu Sant lo

no; ni niina grëse ncuaañe noyañ tow, grëse ncuaañe noyongaa tow, xtsiin Espíritu Santow. ³⁴Laa naa rbire rne lo to stib ganle, led miñe bdeté David ga bzeet David; sac gon, zeene gut David güeysobd David gbaa. Davitaque goc zha ne znu rëb:

Rëb Dios lo men ndzon ne rnabey naa:

“Cue naa nëz derech, nu bzo,

³⁵nieeda lozh gnaz naa grëse zha ne rlëe lo luu, csañ naa zho lадznia luu.”

³⁶Grëse to men wladz, golgona sca ganle: Jesús gon, men ne pquiaa to lo cruz ga, lëe men co nac men ne rnabey. Dios bzo me, ni Dios pxeel me biaad me lo guidzliu.

³⁷Zeene bin grë miech ne ndxie ga sca bnee Pedr, biab guielnë zho, psilo zho rnabdiidz zho lo Pedr ni lo grëraa zha ne nacgza Pedr ga, rëb zho:

—Bets, nana, ¿pe nac ncuaañe dziuun no?

³⁸Dzigo rëb Pedr lo zho:

—Tib tib to, golsaan xquieñtseeb to, golbig lo Dios, ni none chobnis to zeena guiaañmbe to lo xtol to; scagaa ible sxeel Dios Espíritu Sant gacnie to. ³⁹Sac psanle Jesús diidz ne ible sxeel me Espíritu Sant gacnie grëse zha ne cuedz me sëeb xnëz me; zigtaa tow, zigtaa xpëed tow, zigtagaa grëraa men zita.

⁴⁰Nzianraa grë ncuaañe bzodiidz Pedr lo zho, ni pso me diidz lo zho csaan zho grëtaa guieñtseeb ne run miech lo guidzliu rii. ⁴¹Lo grë zha ne bzoobdiag grë miñe pseed me zho dze co, rga zho maase tson mil; blozh ga, grëse zho brobnis, laa zho gocgrë grë zha ne rliladzle Jesús ga.

Niowse mban zho

⁴²Grëse zha ne rliladz Jesús ga, dib zdoo zho zienal zho grë miñe rseed grë zha poxtl co zho, tibaque rcaalsa zho rzodiidznie zho Dios, ni row zho quietxtil zigne psañse Jesús diidz gun zho. ⁴³Grëraa zha ne zo stib lad, rdzieb zho; laa grë zha poxtl co, nzian grë milagr nroob ne run zho.

⁴⁴⁻⁴⁵Tipse rnee zho, rdeedlsa zho ncuaañe rquiin zha ne nacgrë zho; zha ne quianie liu, tel pe grëragaa ncuaañe quianie zho, haxta rto zhow, dzigo rguuiz zho dimi co lo grë zha ne guiend pe yquiin.

⁴⁶Gzataa dze rcaalsa zho len yadoo; rlozh ga, rcaalsaque zho lidz grë zha ne nacgrë zho row zho quietxtil zigne psañ Jesús diidz ga; ine nley, ine ndooladz rbe zho grë zho rquiin zho guieñwagw ne runlo zho, ⁴⁷ni rley zho roolnie zho Dios. Grëse miecha, rley zho ran zho sca niowse mban zho; ni zigse zie dzew, scase scase laa Dios rbedzraa grë zha ne rzëeb xnëz Jesús, laa zho racnzianraa.

Biac tib men ne në ni

3 Tib dze zig rbixwe ngbidza, briece Pedr grop Juan zie zho yadoo nroob ne zob Jerusalén, sac lëe hor co nac horne rie zho yadoo riezodiidznie zho Dios.

²Gax ro yadoo co quia tib puert rnee zho Puert Ndzon, ga rzob tib zhey gol ib gacd së, sac nële ni me zeene gol me. Gzobse dze, rie zha ne riezooob me ga

rñab me gon lo grë zha ne rzëëb yadoo. ³Laa dze co, zeene gon me laa Pedr grop Juan zieded ga ne laa zho sëëb yadoo, zëëb nia me rñab me gon lo zho. ⁴Dze rwi zho lo me, tibaque rëb Pedr:

—Lo no bui.

⁵Dzigo blis lo me bui me lo zho, nan me bod no pe dimi ne gdeed zho lo me. ⁶Wbiire bnee Pedr lo me, rëb Pedr:

—Quianied naa dimi ygad naa lo luu. Ncuuaane grieelese gnedz naa, laaw gnedz naa niina, ñniapse por Jesús (men Nazaret), laa naa rñab lo luu, niinagazh guso i zeen bzëni!

⁷Dzigo bzhen Pedr nia derech me bliso Pedr me, hor cogazh laa grop ni me ga bdaan, ⁸laa me psilo bzë. Rley me laa me bzëëb len yadoo gza me zho, lo guielbley co haxta rias me, ni roolnie me Dios.

⁹Grë miech ne no len yadoo, zeene gon zho laa me rzële, ni scataa rley me roolnie me Dios, ¹⁰bzee zdo zho; sac runbey zho me, nannpaa zho rzëd me glo, tibaque ran zho me rzob me zaatne quia Puert Ndzon ga rñab me gon.

¹¹Zeene laa Pedr grop Juan brieen len yadoo nroob co, yeque me nal zhits zho ib rsaand me zho, laa zho bdzin stib nëz cho yadoo co, zaatne quia tib nsaap nroob ne rnee zho zhiNsaap Salomón. Nalaque grë miech co, rlozhd gwi zho, rlozhd gzee zdo zho. ¹²Dzigo rëbchaa Pedr lo zho:

—¿Pe rac to? ¿Pe nacne squitaa rzee zdo to, squitaa rwi to lo no, zig nac zeene no bdziunguiac men rii, zig nac zeene por nguzobdiidz no lo Dios gane brieelo psëe no me? ¹³Golgacnan ganle led scada; sinque Dios men ne bliladz Abraham, men ne bliladz Isaac, men ne bliladz Jacob, men ne bliladz grëraa xmengol ne, men co blu lo to niina ne nli men nroob nac Xpëed me Jesús. Lëë Jesús co ga gon bnaaz to, bloo to me ladznia zhiwxtis ne, ni zeene gocladz Pilat nsilaa Pilat me, pe liaadz to ndeed to diidz. ¹⁴Bdeete to diidz nlaa men ne nac men ndzon, men ne peet xtold; lel bnab to blaa tib zha ntseeb ne nzëëb ngutoo. ¹⁵Laa me, pquia to haxta beet to me, ni me nac men ne rdeed guielmban. Per bleeban Dios me, ni mban me niina; sac grop lo no bdzion no me.

¹⁶Ni niina men ne ran to biac nu, niapse por Jesús biac me; led runbeyle to me nanle to ganle rzëd me glo. Ne dib zdo no rliladz no Jesús, gane brieelo bnab no beenguiaac Jesús me.

¹⁷Grëse to bets, ne nac to menladz naa, rgobey naa niicle to ni niiclegaa grë zha ne nac zhiwxtis ne, lega laa to bnabeyse bgaa Jesús beet to me, niicle to biendaque dien pe nacne sca been to. ¹⁸Laa Dios bneedz diidz been to grë guielntseeb co, sac sca goc grëse mine bzeet grë zha ne biadteed xtiidz Dios padzeela, zeene bzeet zho zha nac grë guielnë ne ted Jesús, Men ne nacle diidz cxeel Dios guiaad lo guidzliu.

¹⁹Dol nroob ga gon been to, gacxe nana gon waa golsaan xquielntseeb to, golbig lo Dios; zeena csanmbe me to lo xtol to. Me gneedz guielbley lo to stib, ²⁰ni zbiire cxeel me Jesús lo to stib, guidaasilaa me to. ²¹Gbaa no me niina, ni ga cuëz me nieeda gal dze ne laa Dios blozh bnabey goc grëse ncuuaane none

gac, zigne bzeetse grë zha ne pxeel me padzeela, biadteed xtiidz me. ²²Zig nac Moisés bzeet me laa Jesús guiaad, rëb me lo grë pxoz gol ne: “Dios men ne rnabey ne, ible znabey me ne lo xtii to grieequia tib men ne gac zig nac naa lo to niina. Zeene laa me guiaad, golgon xtiidz me; ²³sac zha ne gond xtiidz me, ib tedsod znitlo zho.” ²⁴Scaque Samuel, ni grëraa zha ne biadteed xtiidz me, grëse zho bzeetle zho grë ncuane noyac len dze rii.

²⁵Grëse to, xmengol to nac grë zha co, ye to ga rëb Dios gunlay me zeene znu biaan me diidz grop me Abraham, rëb me: “Niapse por tib men ne grieequia lo xtii luu, laa naa gunlay grëse miech ne ndxie gdibdoose lo guidzliu.” ²⁶Ni niina ne laa Dios bleeban Jesús, gloque lo to pxeel me me, gunlay me to, zeena csaan to xquieintseeb to.

Güeyzo zho zho lo wxtis

4 Laa Pedr grop Juan bii noneeque lo grë miech co, zeene laa bla zha ne nac pxoz bdzin ga, bdzinnie zho tib zha non ne quianap yadoo co ni zla zha ne nacgrë zha saducé. ²⁻³Zigne bdzin zho bnaaz zho Pedr grop Juan, güeysëeb zho zho ladzguib; ni ne bdzele dzew, ga biaan zho dipse guieel co. Rlëë grë zha co, sacne laa Pedr grop Juan quianee lo grë miech co zha bleeban Dios Jesús; ni rnee zho grëse mengut, scaque grieeban zho.

⁴Niicle ne scataa rlëë grë zha rnabey co, per nzian zha ne ndxie ga bliladz Jesús; zig gaay mil rgaa loxaque zha bgui.

⁵Zeene biini liu co, grëse zha non, grëse zha ne rnabey lo menguedz, laa zho pcaalsa. ⁶Ga bdzin Anás men ne nac pxoz nroob ne rnabey, ga bdzin Caifás, bdzin Juan, bdzin Lejandr ni grë zha ne nac menlidz pxoz ne rnabey ga. ⁷Dzigo bnabey zho gocredz Pedr grop Juan, bzo zho zho glowtaa, bnabdiidz zho lo zho, rëb zho:

—Golnë nadien, zcho rnabey to, cho pxeel to ne squi no to?

⁸Hor co laa Espíritu Sant bdeed guielbiini lo Pedr, pquiab Pedr rëb Pedr lo zho:

—Grëse to ne nac to zha ne rnabey lo menguedz, grëse to ne nac to zha gol ne non xtiidz. ⁹Telne mine rlisqui to nac ne dien zha bdziuu no men rii ne laa ni me biac, ¹⁰golsguieel golquiaadiaga ganle, zeena gacnan tow ni gacnan grëragaa menguedza. Jesús gon, men Nazaret ne bnabey to gut lo cruz ga, men ne bleeban Dios ga, men co beenguiaac men rii; ni laa to rangaa me laa me zo lo ne nu. ¹¹Lëë Jesús ga raquiet lo Xtiidz Dios zaatne znu rnee: “Quie ne psëeb zha ne nozaa yu, ni nand zho lëepaa quie co nac mine rnazdziits yu.” Ni scapaa nagon bzhaac to me. ¹²Loxaque me zrielo csilaa ne lo xto ne, sac bzodraa Dios cho stib zha ne niaad lo guidzliu niaadsilaa miech.

¹³Zeene gon grë zha wxtis co, scataa peet dzeb nod lo Pedr grop Juan, bzee zdo zho; sac runbey zho Pedr, runbey zho Juan, nacd zho cho zha ne güey wseed nroob. Ga gon zho, pa lotaa guielbiini ne bgaa Pedr grop Juan ne bzënie zho Jesús.

¹⁴Peet brieelod nlisqui grë zha co, sac nligaa laa men ne biac ga zo lo zho ga.

¹⁵Dzigo mazd bnabey zho brie Pedr ley grop me Juan; laa zho biaan bzodiidz

zho dien zha gun zho zho, ¹⁶sac rien zho tib milagr nroob ga sca biac ni men co; niicle ne racladz zho yqueets zhow, per grële menguedz bina. ¹⁷Nacne biaan zho diidz, ctseb zho zho gbiiredraa zho cseed zho miech zhiwseed Jesús; zeena lozhd gacnan grëraa miech zha biac men co.

¹⁸Dzigo bredz zho Pedr stib, grop me Juan, goctox zho lo zho.

—Laa no rso diidz lo to gon —rëb zho—, gbiiredraa to cseed to miech zhiwseed men ne rnee to Jesús ga.

¹⁹Pquiab Pedr grop Juan, rëb zho:

—Zha dien rzac to, ¿pe nonguiela ga laa ne dziuun no mine rnabey Dios, lel mine rnee to i dziuun no? ²⁰Grieelod gon dziuun no mine rnee to i, sac grëse ncuaañe bdzion no, grëse ncuaañe bdzionгаа no, ib none gnee now, zeena gacnan grëse miecha.

²¹Dzigo wbiire grë zha rnabey co, ntseeb rac zho lo zho pso zho diidz csetraade zho miech; blozhse ga laa zho psilaa zho. Bdeetew diidz nsacsi zho zho, sac ndal miech ne rleyne Dios, rdeed zho xquizh lo me ne been me milagr ²²beenguiac me men co, ni choole iz rac sca gacd së me.

Bnab zho lo Dios

²³Zeene laa Pedr grop Juan bdziñ lo grë zha ne nacgrë zho, bzodiidz zho grëse tel zha rëb grë zha rnabey co, zha rëb pxoz non co. ²⁴Grë zha ne nacgrë zho ga, zeene bin zhow grëse zho psilo zho bnab zho lo Dios, rëb zho:

—Dios, luu nac men ro ne rnabey grëtaa ncuaañe no, luu bzaa gbaa, luu bzaa guidzliu, luu bzaa nisdoo, luu bzaa grëraa ncuaañe no. ²⁵Padzeela zeene bdeed Espíritu Sant guielbiini lo pxozgol no David, men ne been xtsiin luu hor co; znu bnee me:

¿Pe nacne squitaa rac grë miech ne nacd zha Israel rlëenie zho Dios?

Racladz zho gun zho ncuaañe ni grieelod lo zho.

²⁶Grëse zha non ne rnabey grë guiedz,

tipse rac zho laa zho ractseeb lo Dios rlëenie zho me,

ni rlëenie zho men ne bzooblo me pxeel me lo guidzliu.

²⁷Ni nligaa na scase goca. Guiedz Jerusalén nu, nu biaad rey Herod, biaad Pons Pilat, pcaalsa zho grë zho menladz no ni grë men zit, tipse bnediidz zho psacsi zho Jesús, men ndzon ne bzooblo luu pxeel luu biaadgun xtsiin luu lo guidzliu nu. ²⁸Grëse zigne psanle luu diidz, scase been zho. ²⁹Ni scaque niina, bui ganle zha racladz zho ctseb zho no parne peet gneedraa no; luu nac men ne gocniñ no ne nac no zha ne rdziuun xtsiin luu, zeena gdzieebd no cseed no miech xtiidz luu. ³⁰Laa no rnab lo luu, beenguiac grë men rzacñe, been grë milagr nroob, blu grë ncuaañe gzee zdoo miech; zeena gan zho ganle men nroob, men ndzon nac Xpëed luu Jesús.

³¹Zeene blozh bzodiidznie zho Dios, masaque bzhidz zaatne ndxie zho ga; hor co grëse zho laa zho bgaaraa guielbiini ne bdeed Espíritu Sant lo zho; peet rdziebdraa zho laa zho zieseed miech Xtiidz Dios.

³²Leñ dze co, grëse zha ne riladzle Jesús ga, tibaque nac zho, tibaque rnee zho, tibaque nac miñe zienie guic zho. Nod zha ne guiab lose zho yquiin ncuaañe rap zho; sinque grëse ncuaañe quianie zho cheñ grë zho naca. ³³Grë zha poxtl co, zeene rseed zho miech zha briebeban Jesús, nzian zha ne riladz me; rlupaa ne Dios nacnie zho.

³⁴⁻³⁵Ne nligaa tipse nac zho grë zho, nod zha ne guiab ne guiend pe yquiin, sac grëse zha ne quianie liu, zha ne quianie nzian yu, rto zhow dzigo rdeed zho dimi co rguiz grë zha poxtla lo zha ne rquiina. ³⁶Sca been tib men ne nacgrë zho lë José. (Zha xtii Leví nac me, gol me tib lo guidzliu win ne no lo nisdoo lë Chipr; zha poxtl-le bleelë me Bernabé. Bernabé, nac zig nac ne rnee ne: Zha ne rchoobladz zdoo miech.) ³⁷Pto me tib lë liun me, dzigo bdeed me dimi co lo zha poxtl, bdiiz zhow.

Znu bzhaac Ananí grop Safir

5 ¹⁻²Tib mgui lë Ananí, laa tsiel me lë Safir; ye me pto tib lë liun me. Gonlo tsiel me, tel palal dimi ne bdo liu co, bzhennga me zhisa. Zeene laa me ziesan miñe biaan ga lo poxtl, rëb me lëe grë dimi ne bdo liun me ga. ³Dzigo rëbchaa Pedr lo me:

—Ananí, ¿pe nacne bdeed luu diidz bzëëb mendox zdoo luu? Mendox i gon noquiil luu nan luu yquidiee luu Espíritu Sant, rnee luu lëe grë dimi ne bdo liun luu nu. ⁴Biën ganle cheñ luu liu co. Dimi ne bdiizh zhow, cheñ luuw, niac niun luuw zigne niaccladztaa luu, ¿pe nac dzigo ne racladz luu yquidiee luu? Gon ganle led nod noquidiee luu, Dios i gocladz luu nquidiee luu.

⁵Loxaque sca bin Ananí bnee Pedr, znuse biab Ananí liu, gagazh gut Ananí. Grëse miech ne bina, bdzieb zho. ⁶Dzigo güey bla zha nguieg pchel zho ngutoo co lar, blis zho me ga laa zho ziequeets me.

⁷Wdzeelaaque goca zeene laa tsiel me bdzin, ni lalnu güeynied guic me ne laa tsiel me gutle. ⁸Bnabdiidzaque Pedr lo me, rëb Pedr:

—Bnë dien, ¿pe nli lëe grë dimi ne bdo liun to nu?

Pquiab wnaa co, rëb me:

—Nliw, lalgui pto now.

⁹—¿Pa brieer pensar qui lo to grop tsiel to? —rëb Pedr—. Ne squi tipse bnee to nan to yquidie to Espíritu Sant; dol noob i gon been to lo Dios. Laa zha ne güeyqueets tsiel luu blansole ro yu nu, ni niina gon laa zho güeyaque luu.

¹⁰Diidz co blozh brieer ro Pedr, znuse biab wnaa co liu, guchedraa me ga. Zeene laa gza zha nguieg co bzëëb len yu, laa me nixle ga; gon zho gutle me, dzigo blis zho me güey zho güeyqueets zho me cue xpaat tsiel me. ¹¹Grëse zha ne gon sca goc men co grop me, zha ne bingaaw, zigtaa zha ne riladz Jesúsaa zigtagaa grëraa miecha, per nli bdzieb zho.

¹²Grë zha poxtl co, tibaque rcaalsa zho tib lo nsaap ne quia cho yadoo ga rnee zho zhiNsaap Salomón; nzian grë milagr ne rdeed Dios diidz run zho. ¹³Grëse miech ne rcaalsa ga, rleynie zho grë zha poxtl co, nzian zho riladz miñe rseed zho, per rbigd zho gacgrë zho zho.

¹⁴Zigse zie dze, scase racndalraa miech ne rzëëb xnëz Jesús, nguisaque wnaasaque laa zho rililadz me dib zdoo zho. ¹⁵Zhoob diidz scataa milagr ne run grë zha poxtl co. Dzigo psilo miech rbee zho grë men rzacnë, rguix zho me ro nëz, no me zhoobse lo xlon me, no me zhoob lo yag ne ney zho me; rquiambëz zho maase zhimlëse Pedr guiab lad grë men co zeene laa Pedr ted. ¹⁶Haxta grë guiedz win ne ndxie gax Jerusalén ga, rriee grë miech rdziinne zho grë men rzacnë, no grë men co noguitnie mendox; grëse zho runguiac zha poxtl co zho.

Bio grë zha poxtl ladzguiib

¹⁷Zeene gon men ne nac pxoz nroob ne rnabey, ni grë zha saducé, scataa racnie miech grë zha poxtl co, per nli blëë zho, ¹⁸bnabey zho bgaa zho psëëb zho zho ladzguiib stib. ¹⁹Pcow liu co, guieela bdziñ tib xanjl Dios pxal me ro ladzguiib, blee me zho ga; dzigo rëb me lo zho:

²⁰—Goltsie len yadoo, grëse miech ne ndxie ga golnee lo zho, zeena gacnan zho zha yгаа zho guielmban ndzon ne nodeed Dios niina.

²¹Biinigazh liu, silgaw laa zho bdziñle len yadoo; psilo zho laa zho noseed grëse miech ne ndxie ga.

Laga laa zho noseed miech len yadoo, laa men ne nac pxoz nroob ga, grë me zha ne nacie me, bnabey zho ycaalsa zha ne nac wxtis ni grë zha non lo menguedz.

Zeene laa grë zha co pcaalsa, dzigo pxeel zho zha ne ziebee grë zha poxtl co ladzguiib. ²²Bdziñ zho ro ladzguiib, ni tib choot guiend leen co; rzhitsaque wbire zho güeynie zho diidz, ²³rëb zho:

—iChoot guiend len ladzguiib! Dziits niooga bdziñ no, ga zo zha ne quianap; per zeene bzhial ro ladzguiib bziaab no, bdzion no choot guiend leen co.

²⁴Grë pxoz ne rnabey, ni men ne zo lo menguiib ne rquianap yadoo, zeene bin zhow, rdziendraa zho zha gun zho. ²⁵Lëëtaque sca no zho, zeene bdziñ tib zho rëb:

—Zha ne gon bloo to ladzguiib ga, laa zho nolaque len yadoo noseed zho miech.

²⁶Lëëled brieen men ne zo lo grë menguiib ne rquianap yadoo, brieenie me bla xaguiib me, güey zho niapse wen diidz güeyxi zho zha poxtl co len yadoo; sac rdzieb zho ngoquie grë miech co zho. ²⁷Zeene bdziinne zho zho lo grë zha wxtis co, dzigo rëb men ne nac pxoz nroob ga lo zho:

²⁸—iPe nacne ronde to diidz? Led pso no diidz lo to csetraade to miech zhiwseed mgui ne nac Jesús ga. Ni na gon dible lad guiedz nu nozhoobnen zhiwseed to i, haxta rcaadzdoj to no ne no bdziuut me.

²⁹Dzigo pquiab Pedr rëb Pedr:

—Rdzion no mine rnabey samiech no, per glo none dziuun no mine rnabey Dios no. ³⁰Men co bliladz grë pxozgol ne, ni men co gon bleeban Jesús, men ne sca psacsi to beet to lo cruz. ³¹Ni meque zeynie Jesús gbaa, bzoob me Jesús cue me nëz derech; sac Jesús nac men ne rnabey, men ne rsilaa miech lo dol.

Ni Jesús gon, gdeed guielbiini lo grèse men Israel gbiire gbig zho lo Dios stib; zeena gunquizhd me zho xtol zho.

³² Mine rnee no lo to nu diidzliw, nozhal bdziona, ni led loxaque nodsegaa; sinque ye Espiritu Sant men ne rxeel Dios racnien grè zha ne ron xtiidz me, ye men co quianee ganle ne nliw.

³³ Zeene bin zho sca rëb Pedr, blëeye zho, rzac zho tebaa gagazh gut zho gza zha poxtl co.

³⁴ Lad zha wxtis co no tib zha farisé lë Gamaliel, ye me rseed miech Xley Dios, tib zha non nac me lo menguietz; dzigo guso me bnabey me briece grè zha poxtl co nëz ley, ³⁵ bnee me lo grëraa zha ne ndxie ga, rëb me:

—Grèse to menguietz, laa naa rso diidz lo to, golcobey gon dien pe gun to zha qui. Golguien ganle, nonguielda ne lega mine gacladztaa to gun to zho.

³⁶ Golsoladz ganle, padzeela squi bio tib men ne brieelë Teudas, rëb me laa me niac tib zha ne nabey, ndal zha ne wbig lo me, goclo zho zig tap gayoo. Ni pasë me nabey, zeene laa me gut nëzrii nëzrec bliaa grè zha ne gocnie me ga. ³⁷ Laa len iz ne nodop lë miech, scaque briequia tib men Galilé brieelë Judas. Ndal zha ne gocnie me, per zeene laa me gut scasaque nëzrii, nëzrec bliaa grè zha ne gocnie me; brieelodaque pe niun me. ³⁸ Gane nagon rne naa lo to, mazd peet gunde to zha qui, golsaan zho squise golsilaa zho. Tsow glu telne guicse miech biab wseed ne ziaadnie zho i, dzizin dze ne nitlow. ³⁹ Laa telne nligaa Dios rsiab guic zho squi rseed zho miech, niacxe zlëb to gnitlo to wseed ne ziaadnie zho. ¡Telne guiab to gnitlo tow, nande to nend Dios ga tilnie to!

⁴⁰ Grèse zha wxtis co bzoobdiag zho xtiidz Gamaliel, bien zho ne scataa nonguiel gaca. Dzigo biire bredz zho grè zha poxtl co, bdiin zho zho, ni biire pso zho diidz lo zho gbiiredraa zho cseed zho miech zhiwseed Jesús. Blozhse ga, dzigo laa zho psilaa zho.

⁴¹ Zeene laa zho wbi ga, rley zho por grëtaa mine pteed grè zha non co zho loxaque ne rliladz zho Jesús. ⁴² Ib psaand zho zhiwseed Jesús, gzobse dze rie zho yadoo ni rieque zho stib yu stib yu, rnee zho lo miech ne nli lëe Men ne zëëble diidz cxeel Dios lo guidzliu ga nac Jesús.

Bzo gadz zha ne gun xyudar poxtl

6 Ni ne len dze co quiayac nzianraa miech ne rzëëb xnëz Jesús, dzigo psilo grè zha Gres rlisqui zho, rnee zho rdioond grè wnaa viud ne nac zha ladz zho zaacse; zeene rgaaz ncuaañe row zho, rgaad zho lal mine rgaaz grè wnaa viud ne nac zha Israel.

² Dzigo nacre bredz gza tsiipchop poxtl co grèse zha ne nole xnëz Jesús ga, bnee zho lo zho rëb zho:

—Gacnan to ganle, grieelodraa ne noque so dzian no dien zha ygaaz ncuaañe yquiin to, sac gon nonguielda csaan no mine nac xtsiin no, ib none guioseedraa no miech Xtiidz Dios. ³ Min co nagon, mazd golzo gadz zha bgui ne gun dziin co, lëëraasi golguien cho gzo to; golguib zha ne ndzinli, zha ne nixbiini, zha

ne nacie Espíritu Sant; ⁴zeena sca guiob lo no gzodiidznie no Dios, gnab no lo me, ni cseed no grëraa miech Xtiidz me.

⁵Grëse zho rëb, wen sca gaca. Hor cogazh psilo zho ble zho zha ne so guñ dziin co. Bzo zho tib meñ lë Lip, tib meñ lë Prócoro, tib meñ lë Nicanor, tib meñ lë Timon, tib meñ lë Parmen, tib meñ lë Xteb, rlupaa dib zdoo me rliladz me Dios ni nacie Espíritu Sant me; ni tib meñ Antioquí lë Nic, mazd glo Nic goc tib zha ne bleyniedox grë zhiwseed zha Israel. ⁶Dzigo güeynie zho gza zha co lo zha ne nac poxtl. Blozhse bñab poxtl lo Dios gacnieñ me zho, dzigo pxobnia poxtl guic zho, bñab zho lo Dios gdeed me guiełbiini lo zho.

⁷Zigse zie dze, laa Xtiidz Dios quiagaazraa dib Jerusalén. Nzian grë zha ne rzëëb xnëz Jesús, haxta grë meñ ne nac pxoz, nzian zho laa zho bliladz me dib zdoo zho.

Bnaaz zho Xteb

⁸Goc palal dzew, nzian grë milagr nroob ne run Xteb, sac tibaque sca dib zdoo me rliladz me Jesús, ni nacie Espíritu Sant me.

⁹Laa tib dze, briequia bla zha ne rie tib xyadoo win zha Israel, lë “Esclavos Libertados” gocladz zho ndiıdiidznie zho Xteb. Brieque zla zha Israel ne ziaad nëz Ciren, nëz Alejandrı, nëz Cilis, ni nëz Asia, ye zho gocgza zha co rlëë zho lo Xteb. ¹⁰Gonse zho rlëbd xtiidz zho lo Xteb, sac niapse Espíritu Sant rdeed guiełbiini lo me, rien me pe rnee me lo zho; ¹¹dzigo bdiizh zho bla zha ne ptsieets diidz, pquidie zho rëb zho bin zho laa Xteb noneenë Moisés ni rneenë me Dios.

¹²Zeene bin menguienza, blëë zho; nacie bñabeyaque zha ne rnabey lo menguienza bgaa Xteb güeyzo zho me lo wxtis. ¹³Ni güeynie zho bla zha ne lega bnexuu, rëb zho:

—Nliw, rtsidił mgui qui xyadoo ne, rtsidił me xley ne. ¹⁴Bdzionpaa no gon quianee me laa Jesús meñ Nazaret ne quiazeet zho dib i ctsił yadoo rii, ni ctsëë me ley ne psan Moisés lo xmengol ne.

¹⁵Hor co zeene laa grë zha wxtis co ni grëraa zha ne ndxie ga bui lo Xteb, gon zho tib biini nroob ne riab lo me, masaque rlu me zig rlu tib xanjł Dios.

7 Dzigo bñabdiidz meñ ne nac pxoz nroob ga lo Xteb, rëb me:

—¿Bnë dien pe nli quiayun luu grë ncuane rnee zho i?

²—Grëse to ne nac to menladz naa —rëb Xteb—, laa naa rzaac to zig bets naa, zig pxozgaa naa. Golsiguieł golquiaadiag chop tson lan diidz ne gne naa lo to nu ganle: Padzeela, zeene bii no pxozgol ne Abraham dan ne lë Mesopotam, briequia Dios ndzon ne no gbaa lo me, rëb Dios ³griece me ga, csan me grë menlidz me, tsie me nëz ne glutaa Dios lo me.

⁴Nacie briece me xtan zha Caldé ga, bey me nëz Harán, ga wban me zhis. Laa zeene laa pxoz me gut, dzigo laa Dios biaadnie me nëz rii, zaatne mban ne nu niina. ⁵Niicle ne laa me blanso lo liu rii, ni tib lë win zaatne so ni me bdeete Dios lo me; per rëb Dios ib grë zha xpëed me guiaanniew. ¿Ni laa me quianied mëed len dze co! ⁶Rëbgazh Dios lo me, ib zieban grë zha xpëed

me ga ladz beṅ dipse leṅ tap gayoo iz, ga csacsi miech zho guncuṅ zho zho dziin. ⁷“Per ib tedsod sacsi naa zha ne csacsi zho ga”, rëb Dios, “ni ga greece zho glanso zho nu, nu goolnie zho naa.”

⁸Ni parne glu ib zac mine bnee Dios lo Abraham ga, dzigo psan me diidz grëse mëëdbgui ne grieequia lo xtii Abraham none tso tib bey lad zho. Min co nagon, zeene laa xpëëd me Isaac goc xon ngbidz, laa me bloo Isaac bey co. Scaque been Isaac xpëëd me Jacob, ni scaque been Jacob gza tsiipchop zha ne goc xpëëd Jacob; lëë gza tsiipchop zha co nagon goc pxozgol ne.

⁹Ziese pxozgol ne ga, blëënie zho bets zho zha ne lë José, pto zho José lo men ne zie wto nëz Egipt. Ni ne nacie Dios José, ¹⁰psilaa me José lo grëtaa guielne ne bded José, ni gocnieṅ me José beenbey rey Egipt José. Ib psaand me José, bdeed me guielbiini lo José. Zeene gon rey co scataa men nixbiini nac José, dzigo bnabey me bzo José goc me tib men non ne bnabey dipse Egipt; haxta grë ncuuan non ne no lidz rey, me bnabeya. ¹¹Lëëtaque leṅ iz ne nac me dziin, biaad tib gbin; dipse xtan zha Egipt, dipse xtan zha Canaán mban bded miech. Grë zha ne goc pxozgol ne ga, guieṅdraa pe gow zho. ¹²Laa zeene bin Jacob laa zhobxtil bii no Egipt, dzigo pxeel me zho güeyxi zho zhob ga.

¹³Zeene goc chop vuilt ziexi zho zhob Egipt, dzigoraa gocnan zho bets zho ga rnabey Egipt; niiclegaa rey cow, hor coraa beenbey me bets José. ¹⁴Dzigo bnabey José güeyxi zho pxoz me Canaán, güeyxi zho tsiel zho, güeyxi zho xpëëd zho. Lo grë zho rgaa zho tsongaṅ tsiin, laa zho bdzin Egipt.

¹⁵⁻¹⁶Sca nacie laa Jacob bey Egipt. Ga gut me, dzigo güeyqueets zho me Siquem, tib leṅ baa ne bzhii Abraham lo Hamor; scaque grë xpëëd me zha ne goc pxozgol ne ga, ga gut zho. ¹⁷Grë zha ne brieequia lo xtii zha gol co, zha ne na guiab ne nac menladz ne, ndal iz ne bio zho Egipt ga, ni ndaloo goc zho. Laa zeene ziaadyob cuee Dios zho ga zigne rëble me lo Abraham glo, ¹⁸laa men ne nac rey Egipt leṅ dze co, psilo ptsidil zho; sac rsoladzdraa me grëtaa dziin ne been José lo menladz me. ¹⁹Psacsi me zho, been me zho zigne gocladztaa me, haxta bnabey me grëse mëëdbgui ne ral gandraa zho win parne guet win.

²⁰Leṅ dze copaa nagon gol Moisés, tib mëëd niow nac win. Tson mëë bloolan xniaa win win, ²¹laa zeene brieelodraa ngolan me win, dzigo güeysan me win tib ro guiabee Egipt, ga bdziel tib xindzoo rey win. Wnaa co gon win, biaan win lo me zig tib xpëëd me; ²²haxta bioxco me grëse wseed ne rac zha Egipt, pseed win. Zeene laa win broob, tib men nixbiini goc win, niicle ne gnee wina, niicle ncuane gungaa wina.

²³Choo iz rap Moisés, zeene biab guic me güeyted me lo menladz me. ²⁴Dzigo gon me laa tib zha Egipt quiaguin tib zha Israel; nacie bzëëbaque me bla me zho, beet me zha Egipt co.

²⁵Sca been Moisés, nan me niēṅ grë zha Israel ne Dios bzo me gacnie me zho, csilaa Dios zho ladznia zha Egipt; per biēṅ zho ne scaw. ²⁶Biini liu co, gon me laa chop zha Israel nodil, zie me nla me lo xtil zho, bnee me lo zho nonguiēḍ ga til zho, guieṅ zho ganle menladzaque zho. ²⁷Dzigo biasaque

tib zha ne noquiaaw ga pcheep zho me, ntseeb rac zho rëb zho lo me: “¿Cho bzo luu guiaadnabey luu no, guiaadlisquigaa luu dien pe nodziuuñ no? ²⁸ ¿Te racladz luu ye gutaque luu no zigne beet luu zha Egipt co nieeg?”

²⁹’Zeene bin Moisés sca rëb zha co, hor co bzhoon me bey me nëz xtan zha Madián. Nëz co ptsieelnia me, ga gop tseeel me chop mëëdbgui.

³⁰’Choo iz goc no me nëz xtan zha Madián, tib dze no me cho gui Sinaí, tibaque zeene gon me laa tib anjl zo groltaa tib lo yag zarz, masaque rso bel lo yag co. ³¹Bzee zdoo me, lëëtaque laa me zie gbiggax me, zeene bin me tsi Dios rëb Dios lo me: ³²“Naa nac Dios ne bliladz pxozgol luu Abraham, pxozgol luu Isaac, pxozgol luu Jacob.”

’Zeene bin Moisés tsi Dios, per nli bdzieb me; lo dzeb co per ni blisdraa me lo me nwi me. ³³Dzigo bnee Dios stib, rëb me lo me: “Blit lab luu, sac gax lo naa i zo luu. ³⁴Laa dze nagon bdziñ ne laa naa csilaa grë zha Israel ladznia zha Egipt; sac ran naa zha nactaa grë guielñe ne noded zho ga, ron naa blactaa roon zho nosacsi zha co zho. Ni luu bzooblo naa tsiebee zho ga.”

³⁵’Dzigo laa Dios pxeel Moisés ziesilaa me zha Israel; niicle ne glo rëb zho lo me: “¿Cho bzo luu guiaadnabey luu no, guiaadlisquigaa luu dien pe nodziuuñ no?” Per me bzo Dios bnabey lo zho, blee me zho Egipt.

³⁶’Nzian grë milagr, nzian grë ncuane nroob ne gzee zdoo ne been Moisés blee me zho ga; zigtaa len guiedz Egiptow, zigtaa lo Nisdoo Nizhniew, zigtagaa grë dan bidz ne bio zho dipse len choo iz ne bzënie me zho ga.

³⁷’Moisés ga bzeet lo pxozgol ne, ne laa Dios gnabey lo xtiique zho grieequia tib men ne cxeel me guiadteed xtiidz me, zigne pxeel me Moisés.

³⁸’Zeene nonie Moisés zho grë dan bidz co, Anjl ne bnee lo me guic gui Sinaí, me pteed xtiidz Anjl co lo zho; me pcaania ley ne biaan lo ne ga, diidz ne rap guielmban. ³⁹Per ib bind zho xtiidz me, lel gocladz zho mbiire ney zho Egipt stib, ⁴⁰bnabey zho Aarón rëb zho: “Bzaa tib mdio tedner lo no gacnien no laa no guioo Egipt stib; sac loxaque biadbee Moisés no ga, na choot nand dien yo Moisés.”

⁴¹’Dzigo bzaa zho tib ngon yeen goc zhimdio zho, haxta beet zho grë ma ne bloogon zho lo mdio co; bleynie zho ncuane bzaania zho. ⁴²Nacne wbinladz Dios, psaan me zho; psilo zho bleynie zho grë ncuane ran zho zhan gbaa. Been zho zigne bzeetse zha ne biadteed xtiidz me padzeela, zeene rëb zho:

Golsoladz ganle,

laa ne nleynie to naa dipse len choo iz ne bio to grë dan bidz co,

laa ne nuit to ma ne ngogon to lo naa,

⁴³lel grë mdio ne bzaa to, mdio co bleynie to, lo mdio co pquitsgzhib to.

Mdio ne rnee to Moloc,

zaatne zieetaa to tibaque ney to lidza,

zhmel mdio ne rnee to Renfán, pa csaan to ma.

Mincocxe waa, laa naa cuee to ladz to,

gzonëz naa to guey to grë dan ne riaan zitraa lo guiedz Babiloin.

⁴⁴Leñ dze ne sca bio pxozgol ne grë dan bidz co, tib yu larse goc xyadoo zho, ga biotsow quie ne quia xley Dios. Dioszhal blu lo Moisés zha tsaa yu co. ⁴⁵Goc bla iza, zeene blozh bñitlo Dios grë guiedz ne brin nu glo, laa Josué blansonieque yu co. Haxta leñ dze ne goc David rey, bii lëw nac xyadoo zho.

⁴⁶David goc tib rey ne gocziuu lo Dios, bleyne Dios me, dzigo gocladz me nzaa me tib yadoo nroob zaatne mbëzlo zho Dios. ⁴⁷Per brielod nzaa mew, Salomónraa goc rey ne bzaaw. ⁴⁸Nli laa yadoo co biala, per tel Dios, men nroob nac me, led yed me cuëz leñ grë yu ne rzaa miech. ⁴⁹Zigne zhubneeque lo Xtiidz me, zeene znu rëb me:

Gbaa nac zaatne zoob naa,

laa lo guidzliu nac zaatne rzo ni naa.

¿Zha nadien nac yu ne nan to gzaa to cuëz naa?

¿Pa nadien guiab to gzaa to zaatne gdziiladz naa?

⁵⁰¿Niacxe led naad bzaa gbaa?, ¿niacxe led naad bzaa guidzliu?

⁵¹Golgota sca ganle —rëb Xteb—, zigne beenaque grë pxozgol to ga padzeela, scadaaque gon quiayun to niina. Miech nad, miech ntseeb zdoonac to; ib ronde to mine rnee Espiritu Sant. ⁵²Tel pxozgol to, nëlte gondze zho grë zha ne pxeel Dios biadnee xtiidz me; haxta beet zho grë zha ne bzeet ne laa Dios cxeel tib men peet xtold ne bzooblo me guiaad lo guidzliu. Ni niina ne laa Dios pxeel men co, scasaque been to, ptsidil to me, bnabey to bgaa me beet to me. ⁵³Tibaque squi quia to quiaguiits to Xley Dios; xanjlpaa me biaadsana lo to, ni runde to mine rnabeya.

Beet zho Xteb

⁵⁴Zeene bin zho sca rëb Xteb, blëeye zho haxta rowye ro zho rwi zho lo me.

⁵⁵Laa me, ne nacie Espiritu Sant me, zeene blis lo me bui me nëz gbaa, gon me lo guielndzon ne no Dios, gonpaa me laa Jesús zo cue Dios nëz derech.

⁵⁶Dzigo bnee me, rëb me:

—Ranpaa naa niina gon nzhialse gbaa, laa men ne pxeel Dios biaad lo guidzliu ga, laa me zo cue Dios.

⁵⁷Mine been zho ptse zho diag zho, ni nguiedz roptsie zho parne gondraa zho pe rnee me; laa zho wbigbe bnaaz zho me, güeynie zho me tib lad ro guiedz.

⁵⁸Zha ne goc textigw ga, blee zho lar ne mbix zho, bdziin zhow tib lo mgui nguieg lë Saul, mgui co pquianapa; laa zho psilo bdeedquie me.

⁵⁹Sca nodeedquie zho me, laa me rnab lo Dios rnee me:

—Jesús, luu ne nac luu men ne rnabey, luu pcaania zhiespíritu naa.

⁶⁰Dzigo pquitsgzhib me, ni pquiaa me stib redz nroob bnab me lo Dios, rëb me:

—Dios, luu ne nac luu men ne rnabey, dol ne quiayun miech rii, laa naa rnab lo luu gunquizhd luu zhow.

Loxaque blozh sca bnee me, laa me gut. Ye mgui ne lë Saul ga, bdeed diidz sca beet zho me.

8 ¹⁻²Dzigo pcaalsase bla zha bgui ne noxco rleynie Dios, güey zho güeyqueets zho Xteb; mban rac zho, bio zho xquielñe me.

Leñ dze co, psilo zha ne sca rlëënie zha ne rililadz Jesús, ptsidil zho grëse zha ne rililadz me; dipse leñ guiedz Jerusalén pquianañ zho zho. Grëse zho bzhoon, zha ne zie grëraa guiedz ne ndxie nëz Judé ga, zha ne zieegaa nëz Samar; loxaque zha ne nacse poxtl biaan Jerusalén. ³Ntseeb rac zha ne lë Saul ga, rzac me tebaa zha gnitlogazh me grëse zha ne rililadz Jesús. Stib yu stib yu zie me, riebezhoo me zho lidz zho, mgui wnaasaque rey me riesëëb me zho ladzguiib.

Bdziñ Xtiidz Jesús nëz Samar

⁴Laa grë zha ne bzhoon Jerusalén ga, zaatne zieetaa zho rnee zho Xtiidz Jesús lo miech. ⁵Zig nac Lip, zeene bdziñ me tib guiedz nëz Samar, psilo me bnee me Xtiidz Jesús lo grë miech co. ⁶Ndal zho rquiaadiag mine rnee me, rzee zdoo zho ran zho grëtaa milagr ne run me. ⁷Ndal grë zha ne noguitnie mendox, riac zho, rquiaadan grë mendox co redz zeene laa ma rzhoon; grë zha ne gutoo, grë zha ne nde ni, runguiac me zho. ⁸Grëse miech ne no guiedz co, rley zho.

⁹⁻¹¹Ga no tib men ne rool diidz dox, lë Simón. Ye me rzee zdoo miech grë ncuane run me. Nzianle iz sca noquidie me zho, grëse menguedz runbey me, haxta niats rac me rnee me guiendraa cho zig me. Grëse zho, haxta grë zha non rbig lo me, rzac zho lëë poder ne rap Dios ga nacnie me.

¹²Laa zeene bnee Lip lo grë miech co gocnan zho diidz ndzon ne nac Xtiidz Dios, bin zho zha racladz Dios gban zho, bin zho cho nac Jesús; grëse zha ne bliladza, mgui wnaasaque, laa zho brobnis. ¹³Dzigo yeque men ne lë Simón ga bliladz Jesús, ye me laa me brobnis; zaatne zieetaa Lip nañ me zhits Lip, rzee zdoo me ran me grëtaa milagr nroob ne run Dios.

¹⁴Grë zha poxtl ne no Jerusalén, zeene gocnan zho scataa ndal zha Samar nocaania zhiwseed Jesús, dzigo pxeel zho Pedr grop Juan zie nëz co. ¹⁵Laa zho zie gnab zho lo Dios yгаа grë zha ne bliladzle Jesús ga guielbiini chen Espíritu Sant; ¹⁶sac zeene bliladz zho Jesús, loxaque brobnisse zho, gard yгаа zho guielbiini co. ¹⁷Bdziñ zho pxobnia zho guic grë men co, bnaab zho lo Dios; dzigo grëse men co laa me bgaa guielbiini ne rdeed Espíritu Sant.

¹⁸Zeene gon men ne lë Simón ga, ne loxaque rxobniase zha poxtl co guic grë miech co laa zho rgaa guielbiini ne rdeed Espíritu Sant, dzigo laa me rdeed dimi, ¹⁹rëb me:

—Golneedz poder qui lo naa; zeena ye naa zha ne cxobniataa naa guic yгаа zho guielbiini ne rdeed Espíritu Sant.

²⁰Pquiab Pedr rëb Pedr lo me:

—¡Bien ganle pe rnee luu! ¿Pa bin luu ye xpoder Dios zac si miech? ¡Tebaa niinagazh nitlo luu grë xtimi luu i! ²¹Ni lalnu rieguiald luu gun luu dziin rii, ni gdzindгаа dze gun luuw; sac mbed zdoo luu, zienied guic luu gun luu mine rnabey Dios. ²²Blee zhgab yozh qui guic luu, bnaab lo Dios zeena togo

squia zdo me luu, guñquizhd me luu dol ne squi bza zdo luu i; ²³sac rlu niapse guieIntseeb nonie guic luu, ni lëëque luu gon nosacsi luu ne squitaa nouyñctal luu xtol luu.

²⁴Pquiabse me rëb me:

—Golgun guieInzaac, golnab lo Dios yquia zdo me naa, zeena ygaad naa grë guieInë dox ne rnee to i.

²⁵Blozhse bzodiidznie Juan grë miech co grop me Pedr, blozhse pseed zho zho Xtiidz Dios, laa zho wbire zey zho Jerusalén stib. Guiedz ne rdedtaa zho dib xtan zha Samar ga, rnee zho Xtiidz Dios lo grë miech co.

Bzodiidznie Lip tib men Etiopí

²⁶Laa Lip no Samar ga, tib dze brieequia tib xanjl Dios lo Lip, rëb me tsie Lip nëz ne rriee Jerusalén zie nëz Gaza.

²⁷Dzigo güey Lip nëz co. Tib dan ngana, lëëtaque laa tib men ne nac dziin lo rein ne lë Candás zie ga, dziin nroob nac me lo rein co, sac me ngotsow grëtaa dimi ne no Etiopí. ²⁸Zobse me tib len carret nroob zie me ga; znu wbirele me Jerusalén güeygan me Dios. Laa me zob leen co quialab me lo Xtiidz Dios mine pquiaa Isá, men ne biadteed xtiidz Dios padzeela.

²⁹Dzigo bnabey Espíritu Sant Lip tsie Lip yгаа carret co lo Lip. ³⁰Zeene bgaa carret co lo Lip, bin Lip pa lo nolab men co; nacne rëbchaa Lip lo me: —¿Pe rien luu cho raquiet zaatne nolab luu i?

³¹—Riend naaw —rëb me—, rquiin tib zha ne gnë lo naa dien zha naca.

Dzigo bredz me Lip biep Lip len carret co, güeysob Lip cue me.

³²Znu rnee zaatne nolab me ga:

Zigne racse mëcwxiiil yeen zeene rnaaz zho ma rut zho ma, scadaa ndooladz goc me,

peet beend me zeene laa zho zienie me.

Ni zigne roptsied ma zeene rtsiib zho ma,

scaque ni tib diidz ptsired me lo zho.

³³Niicle ne gon zho scataa ndooladz me,

per psacsi zho me.

¡Pa lotaa bdziñ guieIntseeb ne been grë menladz me!

Sac gon, ptiche zho xquielmban me lo guidzliu.

³⁴Dzigo rëbchaa men co lo Lip:

—Bzhiguiel bnë lo naa dien, cho nu znu rzeet Isá lo rii. ¿Pe me bded min rii, te stib zhow ye?

³⁵Dzigo rëb Lip lo me Jesús raquiet ga, ni bnee Lip grëraa mine nac zhiwseed Jesús. ³⁶Laa zho no nëz, tibaque zeene bdziñ zho tib lugar co no nis; rëbchaa me lo Lip:

—¡Bui ganle laa nis no nu! Mazd bzhiguiel pchoobnisgagh naa.

³⁷[—Zaca —rëb Lip—, totsaque dib zdo luu rliladz luu Jesús.

—Rliladz naa me —rëb men co—, rliladz naa ne nli Xpëed Dios nac me.]

³⁸Dzigo bnabey me blëz carret co ga. Biet me leen co grop me Lip bzëeb zho lo nis co, ga pchoobnis Lip me. ³⁹Blozhse ga, laa Espíritu Sant blis Lip gondraa me Lip; per rley me laa me bio nëz stib, laa me zie.

⁴⁰Zeene laa Lip brieequia, laa Lip nole guiedz ne lë Azot. Ga psilo me zigse zie me, guiedz ne rdedtaa me rnee me Xtiidz Dios lo grë miech co. Sca bio me nëz, haxta bdziñ me guiedz Cesarea.

Gon Saul Jesús

9 Laa mgui ne lë Saul ga, per nli ntseeb rac me, tibaque ne laa guic me zienie gut me grëse zha ne riladz Jesús. Güey me lo men ne nac pxoz nroob, ²bdeed pxoz co ti xtiidz me guey lo grë zha ne zo lo xyadoo zho nëz Damasc, parne gacnie zho Saul gnaaz zho grëse zha ne riladz Jesús; zha ne ygaataa niicle mguiw niicle wnaaw, gzobdoo zho zho tsiesan zho ladzguuib Jerusalén.

³Laa Saul bio nëz, laa Saul zie. Zhile gdziñ me guiedz Damasc, tibaque zeene brieequia ti biinidoo zhan gbaa biab zaatne zie me ga. Groltaa lo biinidoo co biaan me, biabgazh me liu. ⁴Liu nix me, bin me zëeb ti tsi men co rnee lo me: —Saul, Saul, ¿pe nacne quiana! luu naa?

⁵—Been guielnzaac —rëb me—, bnë dien cho luu.

Dzigo pquiab men co, rëb me:

—Naa nac Jesús men ne squi quiatsidil luu. [Lëëque luu gon nosacsi luu i, rzac luu zigne rzac ngon ne rcaanni, ni lëëque lo guuib lots ne rtseb zho ma riecaanni ma.

⁶Rdzieb Saul, rzhidz me lo dzeb co rëb me:

—Bzhiguiel bnë dien, ¿pe racladz luu gun naa niina?]

Rëbchaa Jesús lo me:

—Guche i, güey Damasc, ga gnë zho ganle pe nac mine no gun luu.

⁷Zha ne ziegza Saul ga per nli bdzieb zho, haxta ni gacdraa gnee zho; loxaque tsi men co ron zho zëeb, per choot rand zho.

⁸Laa Saul guche ga. Zeene laa me pxal lo me gwi me randraa me, ¡laa lo me pcowle! Zha ne ziegzale me ga bzhen nia me bdziñ me Damasc. ⁹Tson dze sca brielod nian me, gzase dze co dowd me, niicle peet god me.

¹⁰Guiedz Damasc ga, ga no ti mgui ne riladz Jesús lë Ananí; dzigo gon me Jesús, bredz Jesús me. Pquiab me, ¹¹dzigo rëbchaa Jesús lo me:

—Güey nëz ne lë Derech, zaatne nac lidz ti mgui lë Judas; ga bnabdiidz men Tars ne lë Saul. Zeene quiazodiidznie me naa, ¹²blu naa lo me laa tib zha lë Ananí bdziñ rxobnia guic me, zeena gbiire gan me stib.

¹³Pquiab Ananí rëb Ananí:

—¿Saul ye? Ziyon naa name zha nac grëtaa ncuane noyun me Jerusalén, notsidil me grë zha ne riladz luu. ¹⁴Haxta pxoz nroob ne rnabey bdeed diidzbez gnaaz me grëse zha ne no nëz rii.

¹⁵—Güey —rëb Jesús lo Ananí—, sac laa naa bzooblöle me, ib me tsie grë guiedz zit tsieseed me miech xtidz naa, me gneew lo grë zha rnabey, ni lo

grëga zha Israel. ¹⁶Na naa glu lo me ganle zha nac grë guielnë ne gan me, zeene laa me quiayunle xtsin naa.

¹⁷Dzigoraa güey Ananí zaatne no Saul ga. Bdziñ me, pxobnia me guic Saul, rëb me lo Saul:

—Saul, bina ganle bets, laa Jesús gon, men ne rnabey, men ne brieequia lo luu zeene ziaad luu nëz ga, laa me pxeel naa zial naa nu; zeena gnab naa lo me gunguiac me bziaalo luu, ni ycaania luu guielbiini ne rneedz Espíritu Sant.

¹⁸Zigne sca bnee Ananí, laa lo Saul biacgazh; lega zigne nac xmed mel nac grë ncuaan co brie lo me. Hor cogazh laa me brobnis. ¹⁹Blozh ga laa me dow stib, zhiga zhiga laa me wbiere pcaa fuerz.

Goc bla dze no Saul lo grë zha ne riladz Jesús Damasc ga, dzigo brie me ²⁰güey me grë yadoo win ne no ga, rnee me lo grë miech co cho nac Jesús, rnee me lo zho ne nli Xpëed Dios nac Jesús.

²¹Rzee zdoo grëse miech co ran zho sca rnee me, rneehaa zho:

—¿Led lëe men qui ga name scataa ntseeb rac Jerusalén, notsidil me grë zha ne riladz Jesús? Conque nac diidz min co ziaad me nu, ziadnaaz me zho tsiesan me zho lo grë pxoz ne rnabey.

²²Per zigse zie dze, mazdraa rac Saul tibaque ne rnee me lo grë miech co, lëe men ne zëëble diidz cxeel Dios lo guidzliu ga, nac Jesús. Grë zha Israel ne no ga, riendraa zho dien pe gliladz zho.

²³Goc bla dze no me ga, laa grë zha Israel ne no ga blëe lo me; bnediizd zho rëb zho laa zho gut me. ²⁴Dze guieel riesobnap zho gzaase zaatne rap biedz nroob ne ndze igo guiedz co nëz, riequiambëz zho ted me, gut zho me. Per gocnan mew, ²⁵nacne gol ti pcow liu pcaalsa grë zha ne bliladz mine bnee me, bloo zho me ti len chicuid nroob, bzoob zho doow dzigo blit zho me cho biedz nroob ne sca ndze igo guiedz co. Sca bdeeda diidz brie me ga.

Bdziñ Saul Jerusalén

²⁶Zeene bdziñ Saul Jerusalén gocladz me ndziñ me lo grë zha ne riladz Jesús ga, per lel bdzieb zho zeene gon zho me, sac riladzd zho ne nli yele me bzëëb xnëz Jesús. ²⁷Dzigo güeynie Bernabé me lo grë zha ne nac poxtl, bzodiidz Bernabé lo zho zha gon me Jesús zeene no me nëz zie me Damasc, zha rëb Jesús lo me; ni zha bdziebd me bnee me lo grë miech cho nac Jesús, len dze ne blëz me Damasc. ²⁸Dzigoraa pcaania zho me. Laa zho gocgza me, zaatne zietaa zho zieseed zho miech, ib rdziebd me rnee me cho nac Jesús.

²⁹Brieequia bla zha Israel ne rnee xtiidz zha Gres bdiidznie zho me. Zhisaque goca, laa zho gocladz niut zho me. ³⁰Zeene gocnan grë zha ne riladz Jesús gaw, dzigo güeyan zho me guiedz Cesarea; ga brie me laa me zie nëz Tars, zaatne nac ladz me.

³¹Len dze co, grëse miech ne no xnëz Jesús, zigtaa zha ne no Judé, zha ne no Galilé, zha ne nogaa Samar, nguieel rac zho peet lo guielxtseeb nodraa zho; zigse zie dze rioguiacraa zho zha nac Xtiidz Dios. Grëse zho rioxco zho

mban zho zigne rnabey me, tibaque nacnie Espíritu Sant zho. Ni scagaa, zigse zie dze ndal grë miech ne rzëëbraa rcaania Xtiidz Dios.

Rieted Pedr lo grë zha ne riladz Jesús

³²Len ngbidz coque, zie ziaad Pedr rieted me lo grëse zha ne riladz Jesús. Nacne güeyted me lo grë zha ne no Lida. ³³Guiedz co, beenbey me ti mgui lë Ené, gogle xon iz nix mgui co, ib gacd së me sac dipse me gutoo. ³⁴Dzigo rëbchaa Pedr lo me:

—jEné, niinagazh gon laa Jesús gunguiac luu! Na zeen guche i blis xta luu.

Zigne sca bnee Pedr laa men co biac, laa me guche ga. ³⁵Grëse men Lida, grëse men Sarón zeene gon zho sca biac men co, grëse zho bliladz Jesús.

³⁶Gaxaque Lida riaan ti guiedz lë Jop. Jop ga no ti wnaa ne riladz Jesús, lë Tabit (laa xtiidz zha Gres rnee zho me Dorc). Nquialadz me miech, grë zha ne guiend pe yquii, run me xyudar zho. ³⁷Lega nacle blanguidz me, laa me gut.

Zha ne riladz Jesús ga, laa zho noxco dien zha ygueets me. Bgaz zho me, blozhse ga güeyxob zho me sti len yu ne riaan nëz glaa. Xco co no zho, ³⁸zeene bin zho laa Pedr no Lida. Pxeelaque zho chop zha bgui zienie diidz lo Pedr tsieniob Pedr Jop.

³⁹Zigne bdzinnie zha co diidz, zienalgazh Pedr zhits zho. Bdziñ zho lidz men co, zolinëz güeynie zho Pedr zaatne zhoob me. Nzian grë wnaa viud ndxie ga, wbigbe zho lo Pedr, roon zho rlu zho grë lar ne bdib me. ⁴⁰Dzigo bnabey Pedr brieë zho ley grëse zho, laa me biaan ga, pquitsgzhib me bnab me lo Dios. Blozhse ga wbig me lo ngutoo co, bnee me lo me rëb me:

—Guche i, Tabit.

Zigne sca rëb Pedr laa lo ngutoo co bzhial, zeene gon me laa Pedr zo ga, laa me bzobli. ⁴¹Bzhen Pedr nia me, bliso Pedr me, dzigo bredz Pedr grë zha ne riladz Jesús ga, ni grë wnaa viud co; gon zho laa me brieëbanle.

⁴²Dipse lad guiedz co bzhoob diidz sca brieëban wnaa co; grë zha ne bina, ndal zho bliladz Jesús dib zdoo zho.

⁴³Nzianlaa dze biaan Pedr ga, blëz me lidz Simón ti men ne rcuudz grë guid ma.

Güeyzodiidznie Pedr Cornel

10 Guiedz Cesarea, ga no ti men lë Cornel, rnabey me lo ti partid menguiib lë partid Italian. ²Zigtaa mew, zigtaa grë menlidz mew, dib zdoo zho riladz zho Dios, noxco zho mban zho zigne racladz Dios. Tibaque nozodiidznie zho Dios, ni nroob ncuaañe rgad zho lo grë zha ne guiend pe yquii.

³Tib dze, bdzele dzew tibaque zeene gon me laa ti xanjl Dios bdziñ zaatne zo me, bredzlë anjl co me. ⁴Dze rwi me lo anjl co, rdzieb me laa me pquiab. Dzigo rëbchaa anjl co lo me:

—Gocnan ganle grëse mine rnab luu lo Dios ron mew, ni ran me grëtaa yudar ne squi quiaayun luu lo grë zha ne guiend pe yquii. ⁵Gacxe waa, laa naa zialnie diidz lo luu, pxeel bla zha ne tsie guiedz Jop tsixi zho ti men ne

lè Simón Pedr. ⁶Gax zaatne nac ro nisdo, ga no ti men̄ lèque Simón, rcuudz me grè guid ma, lidz men̄ co ga rbèz me; ga tsieguiib zho me.

⁷Zeene laa anjl co zey, dzigo bredz me chop zha ne quia dziin lidz me, ni bredz me ti zhaguiib ne nacgrè zhaguiib ne zopaa gax lo me; dib zdoo zhaguiib co rililadz zho Dios. ⁸Blozhse bzodiidz me lo gza zha co zha bzhaac me, dzigo laa me pxeel̄ zho ziexi zho Pedr Jop.

⁹⁻¹⁰Biini liu, zig rwe ngbidza gaxle Jop zie zho. Lèëtaque hor co laa Pedr biepe nēz glaa guic yu ne rbèz me ga. Rcaabedz me, dzigo laga noyacro ncuuaane gow me laa me biepe guic yu co ziezodiidznie me Dios. ¹¹Dios nozodiidznie me, tibaque zeene gon̄ me laa ti lar nroob ziad-zèëb zhan gbaa, nzhidoo gza tap nēza laaw bdziñ lo me. ¹²Grè lose ma no lo lar co, ga no ma ne rzè gza tap ni, no grè ma ne rzè zigne rzè meel̄, ni no grè ma ne rsiibe. ¹³Hor co bin me ti tsi men̄ co, rēb lo me:

—Pedr, ma ne racladztaa luu gow luu zac gut luu ma.

¹⁴Pquiab me rēb me:

—¡Min̄ cogaa nagon̄ grieelod! Wlaltaa gard gow naa grè ma beed qui.

¹⁵Rēbchaa men̄ co lo Pedr:

—Grè ncuuaane beenlayle Dios, nodne gnee luuw ncuuaan̄ beed.

¹⁶Blulo lar co tib, bluloquew stib, laa zeene biontaa gon̄ mew dzigo laaw biire bzoquia nēz gbaa.

¹⁷Lèëtaque laa Pedr no zhgab dien̄ pe nacne sca gon̄ me lar co, laa zha ne pxeel̄ Cornel ga bdziñ ro yu ne rbèz me ga, ¹⁸rñabdiidz zho me.

¹⁹Zhgap co no Pedr, zeene rēb Espiritu Sant lo Pedr:

—Laa tson̄ zha bgui gon̄ ziaadguib luu. ²⁰Biet, bnee lo zho. Ib peet tsienied guic luu, güeynal̄ zhits zho, sac naa bnabey ziaad-xi zho luu.

²¹Dzigo laa Pedr biet ga, bdziñ me lo zha ne pxeel̄ Cornel ga, rēb me lo zho:

—Naa nac Simón Pedr. ¿Pe nac mandad ne ziaad to?

²²Pquiab zho rēb zho:

—Laa no ziaad xmandad Cornel, ti men̄ ne rñabey lo menguiib Cesarea. Laa me pxeel̄ no ziaad-xi no luu, sac ti xanj̄l Dios rēb lo me cxeel̄ me zha ne guiaad-xi luu tsie luu lidz me, tsienee luu lo me. Ti miech wen nac me, dib zdoo me rililadz me Dios, grèse zha Israel rleynie zho me.

²³Dzigo bredz Pedr zho bded zho nēz len̄ yu; ga biaan̄ zho wdze co. Biiniraa liu zienie zho me, ye palal zha Jop, zha ne rililadz Jesús zienal̄ zhits me.

²⁴Dze ne rac chop ngbidz briece zho Jop, laa zho bdziñ Cesarea. Laa Cornel bredzle grè men̄lidz me, grè zha ne ndzieeldiiz me; ndal nac zha ne ndxienie me lidz me, quiambèz me Pedr. ²⁵Zeene laa Pedr bdziñ, briece me güeydzieelo me Pedr, pquitsgzhib me lo Pedr nan̄ me niun̄ me Pedr zigne riegān̄ me Dios.

²⁶Dzigo bliso Pedr me, rēb Pedr lo me:

—¡Guso i, nodne yquitsgzhib luu lo naa! Bien̄ gan̄le samiechaque luu nac naa.

²⁷Dzigo laa menguiib co guso ga. Nozodiidz zho laa zho bzèëb len̄ yu. Zeene bdziñ zho zaatne ndxie grè miech co, ²⁸psilo Pedr bnee me lo zho, rēb me:

—Nanle to ganle zha Israel naa, ni ib lo xley no rnabey nodne ziaab no lidz grē zha zit, per ni ctsieelsad no zho; per laa niina laa Dios blu lo naa, grēse miech ne beenlayle me nod pe nacne gbix zdoo naa gan naa zho. ²⁹Gacxe waa, zigne gocnan naa laa to rbedz naa, zialnalgazh naa zhits zha ne pxeel to. Nana sca, golinē dien pe nacne bredz to naa.

³⁰Dzigo bzodiidz Cornel zha bzhaac me, rēb me:

—Nadze rac tap ngbidz ga, zig znaw gon, no naa lidz naa nu nocuan naa, ni nozodiidznie naa Dios. Tibaque zeene gon naa laa ti mgui zole lo naa, masaque riaazbel xab me, ³¹nē me: “Gocnan ganle grēse mine r nab luu lo Dios ron mew, ni ran me grētaa yudar ne squi quiayun luu lo grē zha ne guieṇd pe yquiin. ³²Gacxe waa, laa naa zialnie diidz lo luu, pxeel bla zha ne tsie guiedz Jop tsixi zho ti men ne lē Simón Pedr. Gax zaatne nac ro nisdoo, ga no ti men lēque Simón, rcuudz me grē guid ma, lidz men co ga rbēz me; ga tsieguib zho me.”

³³Sca nagon nē men co lo naa, nacne bnabey naa biaad-xi zho luu; ni xquizhga luu ne laa luu ziaad. Dios zobwi ganle, grēse no laa no ndxie nu par yquiaadiag no mine bnabey me luu gnē luu lo no.

³⁴Dzigo rēbchaa Pedr:

—iNaraa rien naa, led yed Dios cue miech dien cho nac zha Israel, cho nacga zha zit! ³⁵Sinque grēse miech lo guidzliu, tel pa guiedztaa nac zho, rcaania me zho totsaque ron zho mine rnabey me, ni rioxco zho zaacse rban zho.

³⁶⁻³⁷Rgobey naa ziyonle to Diidz Ndzon ne pxeel Dios lo menladz naa niina wriin. Lo Diidz Ndzon co rnee, ne zac guiaanwen miech lo Dios, totsaque gliladz zho cho nac Jesús, men ne zēēble diidz ga cxeel me (ni Jesús gon bzaa grētaa ncuane no). Zig nac dib Judé, desde ne psilo Juan pseed me miech Galilé, laa zho gocnana. ³⁸Ni nanaxe to ganle, bdeed Dios poder lo Jesús, pxeel me Espíritu Sant gocnie Jesús. Zaatne bdedtaa Jesús, pquia zdoo me miech, grē zha ne nosacsi mendox psilaa me zho ladzna ma; sacne nli Dios nacie me.

³⁹No ne nac no zha ne bzianie me, grop lo no bdzian no grētaa milagr ne been me, zigtaa Jerusaléna zigtagaa dib Judéw. Jerusalénpaa ga beet zho me pquiaa zho me lo cruz, ⁴⁰per zeene goc tson ngbidza laa Dios bleeban me, ni bneedz Dios diidz biire bdzian no me. ⁴¹Led grēdraa miech gon me, loxaque nose bdzian me; sac ib Dios bzooblo no dzian no grē dziin ne been me. Haxta bdioownie no me, bdionie no me, ⁴²ni pxeel me no gnee no lo miech gacnan zho ganle laa Dios bzo me, me gun guielwxtis gal dze ne laa Dios cuedz grēse miech, zigtaa zha guta zigtagaa zha mbana. ⁴³Me ga bzeet grē zha ne biadteed Xtiidz Dios lo miech padzeela, zeene rnee zho: “Grēse zha ne gliladz cho nac me, silaa Dios zho lo dol.”

⁴⁴Laa Pedr bii quianeeque, zeene laa grē zha ne noquiaadiag ga bgaa guielbini ne bdeed Espíritu Sant lo zho. ⁴⁵⁻⁴⁶Grē zha Israel ne ziegza Pedr ga, zeene gon zho laa grē zha co psilo quianee stib diidz, ni rdeed zho xquizh lo Dios, bzee zdoo zho gon zho ye grē men zit rgaa guielbini ne rdeed Espíritu Sant. ⁴⁷Dzigo rēbchaa Pedr:

—¿Peraa nadien gbiaaz ne, ne choobnisgazhd ne zha rii? Laa ne bdzianle ganle zigne rdeed Espíritu Sant guielbiini lo zha Israel, scaque bdeed me guielbiini lo zho.

⁴⁸Dzigo bnabey Pedr brobnis zho, laa zho bzëeb xnëz Jesús.

Blozh ga bnee Cornel lo Pedr cuëz me ga ti bla dze.

Bzodiidz Pedr zha güey me lidz Cornel

11 Grë zha poxtl ne no Jerusalén, ni grëraa zha ne riladzle Jesús zha ne no Judé, bin zho sca bliladz gza men zit co Xtiidz Dios. ²Dzigo zeene laa Pedr bdziñ Jerusalén güey bla zho güeytilidiidznie zho Pedr, ³blisqui zho lo Pedr pe nacne güey Pedr lidz men zit, pe nacne güeytownie Pedr zho.

⁴Dzigo psilo Pedr bzodiidz me lo zho zha nacne güey me lidz men co, rëb me:

⁵—Guiedz Jop no naa, tib dze lëëtaque nozodiidznie naa Dios, tibaque zeene gon naa laa ti lar nroob ziad-zëeb zhan gbaa, nzhidoo gza tap squina laaw ziaad nëz lo naa. ⁶Zeene bdixlo naa bui naa dien pe quia lo lar co, gon naa niapse ma no lo co, grë ma ntseeb, grë ma ne rzë gza tap ni, grë ma ne rzë zig rzë meel, ni grë ma ne rsiibe. ⁷Lo grë ma co nowi naa, zeene bin naa ti tsi men co, në lo naa: “Pedr, ma ne racladztaa luu gow luu, zac gut luu ma.” ⁸Dzigo pquiab naa rep naa: “Min cogaa nagon grielod, waltaa gard gow naa grë ma beed qui.” ⁹Nëchaa me lo naa: “Grë ncuaañ beenlayle Dios, nodne gnee luuw ncuaañ beed.”

¹⁰Tson vuelt sca gon naa lar co. Blulow tib, bluloquew stib, zeene biontaa gon naaw dzigo laaw biire zey gbaa.

¹¹Loxaque blozh gon naa lar co, laa tson zha bgui blanso ro lidz men ne blëz naa ga, pxeel men Cesarea co zho ziaadguib zho naa. ¹²Ni laa Espíritu Sant bneeque lo naa, no ganal naa zhits zho, niicle ne zha zit nac zho; nacne bianal naa. Ye gza xoop zha ne zialnie naa nu bzë bio no.

¹³Bdziñ no lidz men co, psilo me bzodiidz me lo no zha bzhaac me, në me len yu no me, zeene gon me ti xanjl Dios, rëb anjl co lo me cxeel me bla zha ne tsie Jop tsixi zho naa, ¹⁴zeena gane naa lo me zha grielo csilaa Dios me lo dol grë menlidz me.

¹⁵Laa naa psilo quiane lo me grë menlidz me, zeene grëse zho laa zho pcaania Espíritu Sant, ni bgaa zho grë guielbiini ne rdeed me zigne bgaaque new. ¹⁶Ga nagon psoladz naa xtiidz Jesús men ne rnabey ne, zeene znu në me lo ne: “Nli nisse pchoobnis Juan miech, sangue to zgaa to guielbiini ne rneedz Espíritu Sant.” ¹⁷Sca nagon pcaania zho Espíritu Sant, laa zho bgaa guielbiini ne rdeed me zigne bgaaque new. ¿Cho nac naa nadien ne glisqui naa mine run Dios?

¹⁸Zeene blozh bin zho grë mine bnee Pedr ga, peet rëbdraa zho. Psilo zho rleynie zho Dios, rdeed zho xquizh lo me; sac hor coraa bien zho ye grë men

zit zrieelo gbig zho lo Dios, gdeed me ti guieḽmban ndzon ne gdziṅd dze lozh lo zho.

Bliladz zha Antioquí Xtiidz Dios

¹⁹Zeene sca pquianaḽ zho grē zha ne rliladz Jesús len̄ dze ne beet zho Xteb ga, nēzrii nēzrec bliaaḽ zho. No zho bdziṅ nēz Fenicia, no zho bdziṅ haxta nēz Chipr, nogaa zho bdziṅ Antioquí. Zaatne bdziṅtaa zho bnee zho cho nac Jesús, per loxaque lo grē meṅladz zho bnee zhow. ²⁰Niicle ne scaw, lēēque grē zha Israel ne no nēz Chipr, zha ne no Ciren, zeene laa zho bliladz Jesús güey zho guiedz Antioquí, bnee zho lo grē zha zit co cho nac Jesús. ²¹Ni ne nacie Dios zho, ndal grē miech co bzēēb xnēz Jesús.

²²Grē zha ne no Jerusalén, zeene gocnaṅ zhow pxeēlaque zho Bernabé güey Antioquí. ²³Zeene bdziṅ Bernabé Antioquí, rley me gon̄ me scataa quiayunlay Dios grē miech co; dzigo pso me diidz lo zho ib csaand zho zhiwseed Jesús.

²⁴Ti meṅ dib zdoo rliladz Dios nac Bernabé, nacie Espíritu Sant me, ti miech wen nac me; gane zeene laa me bdziṅ ga nzianraa zha ne bliladz Jesús.

²⁵Goc palal dzew, dzigo güey Bernabé guiedz Tars güeyxi me Saul, bdziṅnie me Saul Antioquí. ²⁶Dipse ti len̄ iz blēz zho ga grop zho, blozh pseed zho grē zha ne bliladz Jesús. Ga gloopaa psilo ne laa grē zha ne rliladz Jesús brieelē CRISTIAN.

²⁷Len̄ iz co blalaa zha ne noteed xtiidz Dios no Jerusalén. Dzigo brieē zho ga güey zho Antioquí. ²⁸Lad co no tib meṅ lē Agab, psiaab Espíritu Sant guic me bnee me laa ti gbin dox gaṅ miech nēz Israel. (Ni nligaa scase goca, lēē gbin co biaad len̄ iz ne zobnabey meṅ ne lē Claud.)

²⁹Grē zha ne rliladz Jesús Antioquí, zeene bin zho sca rēb Agab, nacie bnediidz zho grē zho, teḽ palaltaa ncuane rgaa lo zho tib tib zho gdeed zhow ga clo ti gon cxeel̄ zho lo zha Judé. ³⁰Dzigo ptop zho gon co, zeene laaw goclo, pxeel̄ zho Bernabé grop Saul güeysana lo grē zha rnabey ne zo lo zha ne rliladz Jesús nēz Judé.

Bio Pedr ladzguiib

12 Len̄ dze co psilo rey Herod notsidiḽ me grē zha ne rliladz Jesús. ²Bnabey me bgaa Jacob bets Juan, beet zho Jacob lo spad.

³Zeene gon̄ Herod rley grē zha ne rnabey lo meṅguiedz Israel ran̄ zho zha rsacsi me grē zha ne no xnēz Jesús ga, dzigo bnabeyaque me bgaa Pedr bio Pedr ladzguiib; lēētaque len̄ dze co noyac lni Pascw. ⁴Laa Pedr no ladzguiib, bnabey me bzo xon nēz meṅguiib quianap Pedr. Quiambēz me tedse lni co, laa me cuee Pedr gaṅ grē meṅguiedz zha csacsi me Pedr.

⁵Grē zha ne rliladz Jesús, zeene gocnaṅ zho scataa ndxienap meṅguiib Pedr no Pedr ladzguiib, psilo zho tibaque quianab zho lo Dios gacnieṅ me Pedr.

⁶Nacle diidz pa dze cuee Herod Pedr. Wdze ne guiini liu co, laa Pedr nixguesse len̄ ladzguiib; tib ga caden zob ti nia me, tibga meṅguiib tib nēz cue me, ni zhaaque zo zla zha ne quianap ro ladzguiib. ⁷Tibaque zeene biab

ti biinidoo len ladzguiib, laa ti xanjl Dios bdziñ ga. Bdziñ me, pcaannia me cue Pedr, pcaaan me Pedr, rëb me:

—¡Na zeen guche i!

Zigne sca bnee anjl co, lega zhal caden ne zob nia Pedr ga bzhiala brieew nia Pedr; ⁸dzigo rëbchaa anjl co lo Pedr:

—¡Pxidoo len luu, pquiaa lab luu ni luu!

Blozhse pxidoo Pedr len Pedr, ni pquia lab Pedr; rëbchaa anjl co:

—¡Wbix xab luu na, zeen dënal zhits naa!

⁹Nãse Pedr zhits anjl co laa Pedr brieew ga. Riend Pedr ne nli nosilaa anjl co Pedr, masaque rzac me nonixquieel mew. ¹⁰Bded zho chop len yu zaatne ndxie menguiib ne quianap, laa zho bdziñ zaatne quia puert guib ne rrieew nëz. Zigne bdziñ zho, zhal puert co bzhiala; laa zho brieew. Bzënie anjl co Pedr spalal, zeene gol zho zaatne rdedlsa nëz co, dzigo laa anjl co psan Pedr ga.

¹¹Dzigoraa bien Pedr led nonixquieeld Pedr, nli Dios pxeel xanjl me güeysilaa Pedr ladznia Herod, zeena gleyd zha Israel nian zho grë guielnë ne nded Pedr.

¹²Dzigo laa Pedr zie nëz lidz Marí, xniaa Juan Marcw; lëëtaque hor co nzian zho ndxie ga quianab zho lo Dios. ¹³Zeene bdziñ Pedr pcaannia Pedr ro yu. Brieew ti ndzoop ne quia dziin ga lë Rode, zieso ndzoop dien chow.

¹⁴Zeene beenbey ndzoop co tsi Pedr, rley ndzoop. Lo guielbley co niicle pxaldaque ndzoop ro yu, rias ndzoop zienie ndzoop diidz lo grë zha ne ndxie ga; rëb ndzoop laa Pedr bdziñ ro yu ga. ¹⁵Per bliladzd zhow.

—¡Dieen pe rool luu! —rëb zho—. ¡Ncuaane gliladzd ne rnee luu!

—¡Coo, nli lëë mew! —rnee ndzoop—, laa me zo ga.

—¡Led meda, —rnee zho—, bod anjl ne quianap mew!

¹⁶Sca no zho, laa Pedr bii nocaannia ro yu. Zeene güey zho pxal zho ro yu, bzee zdoo zho gon zho nli Pedra, laa Pedr zo ga. ¹⁷Dzigo blunia Pedr lo zho gnee nguiedzd zho; laa zho bzëëbnie Pedr len yu. Ga psilo Pedr bzodiidz Pedr lo zho zha güeybee xanjl Dios Pedr len ladzguiib; ni pso Pedr diidz lo zho sodiidz zhow lo Jacob, ni lo grëraa zha ne nacgrë zho. Blozhse ga, laa Pedr brieew ga.

¹⁸Zeene biini liu, grë menguiib ne pquianap Pedr len ladzguiib ga, rdziieldraa zho zha gun zho; sac ib biend zho dien yo Pedr. ¹⁹Zeene laa Herod pxeel zha ne ziebee Pedr ladzguiib, pa sële Pedr. Dzigo güey zho güeynie zho diidz lo Herod; nacne bnabey Herod gocredz grë zha ne pquianap Pedr ga, pquiep Herod zho; blozhse ga, bnabey Herod gut zho gzase zho. Bded ga, laa Herod brieew Judë zey me Cesarea.

Dow mziog Herod

²⁰Len dze co, pcaalsa menguiidz Tir ni menguiidz Sidón güeynee zho lo Herod; sacne rlëënie Herod zho. Lëëque ti men ne nac dziin lo Herod lë Blast güeynie zho bnee lo Herod, bnab zho tilniedraa me zho, niicle zhagaaw laa zho gbig lo me; sac grëse ncuaane rquiin zho, grë guiedz ne rnabey me ga rrieew.

²¹Dzigo bzo Herod ti dze ne tsie zho tsiezodiidznie zho me. Zeene goḷ dze co, got me lar niazh ne racw rey; bdziṅ me bzob me lo zhixcan me, psilo me bnee me lo grē miech co. ²²Goc palo quianee me, psilo zho rleynie zho me, nguiedz roptsie zho rnee zho:

—¡Led miechdraa i gon! ¡Ti diosle i nac meṅ qui quianee lo ne!

²³Laa me bii quianeeque, zeene biet tib xanjḷ Dios bdiṅ me, psilo dow mziog me, gagazh gut me. Sca gut me, sac beenbeyd me ne Dios nac meṅ ne non, meṅ ne rnabey. ²⁴Laa Xtiidz Dios, zigse zie dze laaw quiagaazraa lo miech; ndal zha cub ne nozëëb xnëz me.

²⁵Jerusalén ga no Bernabé grop Saul leṅ dze co; zeene bialse xtsiṅ zho, laa zho brieque ga laa zho zie nëz Antioquí zienie zho Juan Marcw.

Psilo Pabl güeyseed me miech zit

13 Lo grē zha ne riladz Jesús Antioquí, nzian zha ne noteed Xtiidz Dios, nzian zha ne rseed miech Xtiidz Dios no lo zho. Lad grē zha co no Bernabé, no ti mgui lë Simón ne rnee zho “Men Yaas”, no ti meṅ Ciren lë Lus, gaque no Saul, ni ti meṅ lë Manaén, bets pchoob Herod.

²Laa ti dze lëëtaque ndxie zho noyoolnie zho Dios ni nocuan zho, zeene laa Espiritu Sant bnee lo zho, rëb me:

—Golcueextso Bernabé i grop Saul, zeena csilo zho lo dziin ne gded naa guṅ zho.

³Blozhse pcuan zho, blozhse bzodiidznie zho Dios, dzigo pxobnia zho guic Bernabé grop Saul, bnab zho lo Dios gacniṅ me zho; bnee zho lo zho, laa zho zie.

⁴Ga brie Bernabé grop Saul zienie Espiritu Sant zho bdziṅ zho guiedz Seleucia, Seleucia bzëëb zho barcw laa zho zie nëz Chipr (ti guidzliu win ne no lo nisdoo). ⁵Ye Juan Marcw zienie zho guṅ xyudar zho.

Bdziṅ zho ro guidzliu win co zaatne ndxie guiedz Salamin, biet zho barcw güey zho grē leṅ xyadoo meṅ Israel ne no ga, güeyseed zho miech Xtiidz Dios. ⁶Ga brie zho güeyted zho dipse lo guidzliu co bdziṅ zho guiedz Pafos; guiedz ne bdedtaa zho bnee zho Xtiidz Dios lo miech. Pafos, ga beenbey zho ti meṅ Israel lë Barjesús (laa xtiidz zha Gres rnee zho me Elim). Rquidie me rnee me xtiidz Dios noteed me lo miech, per diidz dox rooḷ me.

⁷Guiedz co ga no ti meṅ lë Sergio Paul, meṅ co zob rnabey guidzliu co; dzigo lo meṅ co ga no Barjesús. Ti meṅ nixbiini nac meṅ ne lë Sergio ga, no me liaadz gacnan me zha nac Xtiidz Dios; dzigo bnabey me gocredz Bernabé grop Saul. ⁸Zeene bdziṅ zho psilo Barjesús quiaguib me dien pe yquiaaqui yquiaadiagd meṅ rnabey co Xtiidz Dios.

⁹Dzigo buitipaque Pabl lo Barjesús (Pabl nac sti lë Saul), ni ne nacie Espiritu Sant Pabl ¹⁰rëb Pabl lo me:

—¡Biche nu zhin menḍox! Zhin menḍox gon nac luu, squitaa noquidiee luu miech, notsidil luu diidzli. ¿Zha rna dze ne csaan luu miṅe nac luu i, squi

notsidil luu Xtiidz Dios? ¹¹ Gon ganle, jlaa Dios csiaabzi luu, niinagazh laa lo luu ycow, ni spalal xbiini ngbidz gandraa luu!

Zigne sca rëb Pabl laa lo men co pcow, nëzrii nëzrec zie me racladz me dien cho gnaaz nia me.

¹² Zeene gon men rnabey co sca pcow lo Barjesús, hor co bliladz me Xtiidz Dios, bzee zdoos me gon me scataa poder ne ziaadnie zhiwseed Dios.

Bdziñ zho guiedz Antioquí

¹³ Bded ga, laa Pabl gza Bernabé ni Juan bzëëb barcw stib, laa zho zie nëz xtan zha Panfil. Bdziñ zho guiedz Perg laa zho brieen len barcw, ga ptso Juan lo zho, laa Juan zey nëz Jerusalén; ¹⁴ laa zho bio nëz zie zho nëz xtan zha Pisid, bdziñ zho sti guiedz lë Antioquí.

Zeene gol dze ne rdziiladz miech lo dziin, güey zho xyadoo zha Israel. ¹⁵ Blozhse bded zha ne blab lo guits ne pquiaa Moisés, ni blab zho mine pquiaa grëraa zha ne biadteed xtiidz Dios padzeela, dzigo laa men ne rnabey yadoo co bnee lo Pabl grop Bernabé, rëb me lo zho:

—Tejne racladz to gnee to chop lan xtiidz to, zac gnee tow niina.

¹⁶ Dzigo guso Pabl, blunia me lo grë zha ne ndxie ga cuedze zho, rëb me lo zho:

—Grëse to ne ndxie to nu, zigtaa tow ne nac to menladz naa, zigtaa togaaw ne nac to zha stib guiedz zha ne noxco gban zigne rnabey Dios; golquiaadiag chop lan xtidz naa ganle gne naa lo to:

¹⁷ Dios ne riladz no nac no men Israel, ib me bzooblo grë pxozgol no laa zho bgab lo me. Me gocniën zho zeene bio zho ladz men Egipt, ni me güeysilaa zho ga, blu me ganle ne nli men nroob nac me. ¹⁸ Dipse len choo iz ne bio zho grë dan bidz ne bded zho ga, pxcw me grëtaa xquieñtseeb zho. ¹⁹ Blozh ga, bnitlo me gadz guiedz nroob ne ndxie xtan zha Canaán, bdeed me liu co lo zho.

²⁰ Dipse len tap gayoo grol iz, Dios bzooblo grë zha ne bzo bnabey lo zho; lëë lultm zha ne bzo me ga bnabey lo zho goc profet Samuel. ²¹ Blozh ga, laa zho bnaab so ti rey gnabey lo zho, nacne bzo me Saúl, bzob Saúl choo iz goc me zhirey zho. Lëë pxoz Saúl ga brieelë Cis, men ne ziaad lo xtii pxozgol no Benjamín. ²² Zeene laa Dios ptiche dziin co lo Saúl, dzigo bzo me David goc rey. Lëë David ga rzeet Dios zaatne znu rnee: “Rleynie naa xingan Isaí zha ne lë David, laa naa gonle ib zun David mine gnabey naa.” ²³ Ni lo xtii David co nagon brieequia Jesús, men ne pxeel Dios lo guidzliu biaadsilaa miech lo dol, zigne psanle me diidz lo xmenbol no padzeela.

²⁴ Len dze ne merle xoobnen cho nac Jesús, len dze co bnee Juan Bautist lo grë men Israel csaan zho xquieñtseeb zho, gnab zho perdon lo Dios, zeena chobnis zho. ²⁵ Laa zeene zhile gdziñ dze ne gut zho Juan, dzigo bnee me lo miech rëb me: “Golgacnan ganle, led naad nac men ne quiambëz to ga cxeel Dios. Merle gunbey to me, ti men non nac me, per ni par gac naa ti ngundziin win ne glit lab me ni me raguald naa.”

²⁶ Gulgacnan sca ganle bets: zigtaa tow ne ziaad to lo xtii Abraham, zigtagaa tow ne nac to miech stib guiedz zha ne riladzle Dios, ib laa Dios pxeel Jesús

csilaa me ne lo xtoꞓ ne grëse ne. ²⁷Grë zha Jerusalén ni grë zha ne rnabey lo zho, ib biend zho cho nac Jesús, niicle ne scataa gzobse dze ne rdziiladz zho lo dziin, rlab zho lo grë guits ne pquiaa zha ne biadteed xtiidz Dios padzeela; haxta bñab zho gut me zigne bneese grë zha co. ²⁸Niicle ne gonꞓ zho peet xtoꞓd me, niicle ne brieequiad doꞓ ne pquiaqui zho me, per bguib zho bdeeda diidz bnabey Pilat gut me.

²⁹Blozhse psacsi zho me, pteed zho me grëse zigne bzeetle grë zha ne biadteed xtiidz Dios ga, dzigo güey zha ne blit me lo cruz, güeyqueets zho me.

³⁰Per bleeban Dios me. ³¹Grë zha ne güeynaꞓ zhits me zeene brieë me Galilé bñziñ me Jerusalén, nzian zho gonꞓ me; ni niina grëse zho laa zho quianee lo miech ganle cho nac me.

³²'Scaquegaa no grop no Bernabé, laa no ziaadnie diidz lo to gacnañ to ganle niina ne laa Dios bleeban Jesús, laa me been minë bnee me lo pxozgol ne padzeela. ³³Lëë Jesús ga raquiet lo Salm brop, zaatne rnee: "Xpëed naa nac luu. Desde nadze laa zho gunbey ne Xpëed naa nac luu."

³⁴'Bzeetle Dios ne laa me cueeban Jesús, bzeetle Dios xind xcuerp me len baa; min co ga raquiet lo Xtiidz me, zaatne rnee: "Zunlay naa luu, zigne bnese naa lo David gun naa." ³⁵Laa stib lo Salm ne pquiaa David rnee: "Gdeete luu diidz xin xcuerp naa len baa." ³⁶Rlu led Davite raquiet ga, sac zeene bza dze ne goc me dziin lo menladz me laa me gut, ni zaatne pqueets zho me, ga bñitlo xcuerp me. ³⁷Led meda, zhaa men ne raquiet ga; gacxe na rneew waa peet gacd xcuerp men co, zbeeban Dios me.

³⁸⁻³⁹'jGrëse to bets, golgacnañ sca ganle! jJesús nac men ne rsilaa miech lo doꞓ! Zha ne gliladztaa me dib zdoo zho, tel pe nactaa grë xtoꞓ zho, sanmbe me zho. Minë waltaa brieelod ngaa to, niicle ne zienal to xley Moisés; sac niicle gun tow grëse zigne naca, csanmbeda to lo doꞓ.

⁴⁰'jGolguien sca gacnroladzde to! Zeena ygaade to minë bzeet zha ne biadteed xtiidz Dios padzeela, zeene znu bnee zho:

⁴¹Grëse to ne rzhidznie to minë nac diidzli,

bii zañ to ganle laa naa gun ti milagr nroob ne gzee zdoo to;

per znitlo to, sac gliladzde tow niicle guiaad zha ne gzodiidza lo to.

⁴²Blozh bnee Pabl; laa zeene laa Pabl gree ga grop Pabl Bernabé bñab grë miech co lo zho, siguiel zho quiet sti zhmal co biire tsie zho tsieseed zho zho. ⁴³Zeene brieë zho len yadoo co, nzian grë zha Israel, nzian grë zha stib guiedz zha ne rililadzle Dios zienal zhits zho. Nëz no zho bnee zho lo grë miech co tiblrique tso guic zho tsienal zho zhiwseed Dios, guien zho ganle pa lotaa noxco me zho.

⁴⁴Biet sti zhmal co, miech guizhiu ne goclo len yadoo co, zootle zig grëse miech guiedz co pcaalsa ga ziequiaadiag zho Xtiidz Dios. ⁴⁵Zha ne rnabey lo grë zha Israel ne no ga, zeene gonꞓ zho scataa ndal miech ne goclo ga, blëë zho lo Pabl, ndox zho lo me, rëb zho led diidzlid nac minë rseed me.

⁴⁶Niicle Pabla, niicle Bernabéw bdziebd zho, dzigole bnee zho lo zho rëb zho:

—Nli to glo riegua_l yquiaadiag Xtiidz Dios ne nac to zha Israel. Per ne squi ru_n to guie_lntseeb nëde to ycaania tow par yгаа to guie_lmban ndzon ne needz Dios; na laa no guioseed grè zha zit. ⁴⁷Ni scalegaa rnabey Dios gaca, sac znu rnee me:

Laa naa bzole luu tsienee luu Xtiidz naa lo grè me_n zit,
luu gac zig ti biini ne gziini lo grè miech ne ndxie lo guidzliu;
zeena guie_n zho zha laa zho lo do_l.

⁴⁸Grè zha ne nac zha zit, zeene bin zho sca rëb Pabl, per nli rley zho, rdeed zho xquizh lo Dios scataa ndzon nac Xtiidz me. Grèse zha ne nole yгаа guie_lmban ndzon ne gdeed Dios ga, grèse zho dze cogazh laa zho bliladz Jesús. ⁴⁹Dipse dan co, gocna_n miech Xtiidz Dios.

⁵⁰Grè zha Israel ne rlëë lo Pabl ga, psilo zho pquuil zho grè me_n wnaa ne nac diidz noxco Xtiidz Dios, ni güey zho güeynee zho lo grè zha ne nac me_n non lad guiedz co; zeena ctsidi_l zho Pabl grop Bernabé, guncxoon zho zho dan co. ⁵¹Zeene bin Pabla grop Bernabé, par glu ne nonguie_ld sca been zha co zho, beenmbe zho grè yudie co ni zho laa zho brieë ga, laa zho zie nëz Icon. ⁵²Grè zha ne bliladz Jesús ga, nguie_el rac zho, rdeed Espiritu Sant guie_lbiini lo zho.

Bdzi_n Pabl Icon grop me Bernabé

14 Zeene bdzi_n Pabl Icon grop me Bernabé, güey zho tib xyadoo zha Israel zob lad guiedz co, bnee zho Xtiidz Dios lo grè zha ne pcaalsa ga. Zigtaa zha Israela, zigtagaa zha lad guiedz cow, nzian zho bliladza. ²Laa grè zha Israel ne bliladzda, psilo zho bloo zho diidz lo grëraa miech guiedz co glëënie zho Pabl grop Bernabé. ³Niicle sca been grè zha co per wbid zho, bii blëz zho ga, peet dzeb nod lo zho rie zho rienee zho Xtiidz Dios lo miech; scagaa Dios, nzian grè milagr ne bdeed me diidz ru_n zho par glu ne nli Xtiidz me nonee zho.

⁴Dzigo grè miech ne no lad guiedz co goc zho chop dii, gro_l zho racnie grè zha Israel ne rlëë ga, zgro_l zho racnie grop zha poxtl co. ⁵Zha ne rlëë ga, zigtaa zha Israela zigtagaa zha guiedz cow, bnediidz zho grè zho wxtis laa zho tsie tsiedeedquie zho Pabl grop Bernabé. ⁶⁻⁷Zeene bin Pabla grop Bernabé, mazd laa zho brieë ga, laa zho zie nëz xtan zha Licaon. (Güey zho Listr, güey zho Derb ni grëraa guiedz ne ndxie gax ga; güeynee zho lo grè miech co zha nac Xtiidz Dios.)

⁸Guiedz Listr ga gon zho ti mgui në ni, wla_taa lo xquie_lmban me ib gard së me; sac scale në ni me zeene gol me. ⁹Zeene gon Pabl dze zob me rquiaadiag me mi_ne nonee Pabl lo grè miech co, dzigo dzeque bui Pabl lo me, gon Pabl dib zdoo me rliladz me nli zrieelo gunguiac Dios me; ¹⁰dzigo nguiedz bnee Pabl lo me, rëb Pabl:

—jBeennli ni luu, zeena bzoli!

Zigne sca bnee Pabl, znuse guso nguzhoon me, bzoli me laa me psilo bzë.

¹¹Zeene gon grè miech co sca biac me, psilo zho con xtiidz zho nguiedz rnee zho:

—jDiosle i gon, nasi zig rlu miech rlu me laa me biet gbaa ziaadga_n me ne!

¹²¡Masaque rzac zho lë xdios zho ga! Rnee zho Bernabé nac dios Júpiter, laa Pabl nac dios Mercur, sac Pabl nac zha ne ndziibraa rnee. ¹³Ro guiedz co ga zob xyadoo zhimdio zho Júpiter, dzigo brieec pxyz ne no yadoo co grë me miech lad guiedz, zienie zho ngon, zienie zho guiee, nan zho gut zho ngon co cogon zho ma lo Pabl grop Bernabé. ¹⁴Zeene bien Pabla grop Bernabé wbiñladz guic zho. Ptsiez zho xab zho, bzëeb zho lad grë miech co, nguiedz rnee zho lo zho:

¹⁵—;Ndzinli golgac! ¡Pe nacne squi rac to? ¡Golgan ganle miech guidzliuque nac no, tibaque nac ne grë ne! Laa no ziaad lo to ziadseed no to wseed cub ne nac Xtiidz Dios, zeena guien to csaan to grë ncuane paat rquiind ne run to i, gbiire gbig to lo Dios men ne nlipaa mban. Me bzaa gbaa, me psan guidzliu, me psan nisdoo, grëse ncuane no gbaaw, ncuane no lo guidzliuw, ncuane no lo nisdoo, me bzaaw grësew. ¹⁶Niicle ne glo bdeed me diidz been miech grë ncuane gocladztaa zho, ¹⁷per psaanladzd me zho. Gocnie me zho zigne racnieque me ne niina, rsiaab me nisguie rac xcuaa ne, rneedz me ncuane rdioow ne gzataa dze, rneedz me guiebley lo ne.

¹⁸Niicle sca rnee grop zha poxtl co, nen bin grë miech co diidz beete zho ngon co ngogon zho ma lo zho.

¹⁹Len dze co, blalaa zha Israel ne ziaad nëz Antioquí ni nëz Icon bdzin Listr ga. Psilo zho bloo zho diidz lo grë miech co gocntseeb zho lo Pabl; güey grë miech co bdeedquie zho Pabl.

Masaque bzhaac zho gutle Pabl, bdoobniu zho me güeyron zho me tblad ro guiedz. ²⁰Grë zha guiedz co zha ne rliladzle Jesús, zeene bin zhow, güey zho zaatne nix me ga. Lëëtaque ndxie zho lo me, zeene laa me guche; ga guche me laa zho zeynie me nëz len guiedz. Biini liu, pcaa me nëz grop me Bernabé laa zho zie nëz Derb.

²¹Bdzin zho Derb, psilo zho bnee zho Xtiidz Dios lo grë miech co; ndal grë zha ne bliladza. Blozh ga, laa zho wbi ga biire güeyted zho nëz Listr, güeyted zho Icon, ni güeyted zho Antioquí, ²²güeynee zho lo grë zha ne rliladz Jesús ga, pchoobladz zho zdoo zho, pso zho diidz lo zho, niicle nroob guieñe ne noded zho per none tibaque gac guic zho tsienal zho Xtiidz Dios; sac ible sca nzian ncuane ted zho laga gdzin dze ne gdzin zho zaatne rnabey Dios.

²³Tib tib guiedz co, bzose zho grë zha ne so gnabey lo grë zha ne rliladz Jesús ga; rlozhse rcuan zho grë zho zho ni rzodiidznie zho Dios, dzigo laa zho rsan zha co ladznia me yquianap me zho.

Bdzin Pabl grop Bernabé nëz Siria stib

²⁴Nëz no Pabl grop Bernabé bded zho dib xtan zha Pisid, bzëeb zho xtan zha Panfil, bdzin zho guiedz Perg. ²⁵Blozhse bnee zho Xtiidz Dios lo grë miech co, dzigo laa zho brieec ga, bdzin zho guiedz Atalia. ²⁶Atalia ga bzëeb zho barcw bdzin zho sti guiedz ne lë Antioquí, gataa laa zho psiaal viaj co. Guiedz coque ga brieec zho grop zho güey zho grë guiedz co güeynee zho Xtiidz Dios

lo miech; zeene sca bñab grë zha ne rililadzle Jesús ga lo Dios gacniën me zho tsiegun zho xtsiin me.

²⁷Zigne bdziñ zho Antioquí ga, bnabey zho pcaalsa grëse zha ne rililadz Jesús, bzodiidz zho lo grë miech co grëse zha gocniën Dios zho güeygun zho xtsiin me, ni zha rquia zdoo Dios zha ne nacd zha Israel rbedz me zho ye zho rzëëb xnëz me.

²⁸Xtselaa bio Pabl ga grop me Bernabé, blëz zho lo grë zha ne rililadz Jesús ga.

Pcaalsa zho Jerusalén

15 Ga no Pabl grop Bernabé zeene bdziñ bla zha ne ziaad nëz Judé, psilo zho noseed zho grë zha ne rililadzle Jesús ga, rnee zho lo zho ib none tso zho bey zigne rnabey xley Moisés, niicle ne rililadzle zho Jesús; zeena sca csilaa Dios zho lo xtoł zho.

²Zeene gon Pabl sca noseed zha co miech, nacne bdildiidznieque Pabl zho grop Pabl Bernabé. Dzigo mazd bñediidz grë zha ne rililadz Jesús ga, bzo zho zla zha ne gacgza Pabl grop Bernabé tsie zho Jerusalén tsienabdiidz zho lo zha poxtl ni lo grë zha ne rnabey lo zha ne no ga, diën pe guiab zho.

³Nacne brieë zho zie zho. Nëz no zho bded zho xtan zha Fenicia, xtan zha Samar; zaatne notaa zha ne rililadz Jesús, rzodiidz zho lo zho grëse zha nobedz Dios grë zha ne nacdrea zha Israel, rsaan zho grë zhiwseed xmengol zho laa zho rililadz Jesús. Rley grë miech co ron zhow. Sca bio zho nëz, laa zho bdziñ Jerusalén.

⁴Zeene bdziñ zho Jerusalén, pcaalsa grë zha poxtl, grë zha ne rililadz Jesús ga, ni grë zha ne rnabey lo zho. Dzigo ga bzodiidz Pabl grop Bernabé grëse zha gocnie Dios zho, zeene güeyted zho grë dan co güeynee zho Xtiidz me lo miech. ⁵Min co quianee zho zeene guso bla zha ne glo goc farisé rëb zho, grë zha ne nacd zha Israel, zeene laa zho rililadz Jesús ib none tso zho bey, ni none gun zho grëse minë rnabey Xley Moisés. ⁶Dzigo nacne bnabey grë zha poxtl co ni grë zha rnabey co, ycaalsa zho stib diën zhapaa gaca, pe nonguiela tso grë zha zit bey co.

⁷Zeene pcaalsa zho, goc pa lo quianee zho zeene guso Pedr rëb Pedr lo zho: —Grëse to bets, golquiaadiag minë gne naa lo to nu ganle. Led rsoladz to, zeene griinpaas psilo quiagaaz Xtiidz Jesús lo miech, ible Dios bzooblo naa pxeel me naa gaseed naa grë zha ne nacdrea zha Israel gliladz zho me. ⁸Ni megaa ne runbey me zdoo tib tib miech, laa me blu ganle, niicle ne zha zit nac zho laa me pcaania zho; pxeel me Espíritu Sant nacie zho, zigne pxeelaque Espíritu Sant nacie ne. ⁹Gotsaa gwi ne ganle, led yed Dios rbe diën cho nac zha Israel cho nacgaa zha zit; zigtaa zhaw, zigtagaa new, laa me pcaania ne porne dib zdoo ne bliladz ne me. ¹⁰¿Zha nac dzigo ne racladz to gnabey to grë zha co gun zho grë minë nac xley ne? ¿Pe niacxe rienraa ne lo Dios dzigo? ¡Niicxe ne name, niicxe xmengol ne brieelod niuna zigne naca! ¹¹Golguien ganle, zigtaa zhaw zigtagaa new laa me csilaa ne lo dol grë ne, per nacda por ncuanea rdziuuñ ne; sinque laa me csilaa ne porne nquialadz me ne.

¹²Zeene blozh sca bnee Pedr, dzese biac zho grë zho; dzigo laa Pabl grop Bernabé psilo bzodiidz grëtaa milagr ne blu Dios lo grë men zit zaatne güeynee zho Xtiidz me lo grë miech co. ¹³Blozhse bnee grop zha co, laa Jacob gusoque rëb me:

—Grëse to bets, golquiaadiaggaa chop lan xtidz naa naganle gne naa lo to.

¹⁴Laa Pedr bzodiidzle lo ne ganle zha psilo bredz Dios grë zha zit, bzooblo me zho ye zho gac zha ne sëëb xnëz me. ¹⁵Ga nagon goca zigne zhobneese lo Xtiidz me, mine pquiaa grë zha ne pxeel me padzeela, rnew:

¹⁶Tedse nu ganle,

laa naa cuedz grëse miech ne ygab lo naa;

grë zha xtii David zha ne bzozit, laa zho gbig stib.

¹⁷Hor co grëse zha zit, laa zho gon ganle cho nac naa, zeena grielo sëëb zho xnëz naa.

¹⁸Znu nac xtiidz Dios, ni padzeelale bzeet me ne laa me gun min co.

¹⁹Min co nagon grë zha zit ne rliladzle Jesús, ib nonguielda ga gnabey ne zho gun zho mine nac xley ne. ²⁰Sinque mazd yquia tib diidz cxeel ne lo zho gon zho, grë ma ne rut miech rgogon zho lo grë zhimdio zho, ib gowd zho bëël co; grë ma ne rxieed ren zeene ret ma, gowd zho ma; ni niicle grëragaa ma ne gut zho, ib gowd zho xchen ma. Grë zha bgui, nodne tsonie zho wnaa ne nacd tsieel zho; niicle wnaagaaw, nodne tsonie zho mgui ne nacd tsieel zho. ²¹Niicle mazd padzeelaw, tibaque quiayon miech gund zho min co; sac desde hor co tib tib guiedz bzose Moisés tib zha ne gneew lo miech len xyadoo zho, dze ne rdziiladz zho lo dziin.

²²Blozhse ga, dzigo biaan zho diidz so chop zha ne tsie Antioquí tsienal zhits Pabl grop Bernabé, tsiesan zho ti diidz ne guey lo zha co. Nacne bzo zho Judas xingan Barsabás, ni bzo zho Silas; grop zha co, zha rien nac zho lo grëraa zha ne rliladz Jesús ga. ²³Pquia ti guits güey zho, rnee lo guits co:

“Zigne nose no Jerusalén nu, zigtaa zha ne nac poxtla, zha ne rnabeya, ni grëraa zha ne rliladz Jesús nuw, grë no laa no rquiaabdiuzh to grëse to bets ne nac to zha ne no guiedz Antioquí, ni grëraa guiedz ne ndxie nëz Siria i, ni nëz Cilis.

²⁴Niina ne gocndion no laa bla zha ne nacgrë no nu biaad lo to i, biaadcots zho guic to dien peraa no gun to. Gacnan to ganle led nod pxeel zho, ²⁵⁻²⁷gane niina bzodiidz no grë no bzo no Judas ni Silas ziaadnal zhits Pabl grop Bernabé, laa zho ziaad i ziaadgan zho to. Zha nziuu nac Pabl grop Bernabé lo no, sac gon rbeeladz zho xquielmban zho quiayun zho xtsiin Jesús.

²⁸Lo godiidz ne bdziunun no, laa no bdzianle nonguielda ne dien peraa gnabey no to gun to, ni niiclegaa Espíritu Sant scaque rnee me. Rquiind ne peraa gun to, lëëlew ga totsaque tsoxco to ²⁹gowde to xpëël grë ma ne rgogon miech lo grë zhimdio zho; grë ma ne rxieed ren zeene ret ma, gowde to ma; ni niicle gowdgaa to xchen grë ma ne gut to. Grë zha bgui, nodne tsonie zho wnaa ne nacd tsieel zho; niiclegaa wnaaw, nodne tsonie zho mgui ne nacd tsieel zho. Min rii nagon nac mine no tsoxco to.

'Guiaannie Dios to sca."

³⁰Gza tap zha co laa zho brie Jerusalén, laa zho zie nëz Antioquí. Zeene bdziñ zho ga, bnabey zho pcaalsa grëse zha ne rliladz Jesús, dzigo bdeed zho guits co lo zho. ³¹Zeene gocnañ grë zha co zha rnee low, rley zho sacne pchooblada zdoo zho. ³²Blozhse ga, psilo Judas grop Silas pseed zho grë miech co Xtiidz Dios, zeena dib zdooraa zho gnalo zho Dios; sac bdeed me guielbiini lo Judas grop Silas rteed zho xtiidz me lo miech.

³³Xtselaa blëz Silas ga grop Judas, laa zeene goļ dze ne laa zho griee gbiire zho nëz Jerusalén stib, ine güeyzonëz grë zha co zho, rdeed zho xquizh lo zho. ³⁴[Laa zho nole nëz, tibaque zeene rëb Silas laa Silas guiaanaque ga spalal dze.] ³⁵Laa Pabl grop Bernabé ible laa zho biaan ga been zho xyudar grë zha ne noseedle miech ga.

Brop vuelt ne güeyseed Pabl miech

³⁶Goc palal dze no Pabl guiedz Antioquí ga grop me Bernabé, zeene rëb me lo Bernabé laa zho gbiire tsie grë guiedz ne güeynee zho Xtiidz Dios lo miech ga, par gacnañ zho dien yo grë zha co. ³⁷Dzigo gocladz Bernabé ye Juan Marcw nienie zho; ³⁸per bzhiguiel Pabl, sac zeene güeynie zho Juan glo, psanaque Juan zho guiedz Panfil, laa Juan biire zey Jerusalén, güeynaļ Juan nlozh nsiaal zho lo dziin co.

³⁹Min co pquiaqui bneelsa Bernabé grop Pabl, nrooblaa güey lo xtiidz zho; nacne gataa laa zho ptso. Pcaa Bernabé nëz grop Bernabé Juan bzëëb zho barcw zie zho nëz lo guidzliu win ne no lo nisdoo lë Chipr; ⁴⁰laa Pabl goc grop Silas. Blozhse bnab grë zha co lo Dios gacnieñ me Pabl grop Silas, laa zho brie ga ⁴¹güeyted zho grë guiedz ne ndxie nëz xtan zha Siria, grë guiedz ne ndxie nëz Cilis, güeynee zho lo grë miech ne rliladz Jesús nëz co, güeychoobladz zho zdoo zho.

Beenbey Pabl Timoté

16 Len dze co güey Pabl grop Silas güeyted zho Derb ni güeyted zho Listr. Listr ga beenbey zho tib zha nguieg ne rliladzaque Jesús lë Timoté, ti men Israel ne rliladzle Jesús nac xniaa me, laa pxoz me nac men Gres.

²Grëse zha Listr, zha Icon, zha ne rliladz Jesús tibaque rzeet zho Timoté rnee zho ti miech ndzinli nac me, nacne bnee Pabl lo me tsienal me zhits Pabl. ³Ni ne nod me bey ne rio zha Israel sac led zha Israeld nac pxoz me, dzigo bloo Pabl me bey co, zeena tsod pe glisqui grë zha Israel ne no nëz co.

⁴Laa me zienal zhits Pabl. Guiedz ne rdedtaa zho rnee zho lo grë zha ne rliladz Jesús ga, tsoxco zho gun zho grë mine pso zha poxtl ga diidz, grë zho zha rnabey ne no Jerusalén. ⁵Zeene ron grë zha cow, dib zdooraa zho rnalo zho Dios, zigse zie dze racnzianraa zha ne rliladz Jesús.

⁶Blozh ga, tibbdeed zho xtan zha Frij ni xtan zha Galás, sac bdeete Espíritu Sant diidz nienee zho Xtiidz Dios lo miech grë guiedz ne ndxie nëz Asia ga. ⁷Zeene bdziñ zho zaatne rsilo xtan zha Misia gocladz zho nie zho nëz xtan

zha Bitin, scaque bdeete Espíritu Sant diidz nie zho nêz co. ⁸Dzigo tibbdeed zho dib xtan Misia bdziñ zho ti guiedz ne ndxie ro nisdoo lë Troas.

⁹Guieel co blulo ti mgui Macedon lo Pabl, r nab me guñ Pabl guieñzaac tsie Pabl nêz co, tsiegun Pabl xyudar grë miech co.

¹⁰Nacne hor cogazh bzhixcuaa no, sac bien no ible Dios racladz guio no nêz co guinee no Xtiidz me lo miech.

¹¹Dzigo brieë no ga bziaab no ti len barcw bdziñ no ti lo guidzliu win ne no lo nisdoo lë Samotras. Biini liu brieë no ga bdziñ no Neápolis, ga bliaaz no wdze co. ¹²Biini sti liu co brieë no Neápolis bziani no bdziñ no Filip. Lëë guiedz co riaan zaatne rsilo xtan zha Macedon, niapse men Roma no ga; nzianlaa ngbidz bliaaz no ga.

¹³Laa tib dze ne rdziiladz miech lo dziin, brieë no bio no tib lad ro guiedz co, gax ti ro guiubee, zaatne bdzion no rcaalsa zha ne rienab lo Dios. Bdziñ no nzianlaa men wnaa ndxie ga, dzigo psilo no bnee no lo zho cho nac Jesús.

¹⁴Lad co no ti wnaa Tiatir lë Lidia, rto me grë lar nizhnie nlaan mine nac lar niazh; ye me dib zdoo me rliladz me Dios. Laa me noquiaadiag mine nonee Pabl ga, zeene psiaab Dios guic me bliladz mew.

¹⁵Dzigo hor cogazh brobnis me grë menlidz me; blozh ga, bredz me no guiohiaaz no lidz me, nêchaa me lo no:

—Telne rzac to nli dib zdoo naa rleynie naa Dios, gohtë sca cuëz to lidz naa. Rzoobguic me lo no, nacne biobiaaazeque no lidz me.

Bio Pabl ladzguiib grop Silas

¹⁶Tib dze, lëëtaque zio no zaatne riozodiidznie no Dios, bdzieelo no ti ndzoop nguieg noguitnie mendox. Zëëb diidz grëse tel pe rnabdiidz miech lo ndzoop, rnee mendox cow; nroob dimi ne riab nia zha ne rnabey ndzoop. ¹⁷Nañ ndzoop zhits no, nguiedz roptsie ndzoop rnee ndzoop:

—¡Xtsiin Dios ndzon ne zob gbaa gon noyun gza mgui rii! ¡Laa zho ziadseed to zeena gacnan to zha csilaa Dios to lo xtol to!

¹⁸Nzian dze zaatne rdzieeltaa no ndzoop tibaque sca rnee ndzoop. Zeene bieedtaa guic Pabl, biireque me bnee me lo mendox ne noguitnie ndzoop ga, rëb me:

—Jesús nacie naa, ni laa naa rnabey luu gon niinagazh psaan ndzoop qui. Zigne sca rëb Pabl laa mendox co bzhooñ.

¹⁹Gza zha ne rnabey ndzoop ga, zeene gon zho rundraa ndzoop guieñsin co gdziniaa ndzoop dimi, bnaaazeque zho Pabl grop Silas güeyzo zho zho lo wxtis, rëb zho:

²⁰⁻²¹—¡Golwi ganle pe nac ncuaane noyun grop zha Israel rii lad guiedz nu! ¡Nogodil zho miech, laa zho quiaseed miech ncuaane nongueidraa dziuun ne nac ne zha Roma!

²²Pcaalsa grëse miech co, grëse zho ntseeb rac zho lo Pabl grop Silas. Dzigo bnabey wxtis co brieë xab zho grop zho bdeed bar zho zho, nroob bdiñ zho zho. ²³Blozhse bdiñ zho zho laa zho psëëb zho ladzguiib, bnabey zho men

ne quianap ladzguiib ga tibaque yquianap me zho, sac tel̄ laa zho xoon me tsietizha. ²⁴Zeene bin men co sca rēb zho, güeyaque me güeysēeb me zho stib lena mine riaan caanraa, ga psēeb me ni zho lad chop lē yag nroob.

²⁵Wdze co, zig grol̄ guieela laa Pabl grop Silas bii noyoolnie Dios, ni rnab zho lo me gacnieṅ me zho. Grēse zha ne no ladzguiib ga, ron zho sca no Pabl grop Silas. ²⁶Tibaque zeene bni ti zho dox, psiniw dib nacse ladzguiib co, grēse ro ladzguiib co bzhial, guuib ne no nia grē zha ne no ga, wbiḷa.

²⁷Lēēlēd briece mcaallo men ne quianap ga, zeene gon me grēse ro ladzguiib co zonial, masaque güeynie guic me bzhoonle grē zha ne no ga, bdoaque me spad ne ney me laa me zie gut me me. ²⁸Hor co broptsie Pabl lo me, rēb Pabl: —jGute luu luu! jGrē no ndxie no, choot bzhioond!

²⁹Lēēlēd bnaab me biini, bzēeb nguzhoon me len ladzguiib, masaque rzhidz me dzeb pquitsgzhib me lo Pabl grop Silas. ³⁰Blee me zho ga, rēb me lo zho: —Golnē lo naa, ḷpe nac mine gun naa zeena csilaa Dios naa lo grētaa xtol̄ naa?

³¹—Dib zdoo luu bliladz Jesús, men rnabey ne pxeel̄ Dios lo guidzliu —rēb zho—, dzigo silaa me luu lo dol̄, silaa me menlidz luu ne.

³²Dzigo güeynie me zho lidz me, bnee zho Xtiidz Dios lo me grē menlidz me. ³³Guieel co no me bdiib me zhits zho, zaatne brēe bar ne bloobar zho zho; blozhse ga, laa me brobnis grē menlidz me. ³⁴Bnabey me goclo ti guielwagw downie me zho, rley me, niicle grēgaa menlidz mew rley zho ne laa zho bliladz Jesús.

³⁵Biini liu, pxeel̄ wxtis zha ne güeynie diidz lo me cuee me Pabl ladzguiib grop Pabl Silas. ³⁶Dzigo güey me güeynee me lo Pabl rēb me:

—Laa wxtis pxeel̄ diidz cuee naa to ladzguiib; zacle nasca greece to, peet tsieniedraa guic to.

³⁷Dzigo rēbchaa Pabl lo zha ne bdzinnie diidz ga:

—jZha ndzielguictaa zhiwxtis to gon! Squi ndxie menguedz bdiṅ zho no, ni gardle gacnan zho dien pe nli no pe falt ne rdziaap no. Bnabey zho bio no ladzguiib, ni zha Roma nac no; nana racladz zho zhliaanse greece no. jLēda ga gon! jGoltsie golguiab lo zho, lēēzhal zho guiaad guiadbee zho no nu!

³⁸Dzigo güey zha co güeynie zho diidz lo wxtis. Zeene bin wxtis zha Roma nac Pabl, bdzieb zho; ³⁹lēēlēd güey zho ro ladzguiib güeynab zho dispensar lo Pabl grop Silas. Blee zho zho ladzguiib, ni bnaab zho lo zho siguiel̄ zho mazd gbi zho guiedz co.

⁴⁰Ga briece zho güey zho lidz wnaa ne lē Lidia ga, bnee zho lo grē zha ne pcaalsa ga, zha ne rliladz Jesús, pso zho diidz lo zho tiblrique gac zho tsienal̄ zho xtiidz me. Blozhse ga, dzigo laa zho briece guiedz co.

Güey Pabl Tesalónica grop me Silas

17 Briece Pabl guiedz Filip grop me Silas, güey zho güeyted zho guiedz Anfípolis ni guiedz Apolonia, bdziṅ zho guiedz Tesalónica. Lad guiedz co zob ti xyadoo zha Israel, ²dzigo güey Pabl güeynee me Xtiidz Dios lo grē zha ne rcaalsa ga, zigne runaque me grēraa guiedz ne zieded me.

Blëz zho ga tson zhmał, gzobse dze ne rdziiladz miech lo dziin güey Pabl güeyzodiidznie Pabl grë zha co, ³bzeet me lo zho grë zaatne raquiet grëtaa ncuaañe ted meñ ne cxeel Dios lo guidzliu ga, ni zha grieeban me; ni blu me lo zho gacnañ zho ganle lëë meñ co ga nac Jesús.

⁴⁻⁵Ndal zha ne pquaadiag xcodiidz Pabl, bien zho ne nli sca naca, laa zho bliladz Jesús, ndal zho nac zha nëz Gres, zha ne noxcole miñe rnabey Dios, ye blalaa meñ wnaa ne nac meñ non lad guiedz co. Laa zha Israel ne rnabey yadoo co, zeene gon zho scataa ndal zha ne bliladz Jesús, blëë zho; güey zho güeytop zho grë zha yozh ne quianzë lad guiedz co, ti ruid ne been zho lad guiedz. Güey zho güeysëëb zho lidz Jasón nañ zho niebee zho Pabl ga grop Silas, ngo zho zho ladznia grë miech co.

⁶Zeene gon zho bgaad grop zha co lo zho, bnaaзаque zho Jasón ni zla zha ne rliladz Jesús, bdoñni zho zho bdzinnie zho zho lo wxtis, roptsie zho rnee zho:

—¡Golgan ganle laa zha ne sca quianzë nocots guic grë miech, laa zho blansole nu! ⁷Ni Jasónpaa rdeed zaatne rbëz zho. Racladzdraa zho gun zho miñe rnabey rey César, sac rnee zho no sti zhirey zho lë Jesús.

⁸Grë zha wxtis co ni grë menguedz ne pcaalsa ga, zeene bin zho sca rnee grë zha co, riendraa zho zha gun zho. ⁹Miñe been zho beenquizh zho Jasón ti mult gza Jasón zla zha co, dzigo laa zho wbi ga.

¹⁰Pcow liu co, wxiña laa grë zha ne rliladz Jesús ga bleese Pabl ga grop me Silas, pxeel zho zho nëz Beré. Zigne bdzin zho Beré, gloque ti xyadoo zha Israel güey zho.

¹¹⁻¹²Grë zha Israel ne no Beré ga, rley zho rquiaadiag zho miñe rnee Pabl grop Silas, gzobse dze rlab zho lo Xtiidz Dios rwi zho dien pe nli miñe rnee zho ga. Ndal zha Israel co bliladz Jesús, ndal zha Gres ne, zigtaa mguiw zigtaa wnaaw; blalaa meñ wnaa co zha non nac zho guiedz co. Tibliladz nac grë miech co, gocntseebd zho zigne gocntseeb zha Tesalónica.

¹³Laa zeene gocnañ zha Israel ne no Tesalónica laa Pabl nolaque guiedz Beré, güeyaаque zho güeyquuil zho grë miech co glëënie zho Pabl. ¹⁴⁻¹⁵Dzigo lëëlëd brieë bla zha ne rliladz Jesús ga, zienie zho Pabl nëz ro nis; laa Silas grop Timoté biaan ga. Güey zha co güeysañ zho Pabl guiedz Aten; laa zeene laa zho wbi, pxeel Pabl diidz lo Silas grop Timoté tsieniob zho Aten.

Leñ dze ne no Pabl Aten

¹⁶Laga quiambëz Pabl gdzin Silas grop Timoté güey me güeyted me lad guiedz co, wbinladz guic me gon me led zhid grë mdio ne riegañ grë miech co. ¹⁷Nacne bioxco me bnee me Xtiidz Dios lo zho, güey me xyadoo grë zha Israel ne no ga, bzodiidznie me zho grë zho zha guiedz co zha ne rliladzle Dios. Gzobse dze rie me leñ guiedz rienee me lo grë miech ne rdzin ga. ¹⁸Tib dze bdzieelo me bla zha rac ne zienal zhiwseed ti meñ lë Epicur, ni zla zha ne zienal wseed ne rnee zho estoic; psilo me bzeet me Jesús lo zho, bnee me zha brieëban Jesús. Zeene bin zho zha rnee me, no bla zho rzhidznie me, rnee zho: —¡Dieen pe riab guic meñ qui rnee me, ziaadquidie me miech!

Zlagaa zho rnee, nend cho zhiwseed sti Dios ne riladz miech stib dan zienie Pabl, gane sca rnee Pabl; ¹⁹dzigo rëb zho lo Pabl:

—Bzhiguiel mazd, sê luu guio ne lozh sodiidz luu lo no dien zha nac wseed ne ziaadnie luu, ²⁰sac waltaa gard dzion no grê ncuaañe rnee luu i.

²¹No zho liaadz gacnan zho pe rnee Pabl, sac sca nac grê zha Aten, niiclegaa grê zha ne quiazdiz ga, rdziladz zho rded-dze zho rzodiidz zho dien zha nac grê diidz cub ne griin ron zho.

²²Bdzin zho ti guic gui win ne rnee zho Areópagó, bzo Pabl glowtaa zaatne rcaalsa zho ga, bnee me lo zho rëb me:

—Grëse to ne nac to men Aten, ran naa ne nligaa rioxco to rleynie to grê men ne rzac to nac Dios; ²³sac len dze rii biateed naa zaatne zob grê xdios to, haxta no zaatne niaa ti lo pcoog quia chop lan diidz ne znu rnee: “MIN RII NIAA PAR DIOS NE RDZIUUNBEYD NE.” Golgacnan sca ganle, Dios ne runbeyde to ga, runbey naa me ni lëe zhiwseed me none naa lo miech len dze rii.

²⁴Dios co bzaa guidzliu, me bzaa grëtaa ncuaañe no lo guidzliu; gacd ne guiab miech zha gzaa ti zaatne cuëz me, sac men nroob men rnabey nac me, me rnabey gbaa, me rnabey guidzliu. ²⁵Niicle rquiindгаа me dien zha yquianap zho me, sac grëse ne ne nac ne miech, me rneedz guielmban lo ne, me rneedz grëtaa ncuaañe rquiin ne. ²⁶Lo tib nëzaque miech ne bzaa me ga, bnabey me brieequia grëse dii miech ne ndxie lo guidzliu niina, bdeedse me zaatne biaan tib tib dii co ni dien palal dze ne gban zho zaatne biaan zho. ²⁷Laa me psan zho parne yguib zho me, tsoxco zho guien zho ganle zha nac me haxta gdziel me lo zho. Ni led zite ga zo me lo ne grê ne, ²⁸sac gon, niapse por xpoder me laa xuerp ne niaa zigne naca, laa ne mban, laa ne rriel. Lëew ga bnee bla menladz to, zha rac ne znu rëb: “Xtii Dios nac ne.”

²⁹Gase na ganle gotsaa gwi ne, conque xtii Dios name nac ne, pe nac dzigo gliladz ne lëe Dios ga nac grê cho mdio or, cho mdio plat, cho mdio quie ne riab guic miech rzaa zho; ³⁰ni ib sca riladz miech. Laa Dios gop zho paciens hor co sac runbeyd zho me; sangue niina laa me quiabedz zho, laa me rnab lo zho csaan zho grê ncuaañe bliladz zho ga, gbig zho lo me, mese gleynie zho; ³¹sac laa me bzole tib dze ne gacredz grëse miech lo me ygaa zho mine tsieguial zho tib tib zho, tel zha wban zho. Ni laa me blule ganle cho nac men ne gun guielwxtis co, lëe men co ga gon bleeban me.

³²Zeene bin zho bzeet Pabl no ti men ne brieeban, nzian zho rzhidznie Pabl, zla zho rëb:

—Na dien pa sti dze lozh yquiaadiag no mine rnee luu i.

³³Gataa pcuëz zho lo xcodiidz Pabl, laa Pabl wbi lo zho ga. ³⁴Brieequia blalaa zha Aten bliladz Jesús, lëe tib zho ga nac mgui ne lë Nich (men ne nacgrë zha ne nac wxtis) ni ti wnaa lë Dámaris.

Güey Pabl guiedz Corint

18 Brie Pabl Aten bdzin me guiedz Corint. ²Ga beenbey me ti men Pont lë Aquil, ti zha xtii zha Israel nac Aquil. Roma no me glo, wriin bdzin

me Corint ga grop tsiel me; sac bnabey rey Claud brieë grëse zha Israel ne no Roma. ³Dzigo güey Pabl blëz Pabl lo zho ga, sac ye zho rzhixcuua grë lar nroob ne rquia ncal, tipse pquia zho dziin ga gza zho.

⁴Gzobse dze ne rdziiladz miech lo dziin rie Pabl xyadoo grë zha Israel ne no ga, riezodiidznie me grë zha ne rcaalsa ga; zigtaa zha Israela, zigtagaa zha guiedz cow rnee me lo zho tso guic zho gliladz zho Jesús. ⁵Zeene laa Silas grop Timoté bdziñ Corint, dzigo laa Pabl psilo gzobse dze güey me güeynee me Xtiidz Dios lo grë zha Israel ne no ga, rnee me lo zho cho nac Jesús. ⁶Laa zeene gon̄taa me rond zho diidz, leḷ ntseeb rac zho lo me, haxta rneenë zho Jesús, dzigo bdzib me xab me lo zho, rëb me:

—iLaa naa biaḷ biaḷne naa lo to, per pquiaadiagde to miñe rne naa; xtolle to nasca teḷ laa to nitlo! Gbiiredraa naa gne naa Xtiidz Dios lo to, na laa naa csilo ganew lo grë zha ne nacd zha Israel.

⁷Dzigo laa Pabl psilo güey lidz ti men̄ ne no gaxaque zaatne zob yadoo co lë me Just, dib zdoo me riladz me Dios. ⁸Leñ dze co ndal zha Corint bliladz Jesús zeene bin zho miñe rnee Pabl, haxta ti men̄ ne rnabey xyadoo zha Israel lë Crisp, grë men̄lidz me bliladz Jesús, dzigo grëse zho laa zho brobnis.

⁹Ti wdze blulo Dios lo Pabl, rëb me lo Pabl:

—iGdziebd luu! iḷb ycuëezd luu lo dziin ne noyūñ luu i, bnee xtidz naa lo grë miech qui! Ndal grë miech rii no sëëb xnëz naa. ¹⁰Peet tsienied guic luu, choot grielod lega pe guñ luu sac naa quianaap luu.

¹¹Nacne blëz Pabl ga stib iz groḷ, pseed me grë miech co Xtiidz Dios.

¹²Laa zeene bzob men̄ ne lë Galión zobnabey me xtan Acay, grë zha Israel ne no Corint ga, bnediizd zho grë zho bnaaz zho Pabl güeyzo zho me lo Galión ¹³rëb zho:

—Laa no ziaadnie mgui rii lo luu, sac laa me quiaguuits xley no, quiago me guic miech tsiegan̄ zho Dios sti mod miñe ni nacdraa ley.

¹⁴Laa Pabl zie gnee, zeene pquiab Galión rëb me lo grë zha co:

—Telne niaca miñe no pe ti falt, pe ti guieḷntseeb ne quiayūñ me, dzigosi naa raguiaḷ guñ guieḷwxtis. ¹⁵Per telne laa to ziaadnie me nu porne rdziladzde to miñe quiaseed me miech, rdziladzde to teḷ cho rzeet me, sac led scad nac xley to, tsow golgan̄ dieñ pe guñ to. Nodaque xtil̄ to guic naa.

¹⁶Bleega Galión zho nëz ley.

¹⁷Dzigo bnaaz zha guiedz co ti men̄ lë Sóstenes, men̄ ne rnabey xyadoo zha Israel ga; gon̄lo Galión bdiñ zho me, per peet rëbd Galión.

¹⁸Goc spalal dze no Pabl Corint ga, dzigo bnee me lo grë zha ne riladz Jesús ga laa me gbi; ye Aquil ni Priscil wnaa ne nac tsiel Aquil nole guic tsienal̄ zhits me.

Nacne zeene laa me brieë, ye zho bzëëbgza me barcw, laa zho zie nëz Cencré. Lëëtaque leñ dze co noxco Pabl guñ me teḷ pe nac ncuane rëb me lo Dios guñ me, dzigo zeene bdziñ zho Cencré bnabey me liu liu ptsiib guic me.

¹⁹Cencré bzëëb zho barcw stib, zie zho nëz Efés. Bdziñ zho Efés, güey Pabl xyadoo grë zha Israel ne no ga güeynee me Xtiidz Dios lo zho. ²⁰Dzigo bnab

zho mbëz me lo zho ga ti blalaa dze, per brieelod mbëz me ²¹sac laa guic me no gdziñniob me Jerusalén yгаа me lni ne ziaadyob leñ dze co, rëb me:

—Na telne zneedz Dios diidz, bii zialteedaque naa dien yo to.

Gataa biaan Aquil grop Priscil, laa me bzëëb barcw stib zie me nëz Cesarea. ²²Cesarea brieë me barcw, laa me zie nëz Jerusalén. Bdziñ me güeyquiaabdiuzh me grë zha ne rililadz Jesús ga; biireraa me ga bdziñ me Antioquí.

Bioñ vuilt ne güeyseed Pabl miech

²³Goc palal dze no me Antioquí, laa me brieëque ga güeyted me grë guedz ne ndxie dib xtan zha Frij, dib xtan zha Galás, güeynee me lo grë zha ne rililadz Jesús ga dib zdoo zho gleynie zho Dios.

²⁴Leñ dze co bdziñ ti men xti zha Israel guedz Efés, ti men Alejandrív lë me Apol. Ti zha rac nac me, rien me zha gnee me Xtiidz Dios lo miech. ²⁵⁻²⁶Güey me xyadoo zha Israel ne no ga, nguieel rac me, peet dzeb guiend lo me psilo me nonee me lo zho grëse mine bnee Juan Bautist zeene bzeet Juan Jesús; sac loxaque min co bin me zeene gocnan me cho nac Jesús.

Lad co co no Aquil ni Priscil, zeene gon zho zha rnee me, dzigo blozhse ga, bredz zho me blozh bnee zho lo me zharaa nac zhiwseed Jesús.

²⁷Grë zha ne rililadz Jesús ga, zeene gocnan zho laa guic me no tsie me nëz Gres, dzigo ye zho rëb wen tsie me, pqiiaa zho ti cart pxeel zho lo zha ne no nëz co zaacse ycaania zho me. Zeene bdziñ me nëz co, pseed me grë zha co. Rley zho blozh gocnan zho cho nac Jesús; ²⁸sac squi ndxie miech rsiioog me ro grë zha Israel, rnee me lo zho lëële men ne quiambëz zho cxeel Dios ga nac Jesús, ni rlu me lo zho pa lo zho bneew lo Xtiidz Dios.

Biire güey Pabl Efés

19 Leñ dze ne no Apol Corint, laa Pabl bdziñ Efés. Blozhse güeyted Pabl grë guedz ne ndxie nëz xtan zha Galás, laa me bdziñ ga. Ga bdzieel me blalaa zha ne rililadz Jesús, ²dzigo bnabdiidz me lo zho, rëb me:

—¿Pe bgaa to guielbiini ne rneedz Espíritu Sant, zeene bililadz to Jesús?

Pquiab zho rëb zho:

—¿Guieibiini ye? Gard gon dzion no rdeed Espíritu Sant guieibiini.

Dzigo rëbchaa Pabl:

³—¿Pezhe waa pseed to zeene brobnis to?

—Zhiwseedse Juan Bautist gocndion no —rëb zho.

⁴Dzigo bnee Pabl lo zho zha nac wrobnis ne biaadnie Juan. Rëb me lo zho nace wrobnis co par glu miech ne laa zho csaan guieintseeb, laa zho sëëb xnëz Dios; per grëse zha ne bgaa wrobnis co ib none gliladz zho Jesús, men ne bzeet Juan ga zeene rëb Juan ile ziaad me.

⁵Min co bin zho nace brobnis zho stib zigne psan Jesús diidz. ⁶Zeene laa Pabl pxobnia guic zho bnab me gdeed Espíritu Sant guieibiini lo zho, hor co psilo zho nzian lo diidz ne rnee zho; ni bnee zho tel pe nac mine racladz Dios gacnan miech. ⁷Lo gza zho rgaa zho tsiipchop, niapse zha bguiw.

⁸Tson mëë blëz Pabl ga, tibaque rie me xyadoo grë zha Israel ne no ga, ible rdziebd me rnee me lo zho zha nac Xtiidz Dios, ni rguib me rgo me guic zho gliladz zho cho nac Jesús. ⁹Per zeene gon me no palal zho ib rond diidz, lel psilo zho squi ndxie miech rneenë zho Jesús, nacne bleextsoque me grë zha ne rliladzle Jesús, güeynie me zho zaatne nac xyuscuel ti men lë Tiran; ga rcaalsa zho gzobse dze rieseed me zho.

¹⁰Dipse len chop iz blëz me ga pseed me grë zha co; nacne grëse miech ne no dib nëz Asia ga, zigtaa zha Israela zigtagaa grëraa miech cow, bin zho zha nac Xtiidz Dios. ¹¹Bdeed Dios diidz been me grë milagr nroob ne rzee zdoz miech; ¹²sac haxta lar ne rzëse nia me, lar ne rbixse me rzhoob lad men ne rzacnë laa zho riac, niicle grëgaa mendox ne noguitnie miecha, rzhoo ma.

¹³⁻¹⁴Ga quianzë gadz xpëed ti zhipxoz zha Israel lë Escev, stib guiedz stib guiedz rie zho rieguncxoon zho mendox ne noguitnie miech. Ti vult, nan zho na ye zho cuedz lë Jesús gacniën me zho guncxoon zho mendox; bdzin zho zaatne guncxoon zho ma, rëb zho:

—iZig zobwi Jesús ne rzeet Pabl, laa no rnabey to golriiegazh i niina!

¹⁵Pquiabaque ma rëb ma lo zho:

—Wen wen runbey naa Jesús ni nangaa naa cho nac Pabl, sangue to gon ni lalnu runbeyd naa to.

¹⁶Znuse bias men ne noguitnie mendox co, bnaaz me gza zha co bdiñ me zho. Ib blëbd zho lo me, masaque dib brëe rna zho, ni xab zho nacwdraa, laa zho bzhoon.

¹⁷Grë miech ne no Efés, zigtaa zha Israela, zigtagaa grë zha guiedz cow, zeene bin zhow per nli bdzieb zho; grëse zho bien zho ne nli men non, men rnabey nac Jesús.

¹⁸Haxta ye grë zha ne rliladzle Jesús, hor co laa zho bleero pe nac grë ncuaañe ndzinlid ne bliladz zho glo. ¹⁹Nzian zha ne biil diidz dox güeyxi zho grë xquits zho, squi ndxie miech laa zho bzëëga grësew. Zeene biobey palal gocnon grëtaa guits co, biirew zig chooptsii mil pes plat. ²⁰Ga blu poder ne nacne Xtiidz Dios, sac grë zha ne bina bdzëë lo xquielmban zho.

²¹Bded ga, biab guic Pabl tsieted me nëz xtan zha Macedon, xtan zha Gres, gbiire me ga laa me tsie Jerusalén stib; haxta rnee me Jerusalén griee me tsie me Roma. ²²Nacne ptedner me Timoté grop Rast (zha ne noyun xyudar me len dze co) zie zho nëz Macedon, laa me bii biaan nëz Asia ga.

Gocntseeb zha Efés

²³Len dze co brieequia palal zha Efés ptsidil zho zha ne rliladz Xtiidz Dios. ²⁴Guiedz co no ti men ne rundziin guiib plat lë Demetr, rzaa me grë yadoo yeen zig niaada xyadoo xnaxnazh zho Dian; nroob dimi ne rial me grë me zha ne runnie me dziin co; ²⁵bnabey me pcaalsa grë zha ne quia dziin lo me, ni grëragaa zha ne runaque dziin co, rëb me lo zho:

²⁶—Rien naa ziyonle to, ziyangaa to ganle laa mguì ne rnee zho Pabl quianzë lad guiedz nu, rnee me nlid Dios ga nac grë mdio ne rzaa miech. Pe zhidaale miech quialiladz zhiwseed me nu; ni led loxaque nudsegaa, dible Asia quialiladz

miecha. ¿Pe gnë to zha dziuun ne? ²⁷Gołguien ganle noxtseeb guiabdraa xtsiin ne, ni nanwen to ganle lëë xtimi ne nu. Ni tebaa mincosegaaw, mine mazdraa noxtseeb nend grëse miech csaanladz xyadoo nazhnazh Dian, nend grëse miech ne rleynie me dib Asia, diibгаа lo guidzliuw con guiaanladz zho me.

²⁸Zeene gon grë zha co sca rëb Demetr, rlëë zho, roptsie zho rgo zho xviv Dian. ²⁹Wdzeepaaw grëse menġuedz laa zho pcaalsa, güey zho bnaaz zho Gay ni Aristarco chop zha Macedon ne rzënie Pabl, bdozni zho zho bdziinne zho zho ro yulow.

³⁰Nacne gocladz Pabl nie me nienee me lo grë miech co, per psaand grë zha ne riladz Jesús ga. ³¹Haxta bla zha wxtis ne ndzieeldiidz Pabl, pxeel zho diidz lo me tsied me.

³²Zhaase zhaase rnee grë miech co ndxie zho ro yulow ga, no zho haxta ni riend pe nacne zie zho ga. ³³Blalaa zha Israel, zeene gon zho scataa rac grë miech co, bdoz zho zhicw ti men lë Lejandr gocladz zho nee me chop lan xtiidz zho. Laa men co blis nia me parne cuedze zho gnee me; ³⁴zeene gon zho zha Israel nac me, psilo zho stib grëse zho nguiedz roptsie zho, rgo zho xviv Dian rnee zho:

—¡Men ndzondoo nac Dian! ¡Men ndzon nac xnaxnazh ne!

Zig chop hor bre zho ga sca roptsie zho.

³⁵Dzigo brieen men ne zobnabey ga, blunia me lo zho cuedze zho; zeene laa zho bredze, psilo me bnee me lo zho rëb me:

—Gołgona ganle, grëse miech lo guidzliu nan zho guiedz rii zob nazhnazh Dian, nan wen zho gbaa biet me zob me nu; ³⁶tsod zha ne guiab led scada. ¿Pe nac nadien ne squitaa rac to? Gołguien ganle nonguielda i squi lëëled dieen pe rzhixcuaa to. ³⁷Gołwi ganle, laa to ziaad-zo grop zha rii nu, ¿pe nadien been zho? Nacd zho cho zha ne quiaguitnie yadoo, cho zha ne nozhidzniegaa xnaxnazh ne. ³⁸Nana, telne racladz Demetr pe glisqui me grë me zha ne rquianie me dziin, gacxe na no yulow waa. Niac niaad zho niaadnab zho guielwxtis, ni zogaa zha ne yquiaadiaga. ¡Ga glisqui zho pe run tib, pe runġaa stib! ³⁹Laa telne noragaa pe racladz zho glisqui zho, dzigo niac niacredz grëse zha ne nac wxtis, zha ngobey dien zha niaca. ⁴⁰Sac gon ne squi been to nadze, noxtseeb glisqui zha Romaw lo ne; ni pe nadien dzieets ne telne laa zho glisquiw.

⁴¹Blozhse sca bnee me laa me wbi lo zho ga, niicle zhagaaw laa zho zey.

Güey Pabl nëz Macedon ni nëz Gres

20 Zeene laa ruid co blëz, dzigo bredz Pabl grëse zha ne riladz Jesús, bnee me lo zho zaacse gac zho. Blozhse bnee me lo zho, laa me brieen ga zie me nëz xtan zha Macedon; ²güeynee me lo grë zha ne riladz Jesús nëz co, pso me diidz lo zho zaacse gac zho. Nëz co brieen me bdziin me nëz Gres. Ga blëz me tson mëë.

³Laa zeene laa me gbi ga tsie me nëz Siria, laa me ziele sëëb me barcw zeene gocnan me laa zha Israel ne no ga bnediidz pa tsietin zho me, nacne güeydaque me barcw, mazd bio me nëz güeyted me nëz Macedon.

⁴Blalaa zha ne bzënaļ biogza no me, bzë ti meņ Beré lë Sópater xingan ti meņ lë Pirr; bzë chop zha Tesalónica, Aristarco ni Segund; ti zha Derb lë Gay, Timoté, ni schop zha nëz Asia, Tíquico ni Trófimo. ⁵Gol no Filip laa zho bner, per biaan no diidz Troas cuëz zho no; ⁶laa no bliaaz ga, ga bdieed no lni Pascw. Zeene bded lni co laa no bziaab barcw, laa no brieë ga. Goc gaay ngbidz no no lo nis laa no bdziņ lo zho Troas, dzigo bliaaz no Troas ga gadz ngbidz.

⁷Zeene gol dze dmingw, bio no yu ne rcaalsa zha ne riladz Jesús ga. Ti yu tson xcuaaw, laa no pcaalsa par dziuun no xtsee ne psan Jesús diidz ga gun grë zha ne riladz me. Laa no ndxie grë no, dzigo psilo Pabl pseed me no; nzian ncuaaņe nonee me lo zho sac guini liu co laa me grieë ga; gol groļ guieela rsiaaļdaque me. ⁸⁻⁹Nzian nac biini ne noquia leņ yu co; zaatne nac ro ventan ga zob ti niib lë Tic. Wdzeelaaw rsiaaļdaque Pabl, tibaque bzheņ mcaal niib co, wbix niib ga biab niib nëz ley; ni glaaw, leņ yu ne riaan glaaraa ga ndxie no. Zeene güeylis zho niib laa niib gutle.

¹⁰Biet Pabl, bdziņ me lo niib bdeedz me niib.

—įGdziebde to! —rëb me—. įZrieëban niib!

įNi nligaaw brieëban niib! ¹¹⁻¹²Grëse zho per nli rley zho. Blozh ga bdzieep no glaa stib bdziņ no leņ yu co, dzigoraa bdiiz Pabl guietxtil pqiin no. Blozhse bdziuun no xtsee co, laa Pabl psilo bnee lo zho stib, quianeeque Pabl laa liu biini.

Bdziņ Pabl Milet

¹³Lban co psiaal Pabl, laa me wbi ga laa me zie nëz Ason nzëni me; laa no bziaab barcw bdiednieer no lo me. Bdziņ no Ason ga bliaaz no me zigne biaan no diidz. ¹⁴Zeene blanso me lo no, laa no bziaab barcw gza no me bdziņ no guiedz Mitilen. ¹⁵Biini liu brieë no Mitilen, bdieed no gax Quío, bietraa stib dze co bdziņ no Samos, ga bliaaz no; bzia no lo nis co zig sti dze dzigoraa bdziņ no Milet.

¹⁶Biotieete no Efés, sac laa guic Pabl no gdzinnioib me Jerusalén, zeena ygaa me lni Pentecostés. ¹⁷Nacne zigne bdziņ no Milet pxeel me diidz Efés bredz me grë zha ne zo lo zha ne riladz Jesús ga. ¹⁸Zeene blanso zho, bnee me lo zho rëb me:

—Wen wen runbey to naa, nanle to ganle zha noxco naa noyūn naa xtsiin Jesús meņ ne rnabey ne. Wlal ne psilo ziyal naa nëz Asia nu, ¹⁹blactaa biin naa lo grë miņe bdeed naa, blactaa lo guieļxtseeb ne ziyo naa, tibaque quianaļ grë zha Israel quīn zho naa. ²⁰Per gon to ganle, tibaque bioxco naa bialseed naa to miņe nac diidzli, zigtaa pseed naa to zaatne rcaalsa tow, zigtagaa pseed naa to stib yu stib yu. ²¹Grëse miecha, tibaque miņe pseed naa zho, miņe bne naa lo zha Israel miņcoque bne naa lo miech stib guiedz; grëse zho bnee naa lo zho none csaan zho xquieļntseeb zho dib zdoo zho gnalo zho Jesús, zeena gbig zho lo Dios.

²²Scaque niina ne laa Espíritu Sant rnabey ga naa Jerusalén, nanđ naa diēn peraa nac ncuaaņe gdzieelo naa ga; ²³per nanpaa naa ible zgo zho naa

ladzguiib, ible sacsı zho naa, sac guiedz ne gdziıntaa naa miñ co rnee Espıritu Sant teed naa. ²⁴Lo guielxtseeb co no naa per rquiad zdoo naa xquielmban naa; miñe nziuuraa lo naa, laga gdeeda diidz ib laa naa no gne lo miech pa lotaa rleynie Dios zho, zeena ine gley naa csiaal naa dziin ne bzo Jesús naa nu quiaayun naa. ²⁵Rien naa lo grè to ne nac to zha ne bialseed naa gocnan to zha nac xnèz Dios, gandraa to lo naa lo guidzliu rii. ²⁶⁻²⁷Laa naa pseedle to grèse miñe nac Xtiidz Dios, ib peet pqueetsd naa lo to; gacxe waa, tel cho tib to nitlo, led xtoldraa naa ga. ²⁸Golguien sca, jgolquianap to, ni scagaa golquianap grè zha ne zo to lo! jGolwi ganle xnèz Dios no zho, haxta lo cruz gut Xpèed me bdiizh me xtol zho! Ni stiba, jib Espıritu Sant bzo to yquianap to zho zigne rquianap baxtor xpècwxiil zho!

²⁹jNsin golso! Sac rienle naa zeene laa naa gbiche lo to, ib zrieequia grè zha ne guiaad guiaadquidie to, zguib zho zha gnitlo zho to zigne run grè coyot mècwxiil. ³⁰Haxta lad to, zrieequia bla zha ntseeb ne ctsèe Xtiidz Dios, squiil zho to tsienal to zhiwseed zho. ³¹Gacxe waa laa naa rne lo to, jnsin golso! Golsoladz ganle tsonraa iz, dze guieel pseed naa to, blactaa biin naa pso naa diidz lo to tib tib to zaacse gac to. ³²Dios nac men ne gacnien to, laa naa rsan to ladznia me grèse to; Xtiidz Ndzon me miñe rnee ganle zha nquialadzttaa me to, lèew lozh quix biini to dib zdoo to gnalo to me, zeena ygaa to zaatne gneedz me cuèz to grè to zha ne noraa xnèz me.

³³Waltaa ib rzobladd naa dimi, ib rzobladd naa lar, guiep naa tebaa zha yquianie naa grè ncuaan co. ³⁴Len dze ne blèz naa lo to, gon to ganle niapse nia naa bdziniaa naa ncuaañe pquiin naa, ncuaañe pquingaa grè zha ne bzènie naa. ³⁵Ga blu naa lo to ganle, ib none dziuun ne dziin zeena grieelo dziuun ne xyudar zha ne guieñd pe yquii. Ib riaanladzd naa xtiidz Jesús men ne rnabey ne, zeene znu bnee me: “Mazdraa nroob guielbley ne rgaa zha ne rgad, lèdle zha ne rad.”

³⁶Zeene blozh bnee Pabl lo zho, laa me pquitsgzhıb ga grè me zho bzodiidznie zho Dios. ³⁷Blozhse ga, tibga tibga zho wbig bnee zho lo me, bnaaz zho nia me, bdeedz zho me. ³⁸Mban rac zho psilo zho roon zho, rsoladz zho rëb me gandraa zho lo me. Blozh ga, güey zho güeyzonèz zho me zaatne sèeb me barcw.

Biire güey Pabl Jerusalén

21 Blozhse bzhieñ no nia grè zha Efés co, laa no bziaab barcw, laa no zio bdziñ no ti lo guidzliu win ne no lo nisdoo co lè Cos. Biini liu brie no ga bdziñ no lo sti guidzliu win co lè Rodas. Rodas brie no bdziñ no guiedz Pátara. ²Guiedz Pátara, ga bziaab no ti barcw ne zie nèz xtan zha Fenicia. ³Zeene zieded barcw co ngali zaatne riaan guidzliu win ne lè Chipr, bui no nèz revés rlupaa guidzliu co. Laa no zio haxta bdziñ no guiedz Tir, xtan zha Siria, ga blèz barcw co biet grè yo ne neya.

⁴Zigne bdziñ no ga bdzieet no barcw bziaab no lad guiedz co, biodziel no grè zha ne riladz Jesús ga; bliazaque no lo zho ga ti zhmal. Dzigo psiaab Espıritu Sant guic zho rnee zho lo Pabl, tebaa siguiel me mazd tsied me Jerusalén.

⁵Zeene laa no brieë ga, grëse zha ne riladz Jesús grë tseeel zho grë xpëed zho bïaad-zonëz zho no ro nis co; dzigo lo yuzh co ga pquitsgzhïb no grë no, bzïodiidznïe no Dios. ⁶Blozhse bzhïeeñ no nïa zho, laa zho wbi ga.

⁷Brieë no Tir bdziñ no guiedz Tolemaid, ga bio no bioquiaabdiuzh no grë zha ne riladz Jesús ga, bliiaz no lo zho tib dze. ⁸Biini liu brieë no ga bdziñ no guiedz Cesarea, ga biobiaaz no lidz ti men ne noneeque Xtiidz Dios lo miech, lë Lip. Lëë Lip co ga gogza sxoops zha ne bzo been xyudar zha poxtl. ⁹Quianie me tap ndzooop ne gard ctsieelnïa, gzase zho bdeed Dios guielbiini lo zho rnee zho tel pe nac minë racladz Dios gacnan miech.

¹⁰Nzïanle dze goc no no lidz Lip, zeene blanso ti men ne zïaad nëz Judë lë Agab, biadquiaabdiuzh me no. (Ye me rnee tel pe nac minë racladz Dios gacnan miech.) ¹¹Zigne blanso me lo no ga, bzhën me lar ne rbe len Pabl, pxïdoo mew nïa me ni pxïdoo mew ni me, në me:

—Znu gon rnee Espïritu Sant gzobdoo zha Israel bizhuan lar rii, co zho me ladznïa zha Roma zeene laa me gdziñ Jerusalën.

¹²Grë zha ne riladz Jesús ga, zeene bin zho sca rëb men co, rnab zho lo Pabl tsied me Jerusalën, yeque no sca rnee lo me. Mban rac no rdziïon no.

¹³Pquiaabaque me në me lo no:

—¿Pe nac dzigo roon to? Tel naa laa naa bleeladzle naa maase gzobdoo zho naa Jerusalën, niicxe haxta gut zho naa waa porne rleynie naa Jesús. ¡Loxaque rsïaab guielnë to naa i gon squi rac to!

¹⁴Bdzïanse no nlid yquiaadiag me xtiidz no, dzigo mazd psaan no, rdzieets no:

—Golgotsaa csaan ne, Diostaa nan dien zha gaca.

¹⁵Bdedse ga bzhixcuaa no laa no brieë ga, laa no zïo nëz Jerusalën; ¹⁶blalaa zha ne riladz Jesús Cesarea ga bzënal zhïts no, bzënie zho ti men Chïpr lë Mnasón. Izle riladz me Jesús, lidz me biobiaaz no zeene bdziñ no Jerusalën.

¹⁷Grë zha ne riladz Jesús Jerusalën, rley zho zeene gon zho laa no bdziñ, blëzlo zho no.

¹⁸Biini liu co güeynie Pabl no lidz Jacob bioquiaabdiuzh no me, lëëtaque laa grë zha rnabey ne zo lo grë zha ne riladz Jesús Jerusalën ga, ndxie ga.

¹⁹Blozhse pquiaabdiuzh Pabl grë zha co, dzigo psilo me bzodiidz me lo zho grëse zha gocniën Dios me güeyseed me grë miech stib guiedz. ²⁰Zeene bin zhow per nli rley zho, rdeed zho xquïzh lo Dios; dzigo rëbchaa zho lo me:

—Bets, ye zha Israel gon ndaldoo zho zililadz Jesús; per racladz zho tïbaque tsïenal zho minë rnabey Xley Moïés. ²¹Grë zha ne no nu bin zho laa luu güeyseed grë men wladz ne no guiedz zit, nac diidz blu luu lo zho tsïenaldraa zho Xley Moïés, codraa zho xpëed zho bey, niicle tsïenaldraa zho grë zhiwseed xmengol ne. ²²¿Zha ganle dziuun ne? Sac zeene gon zho laa luu blanso, ïble zïaadguïb zho luu. ²³No tap bets ne nu zïaadyoble gun zho minë bnee zho lo Dios; minë gaca güey ²⁴güeynie zho yadoo, golgun grë minë rnabey ley, bdiïzh ctsïïb guïc to gza to; zeena ga gan grë zha rii ganle nlid grë minë rnee miech luu ga.

²⁵Sanguē grē miech stib guiedz zha ne riladz Jesús, laa no pxeelle diidz lo zho zigne bzodiidz ne nu: grē ma ne rut miech rgogon zho lo zhimdio zho, gowd zho bëel co; grē ma ne rxieed ren zeene ret ma, gowd zho ma; ni niicle grēgaa ma ne gut zho, ib gowd zho xchen ma; grē zha bgui, nodne tsonie zho wnaa ne nacd tseeel zho; niicle wnaagaaw, nodne tsonie zho mgui ne nacd tseeel zho.

Bnaaz zho Pabl

²⁶Laa Pabl zienie gza zha co. Biini liu güey me gza me zho güeygun zho miñe rnabey ley; blozh ga güey zho yadoo güeynie zho diidz pa dze gza miñe quiayun zho ga, zeena gal dze co laa zho tsienie gon ne gdeed zho tib tib zho. ²⁷Laa zeene merle gza gadz ngbidz ne quiayun me miñe rnabey ley ga gza me zha co, lega naclew gon bla zha Israel ne ziaad nēz Asia laa me no len yadoo. Nacne wbig zho ²⁸bzhen zho zhicw me, roptsie zho rnee zho:

—¡Grēse to menguietz! ¡Golgun xyudar no gnaaz ne men rii! Sac lēē me ga quianzē quiaseed me zha wladz glēēnie zho ladz zho, rnee me lo zho gundraa zho grē miñe rnabey ley, gapdraa zho respet yadoo rii; haxta grē zha zit zizēēbnie me nu. ¡Noguitniele me lugar nda rii!

²⁹Sca rnee zho, sac gon zho Pabl len guiedz Jerusalén ga ziegrop me ti zha Efés lē Tróximo, dzigo rzac zho güeynie me zha co len yadoo.

³⁰Pe ga bin grē menguietz, grēse zho bdzin wbigbe zho lo Pabl, bdozni zho me blee zho me len yadoo, zigne blee zho me ga lēēlēd psioog zho ro yadoo; psilo zho noguin zho me, nan zho gut zho me.

³¹Zeene gocnan men ne rnabey lo menguiib ne ndxie ga laa ruid co noyac, ³²lēēlēd brieenie me grē xmenguiib me ni grēraa zha ne rnabey lo zho. Zeene gon grē zha ne noguin Pabl ga, laa grē menguiib co bdzin, dzigora blēz bdiñ zho me.

³³Dzigo wbig men rnabey co, bnabey me grē zhaguiib co bzoob zho Pabl chop caden. Bnabdiidz me lo grē miech co dien cho nac Pabl, pe quiayun me ne scataa rlēēnie zho me. ³⁴Psilo zho nguiedz roptsie zho, zhaase zhaase ncuane rcaadzdoł zho me. Gonse men rnabey co rlud dien pepaa rlisqui zho, nacne bnabey me grē menguiib co ziesan zho Pabl yu ne rbēzpa zho.

³⁵Laa grē menguiib co csilo soquianie Pabl lo scaler ne rdzin ro yu co, gataa mazd bzoobyan zho me, sac ntseeb rac grē miech co; ³⁶nalbe zho, roptsie zho rnee zho:

—¡Golnitlogazh men qui! ¡Niinagazh golgut me!

³⁷Laa grē menguiib co csēēble me len yu co, zeene bnee me lo men rnabey co, rēb me:

—¿Pe zrieelo gne naa ti xtidz naa lo luu?

Dzigo rēb men rnabey co:

—¿Mod rac luu rnee luu xtiidz zha Gres? ³⁸¿Led luud ga dzigo nac ti zha Egipt ne psilo racntseeb lo gobiern len dze rii? Nac diidz, tap mil zha ntseeb nacie zho, laa zho ziese nēz dan.

³⁹—Led naada —rëb Pabl— meṅ Israel nac naa. Guiedz Tars gol naa, lëë guiedz co nac mine nroobraa lo grë guiedz ne ngab Cilis. Na laa naa rnab lo luu, been guieṅzaac bneedz diidz gne naa chop lan xtidz naa lo grë miech qui.

⁴⁰—Zaca —rëb meṅ co.

Lo scaler co zo Pabl blunia me lo grë miech co cuedze zho. Zeene laa zho biacdze, dzigo psilo me bnee me xtiitsë me grë me zho, rëb me:

22 —Grëse to meṅ wladz, laa naa rzaac to zig ti bets naa zig pxozgaa naa, golquiaadiag mine gne naa nu ganle, zeena gacnan to quiaayund naa mine rquiaqui to naa.

²Zeene gon zho xtiidz zho rnee me, grëse zho dzese bre zho; dzigo rëb me:

³—Meṅ Israel nac naa, guiedz Tars xtan Cilis ga gol naa, per Jerusalén nu broob naa, nu bio naa wseed, maistr Gamaliel goc meṅ ne pseed naa. Pseed me naa grëse zigne nac xley xmengol ne, grëse zigne nac zhiwseed zho; pseed me naa tibaque noxco naa runnon naa lë Dios zigne noxcoque tow. ⁴Mine been to nu nadze, ye naa blactaa squi ben naa ptsidiṅ naa grë zha ne riladz Jesús, pquianaṅ naa ygaa zho guet zho; mgui wnaasaque razobdoo naa zho lidz zho rasan naa zho ladzguiib. ⁵Meṅ ne nac pxoz nroob ni grë mengol ne goc wxtis guiedz rii len iz co, zha co nanpaa ganle nli sca ben naa; sac zha bneedz ti xtiidz zho bi naa ndzinnie naa lo zha ne rnabey xyadoo grë men wladz ne no Damasc, zeena niacnie zho naa nianaz naa grëraa zha ne no ga riladz Jesús, nialnie naa zho Jerusalén nu nded zho caxtigw.

⁶Min copaa nagon brie naa nu za naa nëz co. Zhile gdziṅ naa Damasc, zig rwe ngbidza tibaque zeene ziaad ti biinidoo nëz zhan gbaa biab lo naa. ⁷Biabgagh naa liu, ga nix naa bin naa ti tsi meṅ co rnee me lo naa: “Saul, Saul, çpe nacne quianaṅ luu naa?” ⁸“iBeen guieṅzaac bnë dien cho luu!”, rep naa. Dzigo në meṅ co lo naa: “Naa nac Jesús meṅ Nazaret ne squi quiatsidiṅ luu.”

⁹Grë zha ne zanie naa ga, bdzieb zho gon zho biini co, per biend zho pe rnee meṅ co lo naa. ¹⁰Dzigo rep naa lo me: “Bzhiguiel bnë dien, çpe racladz luu gun naa niina?” Nèchaa me: “Guche i, güey Damasc ga gnë zho ganle pe nac mine no gun luu.”

¹¹Dzigo bzhen zha ne zanie naa ga nia naa, bdzinnie zho naa Damasc; sac lo biinidoo co pcow lo naa. ¹²Ga no ti mgui lë Ananí, zëëb diidz rioxco me grë mine rnabey ley, grëse meṅ wladz ne no ga nanpaa zho ti meṅ wen nac me; ¹³dzigo biaad me zaatne blëz naa ga, në me lo naa: “Saul, niinagagh gon bets laa luu gbiire gwi stib.” Zigne sca bnee me laa lo naa biac, gongagh naa me. ¹⁴Dzigo nèchaa me lo naa: “Dios meṅ ne bliladz grë pxozgol ne, ib meṅ co bzooblo luu gacnan luu pe nac mine racladz me gac, me bzooblo luu gunbey luu meṅ ne nacle diidz ga cxeel me lo guidzliu, ni gon luu tsi meṅ co. ¹⁵Ib laa me bzo luu tsienee luu lo miech mine bzhaac luu ga, mine bin luu ga. ¹⁶Guso i sca, zeena chobnigagh luu. Dib zdoo luu bredz Jesús, bnab lo me csanmbe me luu lo xtoṅ luu.”

¹⁷Zeene laa naa blanso Jerusalén nu, tib dze lëëtaque no naa yadoo nozodiidznie naa Dios, ¹⁸tibaque blulo me lo naa në me: “Na zeena biobladz

briee Jerusalén nu, sac ib gliladz grè miech rii miñe gnee luu zeene gnee luu xtidz naa lo zho.” ¹⁹“Per runbey zho naa waa”, rep naa lo me, “nanpaa zho scataa ra naa grè yadoo raxizhoo naa grè miech ne riladz luu, rnabey naa rguin zho zho ni rio zho ladzguiib, ²⁰niicle zeene beet zho Xteb men ne bnee xtiidz luu ga, ye naa bded diidz beet zho me, haxta pquianaap naa xab grè zha ne bdeedquie me.” ²¹Dzigo nē me lo naa: “Na zeena pcaaniob nēz briee nu, sac gon laa naa cxel luu stib dan tsienee luu xtidz naa lo grè men zit.”

²²Zeene bin zho sca rēb me, bdeetraa zho diidz nee me, psilo zho nguiedz roptsie rnee zho:

—¡Ib riegualdraa gban men qui! ¡Golnitlogazh me!

²³Nguiedz zēēb tsi zho, ib rioogd ro zho, masaque rdzib zho xab zho ni rchoon zho yudie laglaa.

²⁴Dzigo psēēb men rnabey co Pabl len yu co, ni bnabey me grè menguiib co quin zho Pabl, zeena cuero Pabl dien pe nac ncuaane been Pabl, zha nac ne scataa rac grè miech co lo Pabl. ²⁵Laa zho blozhle pxidoo me, laa zho csilo quin me, zeene rēb me lo sti zha ne rnabey lo grè zhaguiib co:

—¿Pe nonguiela dzigo ne lega quin to ti zha Roma, ni gardle gac guielwxtis dien pe nlipaa no xfalt zho?

²⁶Zeene bin zha co sca rēb Pabl, lēēlēd güeynie zho diidz lo men ne rnabey zho ga, rēb zho:

—¿Zha gon gun luu? Sac zha Roma me nac mgui co.

²⁷Dzigo güey men rnabey co rēb me lo Pabl:

—Bneeli lo naa, ¿dien pe nli na men Roma nac luu?

—Nliw —rēb Pabl—, zha Roma nac naa.

²⁸Rzedz yan men rnabey co rēb me:

—¡Naasi zha Roma nac naa, ni nroob dimi bdizh naa bgab naa lo zha Roma! Dzigo rēbchaa Pabl:

—Sangue naa, desde gol naa bgab naa lo zha Roma.

²⁹Grè zhaguiib ne bzo nguin Pabl ga parne cuero me, lēēlēd wbiche zho lo me, niicle men rnabey cow bdzieb me zeene gon me nli zha Roma nac Pabl, sac nrooble nac falt ne niun me ga lega nabey me nguin zho ti zha Roma.

Bnee Pabl lo wxtis Israel

³⁰Zeene biini liu, bnabey men rnabey co pcaalsa grè zhipxoz non zha Israel ni grè men ne nac zhiwxtis zho, sac racladz me gacnan me dien pepaa nac ncuaane rquiaqui rlēēnie grè miech co Pabl. Dzigo pxadz me Pabl, blee me Pabl bzo me Pabl lo zho.

23 Dze bui Pabl lo grè zha wxtis co, dzigo psilo Pabl bnee me rēb me lo zho:

—Laa naa rneli lo to nu ganle, mbe zdoo naa, Dios zobwi ganle zanaId naa ncuaane rdziguiend me.

²Zeene gon Ananí (men ne nac pxoz nroob) sca rēb Pabl, bnabey me zha ne zo gax lo Pabl, rēb me:

—¡Golcap ro zha qui!

³Dzigo rëbchaa Pabl lo me:

—¡Tebaa squique cap Dios ro luu! ¡Nac luu gon zig ti lidz nguts, loxaque nëz zhitssew stib rna! ¿Pa rquiin ne laa luu zob i? Led luu zo par cobey luu tel no pa ti ley ne zaguits naa, na lel luule noguiitsa bnabey luu bdiñ zho naa.

⁴⁻⁵Pquiabbe zha ne ndxie ga rëb zho:

—¡Bien ganle lo pxoz nroob i, lo men ne quiayun xtsiin Dios i noquiabro luu!

—Golgun dispensar —rëb Pabl—. Nand naa lëë pxoz nroob i, tel niaca mine nan naaw ne scad naa; sac zhobnee lo Xtiidz Dios: “Gneenëd luu zha ne rnabey ladz luu.”

⁶Zeene bien Pabl grol zha wxtis co ziana zhiwseed zha saducé, zgroz zho ziana zhiwseed zha farisé, dzigo psilo me nguiedz bnee me rëb me lo zho:

—Grëse to bets, golgona ganle, zha farisé nac naa, niiclegaa pxoz naaw farisé goc me. ¡Ni porne riladzpaa naa gon zrieeban zha ne ret, min co gane znu zo naa lo to nu!

⁷Zeene sca rëb Pabl, psilo zho bdiidiidz zho. Goc zho chop dii, ⁸rree zha saducé rnee nlid grieeban zha ne ret, nlid no anjl, nlid no espíritu; laa zha fariséгаа na rnee zrieeban miech, no anjl ni no espíritu. ⁹Nguedz zëëb tsi zho noneelsa zho, dzigo gusoque bla maistr ley ne nacgrë zha farisé, rëb zho:

—Laa ne bdzianle ganle, ¡ni ti falt rapd mgui qui! ¿Pe nadien dziuun ne? Nend ti espíritu ga, ti xanjlgaa Dios ga sca bnee lo me.

¹⁰Zeene gon men ne rnabey lo menguiib ga, laa lo xtil zho noyac nroobraa, bdzieb me rëb me nend znuse gzhiizh zho Pabl; bnabeyaque me gocredz menguiib güeyxi zho Pabl biire güeysan zho me len yu ne rbëz zho ga.

¹¹Gol guieel co, blulo Dios lo Pabl rëb me:

—Gdziebd luu, zigne bnee luu xtids naa lo miech Jerusalén nu, scaque none tsienee luuw lo grë zha ne no Roma.

Gocladz zho niut zho Pabl

¹²⁻¹³Zeene biini liu, ndziibsrää choo zha Israel bnediids rëb zho gowd zho, ni tib ro peet guied zho haxta gut zho Pabl; telne gund zho mine rnee zho maase csiaabzi Dios zho. ¹⁴Dzigo güey zho lo pxoz ne rnabey, lo grë zha ne nac zha non lo menguedz, bzodiids zho mine no guic zho ga, ni rëb zho:

¹⁵—Nana gon, golnab lo men ne rnabey lo menguiib cxeel me Pabl lo to gzhe, golquiaalo noraa pe lozh yquiep to Pabl; laa no nsinle ziobmbiaaz. Zeene laa zho tednie Pabl, ga dziuut no Pabl.

¹⁶Dieen zha bin ti xingan bzian Pabla, nacne lëëled güey win yu ne rbëz menguiib ga güeynie win diids lo Pabl. ¹⁷Dzigo bredz Pabl ti zha ne rnabey lo menguiib co, rëb Pabl lo zho:

—Bzhiguiel güeynie mëëd rii lo men ne rnabey to, sac laa win no tsienie ti diids lo me.

¹⁸Bzhen men rnabey co nia mëëd co, güeynie me win lo men nroob ne rnabey zho, rëb me:

—Laa naa zialnie mëéd rii nu me, dien pe nac diidz ne ziaadnie win lo luu; Pabl ne no ladzguiib ga bnaab lo naa guialnie naa win.

¹⁹Dzigo bzhen men r nabey co nia win, güeynie me win stib nöz, bnabdiidz me lo win dien pe nac diidz ne zienie win lo me. ²⁰Dzigo rëbchaa win:

—Laa zha Israel gon bnediiz gnab zho cxeel luu pxeey naa Pabl lo zhiwxtis zho gzhe, yquiaalo zho gnë zho noraa pe yquiep zho me. ²¹Bzhiguiel gliladz luu xtiidz zho, sac ndziibsrää choo zha ne nacgrë zho rëb zho laa zho tsiesoblan nöz gutgash zho me zeene laa me ted. Biaan zho diidz grë zho, gowd zho, ni tib ro peet guied zho haxta gut zho me; haxta rëb zho tel laa zho gund min co maase gdzibdee Dios zho. Ible zun zhow, loxaque quiambëzse zho dien pe guiab luu.

²²Blozhse ga dzigo bzonöz me win, ni pso me diidz lo win choot lo gneed win ne laa win güeynie diidz lo me.

Güey Pabl lo gobernador Wech

²³Lëälëd bredz men r nabey co chop zha ne zo lo menguiib, rëb me:

—Laa zhaguiib gon none griee naguiel tsie zho Cesarea, na zeen golzo zha ne tsie; none tsie chop gayoo zha ne sëni, tsongal tsii zha ne sob guay, schop gayoo zha ne güey lanz. Naguielgazh, zig rlozh xtsee none griee zho nu; ²⁴sac laa zho none tsiesan Pabl Cesarea. Ni golcoxab ti guay ne sob Pabl, sac none ndip ndaan me gdzinnie to me lo gobernador Wech Cesarea.

²⁵⁻²⁶Dzigo pquiaa me ti guits ne güey zho gdzinnie zho lo gobernador, rneew: “;Diuzh Gobernador Wech!

’Naa nac Claud Lisias, laa naa rxel guits rii lo luu gzodiidz naa ganle zha nacne nabey naa ziaadsan zho men qui zaatne zob luu i.

²⁷Zha Israel bnaaz me gocladz zho niut zho me, laa zeene gocnan naa zha Roma nac me nacne pxeelaque naa zhaguiib güeyla me lo zho. ²⁸Gocladz naa niacnan naa dien zha nacne rlëenie zho me, dzigo bianie naa me lo zhiwxtis zho. ²⁹Ga gon naa led ncuane rnad rlëenie zho me; tel zha nac xley zho ncuane co rlisqui zho; nacda ncuane guiab ne riegual guet me, tsogyugaa me ladzguiib. ³⁰Zeene gocnan naa laa palal zho bnediiz gut zho me, nacne bnabeyaque naa ziaadsan grë menguiib qui me lo luu i. Niiclegaa zha ne rlëenie mew, laa naa rep lo zho guiaad zho lo luu i, zeena i gnë zho dien zha nacne rlëenie zho me.

’Lëéd bii gdzieel ne sca dien.”

³¹Zeene laa liu pcow, zig rlozh xtseew laa grë menguiib co pcaanie Pabl nöz; dib guieel bio zho nöz bdzinnie zho me guiedz Antipatris. ³²Biini liu, loxaque zha ne zob guay ga pcaa nöz zienie zho me Cesarea, laa grëraa menguiib co wbire bdzin Jerusalén stib.

³³Zeene bdzin zho Cesarea, bdeed zho guits ne zienie zho ga lo men ne nac gobernador, dzigo laa zho psan Pabl ga.

³⁴Blozhse blab me lo guits co, dzigo bnabdiidz me lo Pabl dien pa guiedz gol Pabl. Dzigo rëbchaa Pabl lo me, zha Cilis nac Pabl.

³⁵—Nasca —rëb me—, zeene laa zha ne rlëenie luu glanso nu, dzigo yquiaadiag naa dien zhapaa nac xtil to.

Dzigo bnabey me, pquianap menguiib Pabl zaatne nac len xyulow Herod.

Gocredz Pabl lo gobernador Wech

24 Zeene goc gaay ngbidza, laa Ananí men ne rnabey lo pxoz bdziñ ga, gza me blalaa zha ne nac zha non lo menguietz Israel, zienie zho ti licenciad lë Tértulo; grë zho laa zho zie zienie zho diidz lo gobernador pe nacne rdilnie zho Pabl.

²Dzigo bnabey gobernador gocredz Pabl. Zeene laa Pabl bdziñ, psilo licenciad co bzeet me grë ncuane rquiaqui zho Pabl, rëb me:

—Xquizhdoo luu gon gobernador, ne squitaa ndzielguic luu rien luu zha gnabey luu, gane zaacse mban menladz no niina, blactaa ncuane yquini lo no noyun luu. ³Rzac zdoo now, tel pa lotaa zo no rsoladz no luu nac luu men ne rnabey no. ⁴Nli nonguielda dziunneed no luu, per been ti guielnzaac pquiaadiag ganle pe nac ncuane rlisqui no quiyun mgui ne zo lo ne nu.

⁵Masaque nac me lo no zig nac ti guielguidz dox ne rded, grëse guiedz quianzë me noyungüet me menladz no gacndaan zho lo men ne rnabey no. Lëe me ga zo lo grë zha ne rnee zho nazaren. ⁶Zeene bgaa me, lëëtaque laa me no len yadoo ro ne zob Jerusalén quiyunnguzee me xyadoo no. Nacne gocladz no gagazh nguizh me falt co zigne rnabey xley no; ⁷per biaad Lisias grë xmenguiib me ntseeb rac zho biaadla zho me lo no. ⁸Na nagon zac luuzhal yquiep me, zeena gan luu ganle nli quiyun me grë mine rnee no nu.

⁹Grë zha Israel ne zienal ga, pquiabbe zho rëb zho nli quiyun me grë min co.

¹⁰Dzigo blunia men ne nac gobernador ga lo Pabl gnee Pabl; nacne psilo Pabl bnee me rëb me:

—Nanle naa ziele iz zob luu nu rquiaadiag luu grë ncuane rac xtan no nu, gane rley naa zial naa lo luu par yquiaadiaggaa luu ganle zha nac xtidz naa.

¹¹Na rac tsiipchop ngbidz ga bdziñ naa Jerusalén, biagan naa Dios len yadoo nroob ne zob ga (niicle tel niaca mine griee diidz ganle). ¹²Laa naa bia Jerusalén biagan naa Dios, choot biatilnied naa ga; niicle len grëragaa yadoo wina, ro nëzgaaw, wlaltaa noquiild naa miech cho lo gacntseeb zho. ¹³Grëse mine rquiaqui grë zha qui naa grieelod glu zho nliw, sac led ncuane gocda.

¹⁴Mine nac diidzli, niina wriñ psan Dios ti Wseed Cub dien zha guiaanwen miech lo me, zha qui rzac led zhiwseete Diosa, sangue naa dib zdoo naa zanal naaw, dib zdoo naa quiyun naa dziin lo Dios men ne bliladz pxozgol no; ni scaquegaa, noxco naa grëse mine nac ley. Rliladz naa grëse mine bnee grë zha ne biadteed xtiidz me. ¹⁵Rliladz naa dzin dze ne cueeban Dios grëse miech, zigtaa zha wena zigtagaa zha ntseeba, ni haxta zha ye zho rliladz min co. ¹⁶Ni min copaa nagon gane tibaque noxco naa guiaanmbe zdoo naa, guntaldraa naa xtol naa zigtaa lo Diosa zigtagaa lo samiech naaw.

¹⁷Nod naa Jerusalén tibaque, blale iz goc no naa ladz men zit; dze ne bdziñ naa Jerusalén ga, laa naa bia porne zasan naa ti gon lo menladz naa ni zanie

naa ti gon ne gded naa lo Dios. ¹⁸Min co nagon nacne no naa len yadoo zeene gon gre zha qui naa. Blozhle ben naa gre mine rnabey xley no rdziun no zeene sca riosan no gon, zeene laa bla zha Israel ne no nez Asia blanso lo naa ga; per choot miech taf ndxienied naa ga, niicle choot noquiildgaa naa. ¹⁹Zha co nagon rieguial niaad nu, nlisqui zho tel pe ncuane rzac zho nonguield noyun naa ga. ²⁰Zha ne ndxieгаа nu niina, zac gne zho telne briequia falt ne rquiaqui zho naa zeene gocredz naa lo wxtis Jerusalen. ²¹Te goon falt ga naye ben naa, lee gdib nguiedz bne naa lo zho rep naa: "Laa naa racredz lo to, zig nac zeene falt ga rap naa loxaque ne riladz naa zdzin dze ne griebean miech." Scase nagon naca.

²²Nanle gobernador co led ncuane gund zha ne riladz Jesus ga rquiaqui zho Pabl, dzigo bnee me lo zho cuéz zho nieeda gdzin Lisias, dzigo dien zhapa guiaan xtil zho. ²³Bnabey me zha ne zo lo menguiib yquianap zho Pabl, ni pso me diidz zaacse gac zho lo Pabl, gdeed zho diidz ted gre zha ne ndzieeldiidz Pabl tsiegan zho Pabl.

²⁴Goc blalaa ngbidza, bnabey gobernador co gocredz Pabl lo me grop tsieel me Drusil, ti wnaa Israel. Laa me bredz Pabl, sac racladz me yquiaadiag me dien zha nac zhiwseed Jesus. ²⁵Zeene bzeettaa Pabl, zha nac guielwxtis, zha none tsoxco miech gund zho mine riaabtaa guic zho, ni zha gdzin dze ne gon Dios guielwxtis, dzigotaa laa me bdzieb, rebchaa me lo Pabl:

—jLeelewga na nadien! Na zeene guioba, dzigo naazhal cuedz luu guiaad luu ziodiidz ne stib.

²⁶Zhiga zhiga rbedz me Pabl, sac quiambez me dien pe gdziibd Pabl dimi csilaa me Pabl.

²⁷Zeene goc chop iz sca no Pabl ladzguiib ga, laa Wech brie guielgovernador, bzeeb ti men le Pons Fest. Niicle brie Wech per psilaad me Pabl, sac racladz me dien zha guianziuraa me lo gre zha Israel.

Güeyzo zho Pabl lo gobernador Fest

25 Zeene goc tson ngbidz bdzin Fest Cesarea pcaania me guielgovernador, laa me brie güey me Jerusalen.

²Gre zha pxoz non ni gre zha ne rnabey lo menguiedz Israel, zeene bin zho laa Fest bdzin Jerusalen leeléd güey zho lo me güeyxob zho xdemand Pabl; ni ³bnab zho lo me cxeel me Pabl Jerusalen. Laa zho rnab min co sac laa zho bnediidzle, nez tsiesoblan zho, yquiambez zho ted Pabl gut zho Pabl. ⁴⁻⁵Per bdeete Fest diidz, reb me laa Pabl nole ladzguiib ga, tel zha ne zrieelo tsie, ga glisqui zho tel pe nac falt ne rquiaqui zho Pabl; benque zlase dze laa me gbiire guey nez co dzigo zac tsienal zho zhits me.

⁶Ndziibraa ti zmal blez me Jerusalen ga, dzigo laa me biire zey Cesarea. Zna dze bdzin me biinigazh liu co güey me yulow, bnabey me gocredz Pabl. ⁷Laa gre zha Israel ndxiee ga, wbig zho lo Pabl ndal gre falt nroob ne rcaadzol zho me, per loxaque diidzsew, guiend zha glu zho ne nlipaa goca. ⁸Dzigo pquiab Pabl reb Pabl:

—Grëtaa minë rquiaqui zho naa i, ni tiba nlid. Wlaltaa gard quits naa xley no, gard quitnie naa xyadoo no, niicle gardgaa gacntseeb naa lo zhiwxtis zha Roma.

⁹—¿Pe racladzdgaa luu tsie luu Jerusalén? —rëb Fest—. Ga gbiire yquiaadiag naa xtil to i zeena glu dien chopaa rap dol.

Sca rëb me, sac racladz me dien zha guianzuiuu me lo grë zha Israel. ¹⁰Dzigo rëbchaa Pabl:

—¡Gad naa! ¡Nod pe nac ga naa ga, to rieguaļ guñ guielwxtis rii! Benque nan wen luu ganle peet falt nzëëbd naa lo zha Israel. ¹¹Teļ niaca minë nli ziyun naa pe guielntseeb ne raguiaļ naa guet naa, maase guet naa. Per na nannpaa naa ni ti ncuaane rquiaqui zho naa i nlid, ¿pe nac dzigo cho co naa lадznia zho gut zho naa? Laa naa racladz, mazd golneedz diidz tibaque ga naa lo zhiwxtis nroob ne, men ne zob Roma.

¹²Dzigo bzodiidz Fest grë me men rac ne nacnie me dziin; blozhse ga rëbchaa me lo Pabl:

—Guiend rson sca. ¡Teļ lo César racladz luu tsie luu, na maase tsie luu!

Gocredz Pabl lo Agrip

¹³Zeene goc bla zhmalā, laa rey Agrip grop wnaa ne lë Berenis bdzin Cesarea ga güeyquiaabdiuzh me Fest. ¹⁴Nzianlaa ngbidz blëz me ga, dzigo bzodiidz Fest lo me laa Pabl sca no ladzguiib ga, rëb Fest:

—Len dze ne bii nac Wech dziin biab ti mgui ladzguiib nu, ¹⁵laa len dze ne bia naa Jerusalén biaad grë zhipxoz non zha Israel, grë zha non ne rnabey lo zho, biaad-xob zho xdemand me lo naa ga, rnab zho lo naa gnabey naa guet me. ¹⁶Dzigo rep naa lo zho led scad run zha Roma guielwxtis, ib none gacredz me gnee me chop lan xtiidz me lo grë zha ne rzoob xdemand me, ga glu telne nli minë rquiaqui zho me togo nlidgaaw; ¹⁷nacne biaad zho nu. Zna dze blanso zho, biinigazh liu co bnabey naa gocredz me. ¹⁸Tibaque ni naa bod no pe ti falt nroob ne rquiaqui zho me, per zeene biaad zho yulow gon naa ¹⁹lëë gdib tel zha nac grë ncuaane riladz zho min co rlisqui zho, ni rlisqui zho pe nacne zianl me zhiwseed ti mgui lë Jesús, gutle men co ni laa me rnee mban me.

²⁰Zeene gon naa grë ncuaan co rquiaqui zho me nli riend naa zha gun naa, dzigo rep naa lo me, telne racladzgaa me zac tsie me Jerusalén ga dien zha guiaan lo xtil zho. ²¹Per bnëd me, lel bnab me tsie me lo César; gane niina laa me bii no i, nieeda gne naa lo César dien pa hor grieelo cxel naa me nëz co.

²²Dzigo rëb rey Agrip:

—Racladz naa gon tebaa zha yquiaadiag naa dien zha nac xtiidz mgui co.

—Na zho ganle —rëb Fest—, gzhegazh gnabey naa gacredz me.

²³Biini liu, ti lni nroob ne rac laa Agrip ni Berenis bdzin len yu ne rac guielwxtis ga, grë zha non ne rnabey lo menguiib, grë zha non lo menguedz, nal zho zhits me. Dzigo bnabey Fest gocredz Pabl, zeene laa Pabl bdzin ²⁴laa Fest pilos bnee, rëb me:

—Niina ne laa luu ziaad nu rey Agrip, scagaa to ne nac to men ne ndxiegrë ne nu nadze, golwi ganle lëë men rii nagon rlëëniedox zha Israel, racladz zho guet me; zigtaa Jerusaléna zigtagaa nuw ziyaadnab zho lo naa gnabey naa guet me. ²⁵Sangue naa gonle naa rapd me falt, par guiab ne rieguial guet me; per laa me bnab tsie me lo César, na laa naa no cxel me nëz co.

²⁶Nli rienđ naa dien pe nac diidz ne cxel naa lo César, ne squi lega ncuaane nliđ rquiaqui zho me. Min co nagon bnabey naa gocredz me lo to nu, ni laga laa luu ziaadgaa nu rey Agrip, bzhiguiel pquiaadiag ganle zha rzë xtiidz me; zeena togo zdziel naa pe nac diidz ne cxel naa gal dze ne laa me tsie nëz co. ²⁷¡Sac nonguielđ ga gun naa telne sobdoo me cxel naa me, ni tel cxelđ naa diidz dien pe nac xfalt me!

Bnee Pabl lo Agrip

26 Dzigo rëb rey Agrip lo Pabl, mezhah gnee dien zha naca. Nacne blis nia Pabl psilo Pabl bnee Pabl rëb Pabl:

²—Rley naa gon rey Agrip ne laa naa zial lo luu nadze, zeena gzodiidz naa lo luu gacnan luu ganle nliđ grë ncuaane rquiaqui grë menladz naa naa. ³Rley naa sac nan naa nanpaa luu zha nac grë xcostumbr no, grë ncuaane rliladz no. ¡Rnab naa lo luu sca, guieete luu yquiaadiag luu grë mine gne naa!

⁴Grëse zha Israel nan wen zho ganle zha mban naa, sac mëedlas naa bdziñ naa Jerusalén, ga broob naa. ⁵Nanpaa zho zha farisé goc naa, ni zha farisé nac zha ne rioxcora run grëse mine rliladz zha Israel. ⁶Per mazd gon, laa zho rlëë lo naa porne dib zdoo naa rliladz naa laa Dios beenle mine psan me diidz lo grë pxozgol no. ⁷Grëse zha Israel, zigne ziaad zho lo gza tsiipchop dii ne psan xmengol no, grëse zho dze guieel bii quiambëz zho gac min co. ¡Masaque rzac zho dol ga quiaayun naa rliladz naa laaw gocle! ⁸Haxta to, zeene rzet naa zrieeban miech, rzhidz to ron tow, ¿pe rzac to naa grielod Dios gun me min co?

⁹Glo nli ptsidil naa grë zha ne rliladz Jesús men Nazaret, masaque rzaac naa lëew ga quiaayun naa. ¹⁰Pe zhidaa zha ne blo naa ladzguiib Jerusalén, haxta grë pxoz non bneedz diidz ben naa grë min co; ni zeene rnabey zho ret grë zha co, ye naa rded diidz ret zho. ¹¹Nzian grë yadoo win bia naa, biasacsi naa zho haxta gneenë zho Jesús. Blëëniedox naa zho, haxta grë guiedz zit bia naa biaguib naa zho.

¹²Min copaa nagon brie naa za naa guiedz Damasc, masaque grë pxoz rnabey bneedz ti xtiidz zho bi naa laa naa za. ¹³Tel gan luu ganle rey Agrip zha bzhaac naa: Zig rwe ngbidza, tibaque zeene ziaad ti biinidoo nëz zhan gbaa biab lo naa, ni lo grë zha ne zanie naa ga, nroobraa nac biini co lo xbiini ngbidz. ¹⁴Grëse no biab liu, dzigo bin naa ti tsi men co rnee me xtiidz no, bredz me naa në me: “Saul, Saul, ¿pe nacne quiana luu naa? Lëëque luu gon nosacsi luu i, rzac luu zigne rzac ngon ne rcaanni, ni lëëque lo guiib lots ne rtseb zho ma riecaanni ma.” ¹⁵Dzigo rep naa: “Been guieInzaac bnë dien cho luu.” Nëchaa men co: “Naa nac Jesús, men ne squi quiatsidil luu. ¹⁶¡Na zeena

guche i, bzoli! Laa naa bredz luu zeena gun luu xtsin naa, tsiezodiidz luu lo miech mine blozh bzhaac luu nu, ni greragaa mine naraa gan luu. ¹⁷Peet tsienied guic luu, naa yquianaap luu, niicle zhaladz luuw niiclegaa zha zita peet grielod gun zho luu. Sac laa naa cxel luu gre guiedz zit ¹⁸tsienee luu lo miech gacnan zho mine nacpaa diidzli, zeena griee zho lo ncow gbig zho nez lo biini, griee zho ladznia mendox ygab zho lo Dios. Dib zdo zho gliladz zho naa zeena gun Dios zho perdon, ni yгаа zho zaatne gdzin grese zha ne mbe zdo.”

¹⁹Min co nagon rey Agrip nacne bioxco naa ben naa mine ne men co lo naa ga. ²⁰Glose Damasc psilo naa bne naa lo miech, ga brie naa bdzin naa Jerusalén, bia naa dib Judé ni gre guiedz zit, bne naa lo miech csaan zho gre xquieIntseeb zho gbig zho lo Dios.

²¹Min co nagon nacne rlëenie zha Israel naa, biadnaaz zho naa len yadoo ro ne zob Jerusalén, gocladz zho niutgazh zho naa. ²²Gocniën Dios naa, gane laa naa bii zo nu quiane naa Xtiidz me, zigtaa lo gre zha wina zigtagaa lo gre zha nona. Noseete naa miech stib wseed, sinque laa naa rne mine bzeetaque Moisés ni greragaa zha ne biadteed xtiidz Dios padzeela. ²³Tel zha, bzeetle zho ib sacci miech men ne cxeel Dios ga, ni me gac men ne glopaa grieeban, me gac zig ti biini ne gziini lo grese miech, zigtaa zha Israela zigtagaa gre men zita.

²⁴Tibaque nguiedz bnee Fest reb me lo Pabl:

—iBod rzhinle guic luu gon Pabl! iNe tibaque nagon rio luu wseed gane squi riots xtiidz luu!

²⁵—Coo, gobernador Fest —reb Pabl—, led rzhind guic naa. Niapse mine nac diidzli min co none naa, ²⁶laa rey Agrip zob i, me nan ganle nli gre mine rne naa nu. Tibliladz naa none naaw lo me, sac nannpaa naa nan me nli mine rnee naa, nacda ncuaane goc ngueets zhliaan. ²⁷iLed nli lee rey Agrip rililadz luu mine bzeet gre zha ne biadteed xtiidz Dios padzeela? Nannpaa naa rililadz luuw.

²⁸Pquiab rey Agrip, reb me lo Pabl:

—iZlalaque nu gon laa luu cole guic naa ye naa seeb xnéz Jesús!

²⁹Dzigo rebchaa Pabl:

—Nend zhilew o nroobragaaw, per rnab naa lo Dios led loxaque luudse seeb xnéz me, sinque ye grëraa zha ne noquiaadiag mine none naa nu niina; zeena yгаа to mine bgaa naa nu, per led znud sob caden rii nia to.

³⁰Gataa laa Agrip guso, gusoque Fest, gusoque Berenis ni grëraa zha ne zobnie zho, laa zho brie ga. ³¹Grese zho rnee peet xtold Pabl, rapd me falt ne guiab ne rieguial guet me, rieguialgaa tso me ladzguiib.

³²—Niacpaa nsilaa ne me —rnee Agrip lo Fest—, telne nabd me tsiepa me lo César.

Güey Pabl nëz Roma

27 Bdzin dzew, laa Fest bnabey tsie Pabl nëz Roma, dzigo laa zho psan Pabl ladznia ti men ne rnabey lo menguiib le Jul, gza Pabl zlalaa

zha ne no ladzguiib ga. Lëë Jul co rnabey lo tib dii men̄guiib ne rnee zho “Augusto César”.

²Ye no zional̄ zhits Pabl grop no Aristarco, laa no bziaab ti xbarcw zha Adramit zie grë guiedz ne ndxie ro nis nëz Asia, laa no pcaa nëz laa no zio.

³Biini liu co laa no bdziñ guiedz Sidón. Zeene bdziñ no ga, wen goc Jul lo Pabl bdeed me diidz güey Pabl güeyquiaabdiuzh Pabl grë zha ne runbey Pabl ga, grëse zho rleynie zho me blëzlo zho me.

⁴Ga brieë no bdieed no tib ro guidzliu win ne lë Chipr, psaac guidzliu co palal, sac psilo rrieë me rtsire me barcw ne zio no ga. ⁵Laa no zio, bdieed no gax ro guidzliu ne nac xtan zha Cilis ni xtan zha Panfil, bdziñ no ti guiedz ne ndxie xtan Licia lë Míra; ⁶ga bdzieet no barcw ne zio no ga. Lëëtaque noguib Jul sti barcw ne guio no, laa ti xbarcw zha Alejandrí no greeë ga tsie nëz Italia, dzigo bziaab no barcw co laa no zio stib.

⁷Tsow ga zie barcw co, nzian dze goca, nen dzigoraë bdziñ no gax guiedz Gnid; ib rbëzdaque me, nacne bguib zho dien̄ pa nëz zhi rcaan̄ me, dzigo güeynie zho barcw co nëz Cret. Tib ro guidzliu win co zio no bdieed no Salmon; ⁸nen bdziñ no zaatne rnee zho Buenos Puertos, gaxle ga riaan̄ ti guiedz lë Lasé. ⁹Nrooble dze goc no no lo nis, len̄ dze co laa mëë nal̄ psilole ni zëëb diidz gacd së barcw len̄ mëë co, nacne bnee Pabl lo grë zha ne zienie no ga, ¹⁰rëb me lo zho:

—Gol̄gona gan̄le, tel̄ne laa ne greeë nu len̄ dze rii, rgobey naa ib znitlonie ne barcw rii lo nis.

¹¹Laa ne niacnie Jul Pabl niac mine rëb Pabl ga, lel̄ mazdraa biladz me xtiidz zha ne rsëë barcw ni men̄ ne nac bizhuana. ¹²Stiba, zaatne nac Buenos Puertos ga rapda zaatne zaacse cuëz miech len̄ mëë nal̄, nacne nzian zho rëb mazd gdziñ guiedz Fenice, ga zac gbiaaz no gdipse len̄ mëë nal̄. Ro guidzliu win co riaan̄ Fenice, nligaa zhi rcaan̄ me ga.

¹³Zeene laa ti me win ne znu ziaadquia psilo brieë lo nis co, zootle na nli grieedraa me. Nacne lëëled bnabey zho bziaab no barcw, blisglaa zho lar nroob ne rcaan̄ me rzëw, laa no zio, gax gax ro guidzliu co zienie zhow. ¹⁴Zhisaque goca zeene laa ti me dox ne rnee zho Nordest psilo brieë, laa me co psilo rtsire barcw. ¹⁵Niicle racladz zho tsienie zhow nëz ne no guio no ga, per rsaand me; gon̄se zho led ncuane gacda, mazd psaan zho zienie mew nëz ne racladztaa me.

¹⁶Scale zienie me barcw ne no no ga, biotieed no gax ro guidzliu win ne lë Clauda, ga në në brieelo blis zho grë canó win ne nal̄ zhits barcw ga bzëëba nëz len̄ barcw; ¹⁷dzigo blibdoo zho barcw co zeena gbilda, ni blit zho lar nroob ne rcaan̄ me rzëw, sac rdzieb zho rëb zho tel̄ne scaquia lar co nend tsieniezhoo mew nëz ro nis, pa tsiesobnagwa lo yuzh.

¹⁸Zeene biini sti liu co mazdraa rrieë me, ni guixoo ne ziaadnie me, nacne blee zho grë yo ne no len̄ barcw blaal̄ zhow lo nis. ¹⁹Goc bion̄ ngbidz scataa zo guie dox co, bnabeyaque zho blee no grëse ncuane runxtsiin̄ zho len̄ barcw blaal̄ now lo nis.

²⁰Goc bla ngbidza rbèzdaque guie dox co, rludraa lo mel per ni lo ngbidz rludraa, dzigotaa rdzieets no nlidraa griequiaa no. ²¹Niicle wagw choot rsoladzdraa, dzigo bnee Pabl lo grè zha ne ziogrè no ga, rëb me:

—Tebaa nion to xtudz naa nagon nzhiguiel to nrieed ne Cret, zeena ndzieelod ne grè ncuane nodzian ne nu, niicle nlaaldgaa ne grè yo co lo nis. ²²Per laa ne znule bzhaaac zha dziuunraa ne. ¡Gdziebde to! ¡Peet gacd ne! Niicle nitlo barcw rii, per choot peet gacd. ²³Led nanle to ganle, xnèz Dios no naa ni xtsiin me noyun naa, nieewdze pxeel me ti xanj me ²⁴nè lo naa: “Gdziebd luu gon Pabl, peet gacd luu, sac ib none laa luu gdzin lo rey ne zob Roma. Niicle grè zha ne ziadgrèè luu len barcw i peet gacd zho, sac bin me mine r nab luu.” ²⁵Gane rne naa lo to peet tsienied guic to, nanle naa csaand Dios ne, ible zac mine nè anjl co lo naa. ²⁶Ib tedsod, no pa ti lo guidzliu win ne no lo nis rii tsiezo me rii ne.

²⁷Zeene goc tsiida ngbidz sca nèzrii nèzrec zienie me no, laa no no lo Nisdo Adriático. Wdze co, zig grol guieela, bien grè zha ne rsèè barcw ga gaxle ti ro guidzliu ga nonie barcw no; ²⁸dzigo ptiix zho dien palal quiet nis ga, gon zho loxaque gal yas guieta. Bzè zho spalal biire ptiix zhow stib, gale guieta loxaque tsiptib yas. ²⁹Gataa laa zho bdzieb rëb zho nend pa tsiecaan barcw lo quie, dzigo psilèè zho lo doo ne zob gza tap guuib cruz nroob ne quia nèz zhits barcw, bron zho gza guuib co lo nis, zeena tsowga sè barcw; rzac zho tebaa laa liu biinile.

³⁰Grè zha ne run dziin len barcw, gocladz zho nzhoon zho, psilo zho noxadz zho grè canó win ne ney barcw, rquiaalo zho zig nac zeene guuib cruz nroob ne ney barcw nèz quiaaw quialit zho csèèb zho len nis. ³¹Zeene gon Pabla, rëbchaa me lo Jul ni lo grè xmenguuib Jul:

—¡Laa grè zha rii gon racladz xoon! Csaande to, sac telne laa zho xoon nlidraa griequia to lo nis rii.

³²Dzigo pchug grè menguib co doo ne zob grè canó win co, bron zhow lo nis.

³³⁻³⁴Silgaw, bii ncaw rnaw laa Pabl bnee lo zho gow zho, rëb Pabl:

—¡None gow to! Golwi ganle nale gac tsiin ngbidz ga ni ti lè peet gard gow to, ni squique raguiesde to zaacse. Peet tsienied guic to, ni tib to peet gacd.

³⁵Blozhse sca bnee Pabl lo zho, bzhen Pabl ti quietxtil, squi ndxie zho grè zho bdeed me xquizh lo Dios, dzigo beengrol me quietxtil co laa me psilo wagw. ³⁶Dzigoraa peet güeyniedraa guic zho, ye zho laa zho psilo dow. ³⁷Lo grè no zig zio no len barcw co rgaa no chop gayoo tsongaltsiimtib.

³⁸Blozhse bdiow no, dzigo laa zho blee grè zhoxtil ne zie len barcw ga blaal zhow lo nis, zeena gnitnè barcw spalal. ³⁹Zeene laa liu blozh biini, gon grè zha ne rsèè barcw ga laa ti lè ro guidzliu rlu gax ga, per riend zho dien paw. Natlaa nac ro guidzliu co, rlu zac gdzin barcwa, nacne rëb zho dien pe grieelod gdzinne zho barcw ga. ⁴⁰Dzigo pchug zho doo ne zob guuib cruz nroob ne no len nis ga, biaanse guuib co ga. Psilèè zho doo ne naaz yag nlag ne rchug nis rzè barcw, ni blisglaa zho lar nroob ne rcaan me rzèw; zeena csèè mew gdzina gax ro guidzliu co.

⁴¹Per ziese zho, lëetse lo yuzh ne zobli leñ nis co güeytsiba, loxaque güeysëebguica ga laa nëz zhitsa psilo nobilaque, sac grëse nis ne rias riecaan choo co. ⁴²Dzigotaa laa grë menguiib co gocladz niut grë zha ne zie ga guey ladzguiib, rëb zho nend znuse xoobnis zho xoon zho. ⁴³Per bdeete men ne rnabey lo zho diidz, sac racladzd me gut zho Pabl. Mazd bnabey me zha ne rac rzhoobnis, zac ner zho xoobnis zho grieequia zho ro nis co; ⁴⁴laa grë zha ne gacd xoobnis, zac maase grë yag biats ne nobil barcw xoobnisnie zho. Sca bdeeda diidz brieequia no ro nis grëse no.

Blëz zho Malt

28 Zeene bdziñ no ga, dzigotaa gocndion no lëe guidzliu win ne lë Malt ga. ²Grë miech ne no ga pquiadox zdoos zho no, bzëeg zho gui bredz zho no bdzëe no, sac lala rac nal ni scataque bgaa no guie.

³Ye Pabl güey güeytop chop lë yag ne cuib lo gui. Lëetaque laa me nodziiba lo gui, tibaque bias ti meel ne zizhoon lo zhinzëe gui co, pquiaalay ma nia me, quiataque ma ga. ⁴Grë miech ne no ga, zeene gon zhow rneechaa zho:

—jise nagon rlu, nzëeb men qui ngutoo! Niicle blaa me lo nisdoo, per no guielwxtis ne quianab guet me.

⁵Znuse bdzib Pabl nia me bron me meel co lo gui. ⁶Grëse zho rwi quiambëz zho dien pa hor sigui me, te tibaque tsobe me liu ye guet me. Wdzeelaaw peet racd me. Laa zeene gon zho peet racd me, dzigo psilo zho rnee zho no cho ti dios nac me.

⁷Gaxaque ga quia tib lë liun men ne rnabey lo guidzliu win co lë Publ, dzigo bneedz me zaatne bliaaz no ga tson ngbidz ni bneedz me ncuane bdioow no.

⁸Lëetaque leñ dze co laa pxoz me nix rlan xlëe ni yoobchen. Dzigo güeynee Pabl lo me, bnab Pabl lo Dios guiac me; blozhse bnab Pabl lo Dios, pxobnia Pabl guic me, laa me biac. ⁹Zeene bin grë miech cow, zha ne rzacnëtaa riaadnie zho zho lo Pabl, runguiac Pabl zho. ¹⁰Dzigo rleynie zho no, nroob grë ncuane bgad zho lo no. Zeene gol dze ne laa no wbii ga, scasaque nroob ncuane yquii no nëz bneedz zho.

¹¹Tson mëe bliaaz no lo guidzliu co, dzigo laa no brieë ga bziaab no ti leñ xbarcw zha Alejandrí, ti barcw ne blëz ga dipse leñ mëe nal co. Guic barcw co quia chop mdio, mdio ne rnee zho Cástor ni mdio ne rnee zho Pólux. ¹²Bdziñ no guiedz Siracús, ga bliaaz no tson ngbidz. ¹³Siracús brieë no, gax gax ro guidzliu zio no bdziñ no guiedz Regio; biini liu ine zhoob ti me ne ziaadquia lo nis co, dzigo laa no brieë Regio laa no zio. Biiniraa sti liu bdziñ no guiedz Puteoli, ¹⁴ga bdziñ no lo blalaa zha ne rliladz Jesús. Bnab zho lo no gbiaaz no, nacne bliaazaque no lo zho ga ti zmal. Garaa brieë no bdziñ no Roma.

¹⁵Grë zha ne rliladzle Jesús Roma, zeene bin zho laa no gdziñ ga, brieë zho biaad-xinëz zho no. Zhis zho biaddzieel no zaatne lë Foro de Apio, szhis zho biaad zaatne lë Tres Tabernas. Zeene gon Pabl scataa biaad-xinëz zho no, rley me rdeed me xquizh lo Dios.

Bdziñ Pabl Roma

¹⁶Zeene bdziñ no lad guiedz Roma, bdeed zho diidz Pablzhal bguib ti yu ne blöz me grop me menguiib ne quianap me, blood zho me ladzguiib.

¹⁷Goc tson ngbidz bdziñ no ga, dzigo bredz Pabl grë zha ne nac zha non lo zha Israel ne no ga. Blozhse pcaalsa zho, rëbcha me lo zho:

—Laa naa bredz to nu gon bets, gacnan to ganle laa grë zha ladz ne bnaaz naa Jerusalén, güeyzo zho naa lo zhiwxtis zha Roma rnab zho guet naa, per gneli naa lo to ganle, peet bend naa lo zho, ni ti zhiwseed xmengol ne bditst naa. ¹⁸Niicle wxtisgaaw, blozhse pquiep zho naa gon zho raapd naa falt, nacd naa zha ne rieguaḷ guet; dzigo gocladz zho nsilaa zho naa.

¹⁹Per zeene gon naa nëd menladz ne csilaa zho naa, nacne bnabaque naa ziaadnie zho naa lo César nu. Min co nagon nacne ziaḷ naa nu, ziaḷd naa cto naa menladz ne o cteedquiegaa naa zho. ²⁰Wen ne laa naa beenbey to nagon, ni beenbeygaa to naa; gacnan to sca ganle laa caden rii zob nia naa, per nacdä por pe falt ne rap naa, sinque laaw zob nia naa porne rliladz naa laa Dios pxeelle men ne quiambëz menladz ne ga.

²¹Dzigo pquiab zho rëb zho lo Pabl:

—|Wlaltaa, ni ti guits ib gard cxeel menladz ne lo no zaatne gzeet zho luu! Niiclegaa grë zha wladz ne zilanso nuw, rneed zho laa luu noyun pe guieḷntseeb. ²²Per na laga laa luu ziaad nu, siguiel luu sodiidz luu lo no dien zhapaa nac wseed ne rliladz luu i, sac blactaa zidzion no, zaatne notaa zha ne rliladza rlëenie miech zho.

²³Dzigo pso zho ti dze ne tsie zho.

Zeene gol dze co, nzian zho pcaalsa zaatne rbëz Pabl ga. Dzigo psilo Pabl bzodiidz me lo zho zhapaa racladz Dios gban miech, ni rnee me lo zho gliladz zho lëele men ne nac diidz cxeel Dios ga nac Jesús; blu me lo zho grëse zaatne zhobneew, zigtaa lo grë mine pquiaa Moisésa, zigtagaa lo grë mine pquiaa grëraa zha ne biadteed xtiidz Diosä. Dipse dze sca bzodiidznie me zho grë min co.

²⁴Brieequia bla zha ne bliladz grë mine bnee me ga, ni scaquegaa brieequia zha ne bliladzda. ²⁵Grë zha ne riod zdoo mine rnee me ga, laa zho psilo noriee, nacne rëb me:

—Ib lëepaa mine nac to i ga nagon bzeet Espiritu Sant, zeene psiaab me guic profet Isá znu rëb Isá ²⁶lo grë xmengol to:

Niicle peraa gon to, niicle peraa gan to,
per peet guiende to;

²⁷sac gocntseeb zdoo to.

Zob diag to, ni peet ronde to;
zob lo to, ni peet rande to.

Ncow nac guic to,
gane peet ronde to, peet rande to;

niicle rioxcdgaa to gbig to lo naa zeena csilaa naa to lo xtol to.

²⁸ Golgacnan sca ganle, min co gane laa Xtiidz Dios quiagaaz lo grë miech stib guiedz, ni zhasi gon noliladz zhow.

²⁹ [Zeene gon zho sca rëb Pabl mazdraa blëe zho, nodiidiidzlsa zho laa zho zey.]

³⁰ Dipse len chop iz blëz Pabl ga, ga bree me ti len yu ne bio me. Ga rdzin grë miech ne zienee lo me, ³¹ zha ne zietaa, rnee me lo zho zhapaa racladz Dios gban miech, ni rnee me lo zho gliladz zho cho nac Jesús. Dipse len dze co, ib biod zha ne ntsidil pe nacne sca noseed me miech. *Luc*